

1696

Henry





DE
**IMITANDO
CHRISTO.**

CONTEMNENDISQVE
mundi vanitatibus



Authore

**THOMA
KEMPISIO.**

INTERPRETE

**SEBASTIANO
CASTELLIONE.**

EPHES. V.

Estes imitatores DEI, ut chari filii, & cum
charitate vitam agite: quemadmodum Christus
adamavit nos, & seipsum pro nobis dedit
santum hostiamq; DEO ad suavem
odorem.

FRANCOFURTI AD MOENUM,
EX OFFICINA GENSCHIANÆ
ANNO M DC XCVL

12.

SEBASTIANI CASTELLIONIS

de sua hac translatione præfatiuncula.



Libellum hunc conscripsit olim latine Thomas dictus de Kempis, quem nos Kempisium appellamus, natione Germanus, ordinis Canonico-rum regularium Augustini, qui claruit circa annum 1410. Editus est autem libellus hoc titulo: Illus verè aureus de Christo imitando, ex fontibus a potissimum scriptura excerptus, Authore Domini Thoma de Kempis. Eum nostro tempore transul-ta Germanicum sermonem homo quidam, nrego arbia, pius, sapiensq, editus est hoc titulo,

Nachfolgung Christi/

*Wie man alle Eitelkeit dieser Welt verschmähem: von einem wolgelehrten liebhaber Gottes viel Jahren beschrieben / ietzt abermals fleißiger lesen / und von neuen aufgangen: hoc est, Imitatio Christi: quonam pacto vitanda sit omnis huius mundi vanitas: opus ante multos annos à quodam be-
locto & Dei amante conscriptum, & nunc denno-re-
nitum ac recens editum.*


*Hunc ego libellum, quia pietatis plenus, non mihi so-
l, sed & aliis piis multis visus est, putavi de Latino im-
inum, hoc est, de agrestiore sermone in paulo mundi-
m, sed tamen simplicem, esse conuertendum: in qua
dem mea conversione iudicium sequutus sum inter-
tis Germanici. Omisit enim ille prudens quadam,
icula etiam nonnihil imitavit, quia illi vettem-
is, vel statim superstitionem sapiebant, quod idem
mihi faciendum esse iudicavi.*

A Ro

Restat ut utriusque mei facti videlicet & quòd transtuli, rationem reddam. Erunt enim, credo, quibus etiam ridiculum videbitur, librum de latino in latinum convertere. Alii in alieno opere quicquam mutare aut detrahere nefas esse judicabunt. Quibus ego utrisque breviter respondebo. Quòd latinior feci, causam habui hanc, quod multi latiniora libentius legunt: & ego homines ad piorum libr. lectionem omni licitatione alliciendos esse censeo. Fingat me aliquis de Helvetica lingua in Suevicam, hoc est de Germanica in Germicam transtulisse: nihil habebit ea res peccati: monnihil etiam boni. Quòd si cui hac ratio non satis faciat, non ero in meo facto defendendo vel diligentior vel curiosior: extat ipse sua lingua: per me leget qui voluerit: ego volentibus, non nolentibus transtuli. Eadem res est, aliter atque aliter vestita: utra quisque veste delectabitur, ea utatur: ego vel ineptire malo, quàm non prodesse volentibus.

Quòd ad alterum attinet, postquam Christi lux nostro seculo sic affulsit, ut multos errores & superstitiones delexerit, puto non nefas esse nonnullos castrare libros, ut omnia probantes, quæ bona sunt teneamus. Quòd si cui hoc non placebit, faciat quod solent in Martiali Poeta multi. Castravit eum quidam, quod ejus factum casti omnes laudant: & castratum legunt: at salaces totum sic & hunc totum per me licet legant, quibus hac improbatum castratio. Me quidem opera mea neque pudet, neque pœnit, & eam nemini nocituram, nonnullis profuturam esse confido, Deumq; ut ita faxit oro.

Die 5, Junii Anno 1567.



D E

MUNDANARUM VANITATUM CONTEMPTU.

CAP. I.

Qui me sequitur, non ambulat in tenebris, sed vitæ lumen habet: Hæc Christi verba sunt quibus admoneamur, ut ejus vitam & mores imitemur, si verè collustrari, & ab omni cordis cæcitate liberari volumus.

Quamobrem Christi vitam summo studio meditari debemus. Excellit sanè doctrina Christi omnem omnium sanctorum doctrinam: & si quis ejus spiritu præditus est, is abditum ibi manna invenit. Sed fit ut multi, quia Christi spiritu careant, ideo ex frequenti evangelii auditione exiguum cupiditatem concipiant. Enim verò si quis Christi verba plenè & cum voluptate vult intelligere, huic necesse est, ut omnem vitam suam secundum illum componere studeat. Quid prodest ardua de Trinitate disputatio, si animi summisione careas, ideoque displiceas Trinitati?
Enim.

Enim verò non ardua dicta sanctum justumque reddunt hominem, sed studiosa vita Deo charum efficit. Et videm peccatorum poenitentiam sentire, quàm ejusdem definitionem tenere malim. Si vel universas sacras literas, atque adeo philosophorum omnium dicta, memoria teneas, quid prosunt ista omnia sine Dei charitate & gratia? Vana vanitatis, & omnia sunt vanitas, præterquam Deum amare, ei que soli servire. Ea dum summa est sapientia, per mundi contemptum ad cœleste regnum tendere. Vanitas est perituras quærere divitias, & in eis spem suam collocare. Vanitas est & honores ambire, ac seipsum extollere. Vanitas est & carnis cupiditates sequi, eaque appetere, quæ tibi deinde graves poenas sint allatura. Vanitas est longam vitam optare, & interim bonam vitam parum curare. Vanitas est præsentem duntaxat vitam intueri, & interim futura non prævidere. Vanitas est ea diligere, quæ summa celeritate prætereunt, & illuc non festinare, ubi sempiterna durat lætitia. Memento frequenter illius proverbi: Nec oculus visu, nec auris expletur auditu. Quamobrem da operam ut animum ab aspectabilium rerum amore abstrahas, teque ad inaspectabilia convertas. Qui enim cupiditatibus suis obsequuntur, ii & animum suum peccatorum conscientia contaminant, & Dei gratiam amittunt.

Sunt omnes homines natura discendi cupidissimi. Sed quid prodest scientia religionis expertis? Est omnino vel vilissimus agricola, sed qui Deum colat, anteponendus superbo philosopho, qui seipso neglecto cœli cursum considerat. Qui se ipsum probè novit, seipsum parvi facit, nec laudibus delectatur humanis. Si vel omnia quæcunque in toto orbe constant sciam, idemque Dei amore caream, quid mihi id profuturum est apud Deum, qui de me ex factis meis judicaturus est? Superfede nimio discendi studio, utpote quod animum multum distrahat atque decipiat. Cupiunt enim suspici docti, sapientesque dici. Jam verò multa sunt, quorum scientia animo parum ne dicam nihil prodest: & valde insipiens est, qui aliis rebus ferunt. Non satiant animum multa verba, sed mentem reficit vita bona, præstatque homini bene sibi conscius animus, magnam ad Deum confidentiam. Quanto tu plura melioraque didiceris, tanto graviores pœnas lues, nisi eò sanctius vixeris. Quamobrem noli ulla vel arte vel scientia inolescere, quin potius concessa tibi verum cognitione timidior esto. Quod si tibi multa scire multaque percepisse videris, scito longè plura esse quæ nescias: ac superbire noli, sed potius ignorantiam tuam agnosce. Cur tu te cæteris anteponas, cum multi te doctiores & legis peritiores reperiantur? Si vis utiliter aliquid scire

& discere, ama nesciri proque nihilo haberi. Nam sui ipsius vera cognitio atque despectio, eadem summa est utilissimaque eruditio, sequē ipsum parvi, alios magni facere, & in precio habere, magnā est sapientia atque perfectio. Si quem apertē peccare, aut grave aliquod facinus perpetrare videris, non idcirco meliorem te debes existimare: nescis enim quādiu sis in virtute perseveraturus. Sumus equidem omnes fragiles: sed fragiliorem te existimato esse neminem.

De Doctrina veritatis.

CAP. II I.

Felix quem veritas non figuris vocibusque pereuntibus, sed ipsa per se, uti est, docet. Nam sæpe nos opiniones sensusque nostri fallunt, parumque valent. Quid prodest de occultis, obscurisque rebus arguta disceptatio, quorum ignoratio nobis fraudi futura non sit in Dei iudicio? Insignis sanè stultitia est, quod neglectis utilibus & necessariis, ultrò incumbimus curiosis & damnosis, usque adeo oculis præditi, tamen non videmus. Quid causæ est, cur genera illa speciesque dialecticas curemus? Quem enim æternus ille sermone alloquitur, is à multis opinionibus expeditur. Nam ab uno sermone sunt omnia, & unum loquuntur omnia, estque principium illud, quod nos alloquitur, & sine quo nemo rite rem intelligit aut iudicat. Cui verò omnia sunt unum, quique ad unum trahit omnia, &

& in uno videt omnia, is & animo esse constanti-
 & in Deo perpetuò acquiescere potest. O verita-
 tis Deus, fac me unum tecum in charitate perpe-
 tua: Tædet me sæpe multa legere & audire, in te
 est quicquid volo & cupio: taceant doctores o-
 mnes, sileat omnis rerum natura in tuo conspectu;
 tu me solus alloquere. Nam quanto quisque sibi
 conjunctior est, quantoque magis secum habitans
 minus extra vagatur, tanto & plura & altiora si-
 ne labore percipit, quippe qui intelligentiæ lu-
 men superne accipit. Purus simplex constansque
 animus in multa opera non distrahitur, utpote
 qui omnia ad Dei honorem faciat, operamque det
 ut ab omni amore sui ocietur. Quid enim homi-
 nem magis impedit atque vexat, quàm animi in-
 domitæ perturbationes? Bonus & religiosus ho-
 mo antequam opera aggrediatur, prius ipse se-
 cum consultat, neque se operibus suis ad vitiosas
 cupidines abstrahi patitur, sed eas rectæ rationis
 arbitrio inflectit. Equidem nullum gravius cer-
 tamen est, quàm seipsum vincere conari: atque
 hoc opus habere debemus, ut nos ipsos vincam⁹,
 & in dies nobis ipsis fortiores fiamus, semperque
 nonnihil in virtute proficiamus. Omnis enim in
 hac vita perfectio imperfecti quiddam sibi anne-
 xum habet, omnisque nostra veri perspicientia ca-
 liginem non caret. Est omnino humilis sui cognitio
 certior ad Deum via, quàm profunda scientiæ per-
 vestigatio. Neque tamen culpanda scientia est,
 aut cuiuspiam rei cognitio, quæ si ritè considere-

tur, bona est, & divinitus condita: sed ei semper anteferendus est animus sibi bene conscius, & conjuncta cum virtute vita. Sed quia plerique magis scire, quam bene vivere student, efficitur ut plerumque errent, & penè nullum, aut certè exiguum fructum ferant. Qui si tantam adhiberent diligentiam tum in vitiis extirpandis, tum in virtutibus serendis, quantum adhibent in quæstionibus movendis, profectò nec in vulgo tot scelera flagitiaque perpetrarentur, nec in literatis tanta vitæ licentia vigeret. Certè ubi venerit dies judicii, non quid legerimus, sed quid egerimus: neque quàm bene dixerimus, sed quàm religiosè vixerimus, exigetur à nobis ratio. Age jam, ubi nunc sunt omnes illi magistri primarii quæ viri tibi olim dum viverent studii quæ florent, noti? quorum nunc stipendiis, alii fruuntur, qui fortasse de illis ne quidem cogitant. Illi quidem dum viverent aliquid esse videbantur, nunc de eis siletur: tam cito perit humana gloria. Qui si vitam scientiæ suæ contentaneam egissent, feliciter literis operam dedissent. Quam multi vana scientia pereunt in hoc seculo, quia Dei cultum parum curant: quoniam quæ magni, quàm demissi esse malunt, sit ut vanis cogitationibus utantur. Verè magnus est, qui magnam habet charitatem. Vere magnus est, qui suo judicio parvus, omne culmen honoris pro nihilo ducit. Verè prudens est, qui terrestria omnia pro stercore habet, ut Christum lucrifaciat. Et
verè

vere bene doctus est, qui Dei voluntatem exequitur, relinquitq; suam.

De prudentia in rebus agendis.

CAP. IV.

Non cuivis dicto aut instinctui credendum est, sed cautè ac per ocium res est secundum Deum ponderanda. Sæpe malum, prohdolor, facilius quàm bonum de altero & creditur & dicitur: ita sumus infirmi. Sed perfecti homines non cuiusvis orationi credunt, quippe qui sciant infirmitatem humanam & ad malum proclivem, & in verbis sæpe labentem. Magnæ sapientiæ est, nec in agendo præcipitem esse, nec in eo, quod semel animo concupiveris, pertinacem. Eiusdem sapientiæ est, neq; quibuslibet hominum verbis credere, neq; audita mox in aliorum aures effundere. Cum sapiente & religioso homine consilium inito, potiusque à meliore instrui, quàm ipse tua inventa sequi studeto. Facit bona vita hominem sapientem secundum Deum, & multorum peritum. Quanto quisque submissiorem se præstat, tanto idem in omnibus & sapientior est & pacatior.

De sacrarum literarum lectione.

CAP. V.

In sacris literis veritas, non eloquentia quærenda est: debentq; eodem quo dictatæ sunt spiritu legi, & in eis utilitas potius quàm orationis subtilitas quæri: nec minus libenter religiosos rudesq; libros, quàm arduos profundosq; legere convenit.

nit. Neq; verò te scribentis authoritas moveat, utrum parvæ; an magnæ literaturæ fuerit: sed puræ veritatis amor ad legendum te attrahat: neve quis dicat, sed quid dicatur, attende. Intereunt homines, sed divina veritas durat in æternum: & nos nulla personarum habita ratione variis modis alloquitur DEUS. Sæpe nos in literarum lectione impedit nostra curiositas, dum ea percipere ac discutere volumus, quæ simpliciter prætereunda essent. Si fructum inde vis percipere, submissè, simpliciter, fideliter legito: nève scientiæ nomen unquam affectato: Sanctos homines interrogare amato, eorumq; dicta tacitus audito, neve seniorum figuratis verbis offendor: neq; enim temerè enunciantur.

De animi perturbationibus.

CAP. VI.

QVandocunq; aliquid intemperanter appetit homo, statim animo redditur inquieto. Superbus aut avarus nunquam quiescit, sed qui animo pauper & summissus est, is in alta pace degit. Qui verò animi perturbationes nondum planè necavit, is & facilè tentatur, & parvis etiam vili-busq; rebus vincitur. Infirmus animo, & adhuc non nulla ex parte carnalis, & ad sensibilia propensus, se ipsum à terrenis cupiditatibus totè abstrahere vix potest: ideoque dum abstrahit, sæpe cum dolore id facit: & si quis ei resistit, facilè irascitur. Sin prosequutus est quod concupivit, confestim peccati conscientia angitur: quia cupidita-

si suæ obsequutus est, quæ ad eam, quam quærebat, pacem, nihil profuit. Igitur non serviendo, sed resistendo cupidinib⁹ invenitur vera pax animi: existitq̃ve ea pax non in corde carnis hominis, non in addicto rebus externis homine, sed in fervido & spirituali.

De vana spe fastuq̃ fugiendo,

CAP. VII.

IN hominibus cæterisque rebus creatis spem suam collocare, levitatis est. Ne te pudeat aliis servire amore JESU CHRISTI, & pauperem in hac vita videri. Noli te ipso niti, sed in DEO spem tuam colloca. Conare pro virili: & DEUS aderit bonæ tuæ voluntati. Ne confide vel tuæ scientiæ vel cujusquam mortalium astutiæ, sed potius Dei favori, qui & submissos adjuvat, & insolentes deprimat. Ne gloriare vel de divitiis, si adsunt, vel de amicis, si potentes sunt, sed de DEO, qui & omnia præstat, & seipsum super omnia dare cupit. Ne te extolle de corporis vel magnitudine vel pulchritudine, quæ l. levi morbo corrupta scædatur. Noli ipse tibi de dexteritate ingeniove tuo placere, ne DEO displiceas, cujus est, quicquid boni à natura habes. Cæteris meliorem te ne existimato, ne fortè apud Deum, qui novit quid sit in homine, deterior habere. Rectè factis superbire noli: nam longè alia sunt Dei quàm hominum judicia, quippe cui sæpe displiceat, quod hominibus placet. Si quid in te boni est, credito de altero meliora, ut animi submissionem retineas. Vel omnibus

maibus seipsum subicere nihil nocet : at nocet vel uni seipsum præponere. Summissus homo jugi pace fruitur : at superbi animus ira & indignatione frequenter agitur.

De cavenda familiaritate nimia.

CAP. VIII.

Non cuius animum tuum aperito, sed cum sapiente ac religioso negotium tuum communicato : cum juvenibus autem & extraneis rarus esto. Divitibus blandiri noli, nève cum magnatibus libenter versare : quoniam te modestis & simplicibus religiosis, beneque moratis associato, & conducibilia tractato. Mulieri nulli familiaris esto, sed in universum omnes bonas mulieres commendato. Soli Deo ejusque angelis familiaris esse optato : hominum quorundam familiaritatem evita. Charitas habenda est erga omnes : sed familiaritatem non expedit. Quandoque accidit, ut ignotus aliquis secunda fama clarus sit, idem postea cognitus ac præsens vilescat obscuriorque fiat. Putamus aliquando nos aliis inita familiaritate placituros, à quibus ubi morum nostrorum improbitas animadversa est, eis magis etiam displicemus.

De obedientia & subjectione.

CAP. IX.

Permagnum est alterius imperio subiectum vivere neque sui juris esse : multoque tutius patetur, quam imperatur. Multi necessitate magis quam charitate obediunt, iidemque id cum

CHRISTO.

um labore faciunt, & facile murmurant, nec
 mentis libertatem adipiscuntur, nisi & ex animo
 & propter Deum sese dicto audientes præbeant.
 Quocunque te veritas, nullam ulquam, nisi in al-
 terius imperio modestè ferendo, quietem inve-
 nies. Multos fefellit locorum imaginatio atque
 mutatio. Agit equidem quisque libenter arbi-
 trario suo, & in eos qui secum sentiunt propensior
 est. Verum si inter nos versatur Deus, omnino
 cedendum est aliquando nostra sententia propter
 bonum pacis. Quis enim ita sapit, ut omnia sciat?
 Quare noli nimis tuæ sententiæ confidere: sed a-
 liorum quoque iudicium libenter audito. Quod
 si bonam alioquin tuam sententiam, tamen pro-
 pter Deum missam feceris, aliamque sequutus
 fueris, magis inde proficies. Audi vi enim sæpe,
 ut ius esse audire & accipere consilium, quam da-
 re. Fieri enim potest, ut sit alioquin bona cujus-
 dam sententia, & tamen si idem aliis, dum id ra-
 tio aut causa postulat, obtemperare nolit, hoc ar-
 gumento superbiam pertinaciamque suam o-
 stendat.

De cavenda familiaritate verborum.

CAP. X.

Hominum turbas, quoad ejus fieri potest,
 caveto: multum enim officiunt, qui de re-
 bus mundanis vulgò haberi solent sermo-
 nes, etiam si alioquin à simplici animo profici-
 scantur. Facile enim vanitate capti inquinamur, sitque
 sæpe ut me tacuisse, & in turba non fuisse optem.
 Quod

Qvòd si causa qværat^{ur}, cur tam libenter inter nos colloqvamur & confabulemur, cum tamen rarò sine conscientia labe aliqua ad silentium redeamus, hanc esse comperiemur, qvòd ex frequentibus colloqvutionibus solatium aucupamur & fatigatum diversis cogitationibus animum relevare cupimus: ac qvanto qvidqve vehementius diligimus & avemus, qvanto ve qvidqve nobis magis adversari sentimus, tanto magis de eo loqui libet & cogitare, idqve plerumqve frustra. Nam hæc exterior consolatio interiori divinæ consolationi non exiguum detrimentum affert. Itaqve vigilandum orandumqve est, ne tempus ociosè transigatur: qvòd si loqui libet & expedit, utilia loquere. A garriendo qvidem deterrere nos illud maximè debet, qvcd & vitiosa est consuetudo garriendi & profectum nostrum remoratur. Cæterum conducit non parum ad proficiendum in rebus divinis religiosa de eis colloqvutio, præsertim ubi homines animo spirituqve similes inter sese in Deo copulantur.

De pace consequenda, studioqve proficiendi.

CAP. XI.

Possemus alta pace frui, nisi aliorum dictis & factis, qvæ nostræ procurationis non sunt, occuparemur. Sed qvi possit is in pace diu degere, qvi se alienis curis immiscet? qvi occasiones foris qværit? qvi vel parum vel rarò sese intus colligit? Beati simplices: nam ii multam pacem assequuntur. Jam verò cur qvidam sanctorum

Sanctorum ita perfecti, itaque divinarum rerum contemplationi addicti extiterunt? nimirum quia terrenas cupiditates omnes enecare studuerunt, ideoque totis animi sensibus Deo adhaerere, libereque vacare potuerunt. At nos animi nostri perturbationibus nimium occupamur, rebusque caducis nimium sollicitamur. Rarò etiam vel unum vitium perfectè vincimus, & ad quotidianum profectum non accendimur: ideoque frigidi & tepidi manemus. Qui si nobis ipsis planè mortui, interior minimè impliciti teneremur, fieret profectò ut divina sentire, cœlestiumque rerum contemplationem non nihil experiri possemus. Est omnino maximum, ne dicam omne impedimentum in eo positum, quòd ab animi perturbationibus & cupiditatibus non sumus liberi, nec perfectam sanctorum viam conamur ingredi. Quòd si aliquando vel tantulum rerum adversarum occurrit, nimis facilè dejicimur, & ad humanas consolationes nos convertimus. Quòd si, ut viros fortes decet, in prælio stare niteremur, non dubium est, quin auxilium nobis de cœlo mitti videremus. Idem etiam certantes, suumque favorem sperantes paratus est adjuvare, qui nobis certandi occasiones procurat ut vincamus. Quòd si in exterioribus duntaxat rebus istis præstandis gressum religionis collocaverimus, brevi finem habitura est nostra religio. Radici admovenda est securis, ut à cupi-

B

dita-

ditatibus expurgati , pacatū animum adipiscamur. Si vel unum vitium quotannis extirparemus, citò perfecti viri efficeremur. Nunc contrà fit , ut sæpe nos initio correctionis nostræ meliores purioresque fuisse deprehendamus , quàm post multos professionis annos : quo fit ut cum debeat ardor progressusque noster in dies crescere , magnum Judicemus , si quis ardoris primi partem retinere queat. Si principio vim aliquantam nobis inferremus, efficeretur ut postea omnia cum suavitate lætitiaque præstare possemus. Est equidem grave, assueta relinquere : gravius etiam suæ ipsius voluntati repugnare : verum si parva levique non viceris, quando superabis difficiliora? Resiste principio proclivitati tuæ, pravamque consuetudinem relinque, ne fortè paulatim ad majorem te ducat difficultatem. O si animadverteres quantam & tibi pacem , & aliis lætitiam te ipsum probè gerendo afferres, nã tu de proficiendo in rebus divinis magis esses sollicitus.

De utilitate rerum adversarum.

CAP. XII.

Calamitatibus & rebus adversis interdum premi nobis conducibile est , utpote quæ sæpe hominem in seipsum revocent, quo se exulare sciat, nec in ullis humanis rebus spem suam collocet. Neque non illud è re nostra est, esse interdum qui de nobis maledicant, maleq; & sinistrè de nobis sentiant, etiam si bonis moribus

ribus bonoque animo sumus. Nam hæc sæpe conducunt ad modestiam, & ab ambitione nos tuentur. Siquidem ita fit ut tanto magis interiorem testem Deum quæramus, quando foris contemnimur ab hominibus, nec nobis satis creditur. Itaque debet homo sic totus à Deo pendere, ut ei multas quærere consolationes non sit necesse. Quum enim bonæ voluntatis homo rebus adversis premitur & tentatur, aut malis cogitationibus angitur, tunc sibi tanto magis Dei opem necessariam esse intelligit, sine quo nihil boni se posse comperit. Tunc dolet, tunc gemit, tunc ut ab ea quam patitur miseria liberetur, orat, tunc eum diutius vivere tædet, mortemq; optat, ut ex hac vita profectus, cum Christo degat. Tunc probè perspicit perfectam securitatem, plenamque pacem, in hac vita constare non posse.

De resistendo tentationibus.

CAP. XIII.

Quandiu in hac vita sumus, à miseriis, & tentatione abesse non possumus: quam etiam ob causam in Jobo scriptum habetur, Hominis in terra vitam esse tentationem. Itaque debet quisque de suis tentationibus esse sollicitus, & invigilare precibus, ne diabolus locum inveniatur decipiendi, qui nunquam dormiat, sed semper oberrat quærens quem devoret. Nemo tam perfectus & sanctus est, qui non peccatur aliquando tentationibus, nec eis planè

carere possumus. Sunt tamen tentationes homini sæpe valde utiles, licet molestæ, utpote quibus homo deprimatur, purgetur, erudiatur. Res adversas & tentationes sancti omnes obierunt, & in eis ad virtutem profecerunt: eaq; qui satis ferre nequiverunt, ii rejectanei evaserunt ac defecerunt. Nullus vel ordo tam sanctus, vel locus tam solitarius est, quin in eo tentationes & adversa existant: deniq; quamdiu vivit homo, nunquam prorsus à tentationibus tutus est, utpote cum insit in nobis ipsis id ipsum à quo tentamur. Postquam in cupiditate nati sumus: succedunt tentationes tentationibus, miseriæ miseriis, semperq; aliquid patiendum habemus, nam felicitatis nostræ bonum perdidimus. Multi dum tentationes declinant, in graviores incidunt. Non sola fuga vicerimus, sed patientia veraque modestia efficiemur hostib. validiores & fortiores. Qui tentationes tantum externè declinans, radicem non evellit, is tantum abest ut proficiat, ut tanto eum citius repetant tentationes, tantoq; deterius habeat. Paulatim & cum patientia durando, adjuvante Deo, facilius superabis, quàm durtia & importunitate. In tentatione sæpius utere consilio: & si quis tentatur, ei durum te præbere noli, sed potius consolationem adhibe: sicut ipse tibi adhiberi velis. Omnium malarum tentationum initium est animi inconstantia, & parva de Deo confidentia. Ut enim destituta gubernaculo navis ultro citroque ven-

ventis impellitur : ita remissus & propositi parum tenax homo variè tentatur. Ut ferrum ignis, sic hominem explorat tentatio. Quid possumus, sæpe nescimus : sed quid simus aperit tentatio. Vigilandum est autem maximè temptationis initio : nam tunc facilius vincitur hostis, si mentis ostium intrare nequaquam finitur, sed ei extra limen simul ac pulsavit, obviamitur. Itaque rectè dixit quidam :

Principiis obsta, sero medicina paratur,

Cum mala per longas invaluere moras.

Nam primò occurrit menti nuda cogitatio : deinde vehemens imaginatio : postremò delectatio, motusque pravus, & assensio : quo fit ut paulatim penitus intret malitiosus hostis, dum illi non resistitur principio : ac quanto quisque diutius ad resistendum torpet, tanto & ipse indies debilior, & hostis in eum fortior evadit. Nonnulli principio correctionis suæ graviora certamina patiuntur, alii in fine : alii per omnem vitam vexantur : sunt qui leviter oppugnantur, pro divini decreti sapientia & æquitate, quæ hominum mores meritaque pensat, & cuncta ad electorum suorum salutem prius dispensat. Itaque non debemus, dum tentamur, desperare, sed eo ardentius Deum orare, ut nos in omni-
bus rebus adversis dignetur adiuvere, factus utiq; secundum dictum Pauli, ejusmodi temptationis eventum, ut ferre valeamus. Quamobrem in omnibus temptationibus & rebus ad-

tas, sua cujusque voluntas, præmii spes, cupido commoditatis. Qui vera perfectaque charitate præditus est, is nulla in re sibimetipsi servit, sed Dei tantum gloriæ in omnib. studet. Nulli etiam invidet, quippè qui nullum amet privatum gaudium, nec in seipso gaudere velit, sed in Deo super omnia bona beari optet. Nemini quicquam boni tribuit, sed omnia prorsus Deo accepta fert, à quo ceu fonte manant omnia, in quo ad extremum sancti omnes cum boni frui-tione acquiescunt. Quòd si quis vel scintillam habet veræ charitatis, nã ille terrena omnia sentit esse plena vanitatis.

De tolerandis aliorum vitiis. CAP. XVI.

QUæ quisque vel in seipso, vel in altero corrigere nequit, ea patienter ferre debet, donec Deus aliud statuatur. Cogita, præstare forsàn ut ita sit ad tui explorationem & patientiam, sine qua non magni pendenda sunt merita nostra. Debes tamen ob hujusmodi impedimenta Deo supplicare, ut tibi sic subvenire dignetur, ut ista æquo animo ferre queas. Si quis semel aut iterum admonitus non obtemperat, noli cum eo contendere, sed rem totam Deo committe, ut quod ex ejus voluntate & honore sit, id fiat in omnib. ejus cultoribus: qui malum in bonum convertere probè sciat. Da operam, ut sis patiens in tolerandis aliorum quibuscunque vitiis & infirmitatibus, utpote qui ipse quoque multis labores, quæ vicissim to-
leran-

leranda sint aliis. Si ipse teipsum, qualem velles, reddere non potes, qui possis alterum arbitrio tuo componere? Cupimus alios esse perfectos, cum ipsi interea vitia nostra non corrigamus. Volumus ut alii severe corrigantur, ipsi corrigi recusamus. Displicet aliorum immodica licentia, ipsi interim repulsam pati nolumus. Alios statutis coerceri volumus, ipsi nos amplius cohiberi minimè patimur. Hinc patet quàm non eodem quo nos ipsos loco alterum habeamus. Enimverò si essent omnes perfecti, quid esset quod ab altero in Dei gratiam pateremur? Nunc sic visum est Deo, ut discamus alterius onera ferre, quippe cum nemo vitii, nemo oneris sit expers, nemo sibi satis sit, nemo sibi satis sapiat, quin necesse est, ut nos inter nos feramus, consolemur, adjuvemus, instruamus, admonemus. Jam qua quisque virtute sit, facilius patescit occasione rerum adversarum. Namque occasiones hominem fragilem non faciunt, sed qualis sit ostendunt.

De solitaria vita. CAP. XVII.

Oportet ut discas teipsum in multis frangere, si vis pacem & concordiam cum aliis tenere. Si ritè consistere vis & proficere, fac ut te exulem & peregrinum in terris esse existimes. Stultum te fieri propter Christum oportet, si vis religiosam vitam ducere. Vestis & tonsura nihil conducunt: sed morum mutatio, & cupidinum plena interfectio, verè

religiosum faciunt hominem. Qui aliud quàm merum Deum animæque suæ salutem quærit, is nihil nisi misérias & dolores inveniet. Neque verò diu tranquillus manere potest, qui non conatur esse minimus, & omnibus subiectus. Ad serviendum venisti, non ad regendum. Ad patiendum & laborandum scias te vocatum, non ad otiaudum & fabulandum. Hic explorantur homines sicut aurum in fornace, hic consistere nemo potest, nisi qui se toto corde propter Deum deprimere velit.

De exemplis sanctorum Patrum.

CAP. XVIII.

INtuere sanctorum illorum patrum exempla fervida, in quibus vera perfectio refulsit & religio, & videbis quàm exiguum & pene nihil sit quod nos præstamus. Heu quid est vita nostra si cum illis conferatur? Sancti illi homines, amicique Christi, Domino servierunt in fame & siti, in frigore & nuditate, in labore & fatione, in vigiliis & jejuniis, in precibus sanctisque cogitationibus, in multis persecutionibus & opprobriis. Quot quàmqu; graves misérias passi sunt Apostoli, Martyres, Confessores, Virgines, denique reliqui omnes, qui Christi vestigia sequi voluere? Nam animas suas in hac vita odio habuerunt, ut eas in æternam vitam servarent. O quàm severam, quàm tetricam vitam sancti illi patres in solitudine duxerunt? quàm longas & graves tentationes pertule-

tulerunt ? quàm frequenter ab hoste vexati sunt? quàm crebras & ardentes preces Deo libarunt ? quanta cum severitate continentes se præstiterunt? quanto studio & ardore in rebus divinis progressus facere contenderunt? quàm acre bellum in edomandis vitiis gesserunt? quàm sincero rectoque erga Deum animo præditi fuerunt? Interdiu laborabant, noctu divinis precibus vacabant : quanquam ne laborando quidem à mentis pretationibus cessabant. Denique, omne tempus utiliter impendebant, omnisque hora ad vacandum Deo, brevis videbatur adeo, ut præ cogitandi dulcedine etiam necessitas corpora curandi oblivioni tradere-tur. Omnibus divitiis, authoritatibus, honoribus, amicis, cognatis, renuntiabant, neque mundani quicquam habere cupiebant, quid multis? vix necessaria vitæ adhibebant, usque adeò ut corpori etiam in necessitate esse serviendum dolerent. Ergo rebus terrenis pauperes, sed divino favore virtutibusque, prædivites erant, & foris egentes, intus Dei gratia & consolationibus recreabantur. Erant Mundo alieni, sed Deo proximi ac familiares amici. Erant & suo nihili, & Mundi judicio despecti : sed Deo summi eximique habebantur. In vera modestia perstare, in simplici obedientia vivere, in charitate & patientia degere, ideoque quotidie in spiritu proficere, & magnam à Deo gratiam obtinere. Denique religiosis omnibus exemplo esse debent, nosq; plus ad strenuè progredien-dum

dum provocare, quàm trepidorum multitudo retardare. Quantus ardor extitit omnium religiosorum in principio sancti illius eorum instituti? quanta precationum religio? quanta virtutis æmulatio? quàm severa vixit disciplina? quanta reverentia & obedientia sub regula magistri in omnibus floruit? Testantur adhuc relicta vestigia, verè sanctos perfectosque fuisse viros illos, qui tam strenuè militantes Mundum subegerint. At nunc magnus putatur, si quis in præcepta non delinquit, si quis accepta cum patientia tolerare potuit. Ah temporis statusque nostri socordiam, quòd tam citò declinamus de ardore pristino, & jam tædet vitæ prælassitudine & tepore. Utinam in nobis non planè dormiat virtutum progressus, qui sæpe tot vidimus exempla religiosorum.

De exercitationibus hominis verè religiosi.

CAP. XIX.

DEbet omnino hominis religiosi vita omnibus pollere virtutibus, ut sit internè talis, qualis externè videtur hominibus: quinimò multo plus intus meritò esse debet, quam foris cernitur: quippe cùm nostri sit inspector Deus, quem summopere revereri debemus, ubicunque sumus, & angelorum ritu in eius conspectu mundi incedere. Quotidie renovare debemus propositum nostrum, & perinde ac si hodie primùm ad frugem conversi essemus,

ad

ad ardorem nos ipsos excitare, atque ita dicere :
Aduva me, mi domine Deus , in bono institu-
to sanctoque tui cultu , & mihi da hoc ipso die
perfectè incipere : nam quod hætenus feci,
nihil est. Ad nostrum currendi proficiendi-
que propositum magna diligentia opus est , si
institutum rite perficere volumus, nam si is qui
negotium hoc fortiter instituit, tamen sæpe de-
fiscitur , quid faciet qui vel rarò vel minus
constanter id instituit ? Variis equidem mo-
dis contingit desertio instituti nostri , & velle-
vis exercitationum, omissio, vix sine aliquo dis-
pendio accidit. Justorum institutum à Dei
favore, non ab ipsorum sapientia pendet , ei-
demque semper confidunt, quicquid aggredi-
untur. Nam homo instituit illud quidem , sed
Deus decernit : nec penes hominem est ipsius
actionis eventus. Si quando vel pietatis vel fra-
ternæ utilitatis causa omittitur consveta institu-
ti exercitatio, eadem faciliè revocari potest. Sin
animi tardio aut negligentia faciliè intermittitur,
id verò nec parum vitiosum est, & detrimentum
parit. Conamur licet pro virili, tamen faciliè de-
linquamus in multis. Semper tamen certi ali-
quid statuendum est præsertim contra illa , quæ
nos præ cæteris impediunt. Exteriora nobis pa-
riter ac interiora scrutanda componendaque
sunt, quippe quæ utraq; ad profectum necessa-
ria sint. Quòd si continenter à te ipso rationem
exigere non vales, id saltem interdum, & ad mi-
nimum

nimum semel quotidie facito, manè videlicet aut vespere. Mane quid sis acturus institue vespere, vespere discute mores tuos, qualis hodie verbis, factis, cogitationibus fueris: nam in his sæpius forsitan & Deum & homines offendisti. Accinge te, sicuti virum deget, contra diabolicam nequitiam: frenato gulam, & omnem carnis cupiditatem facilius frenabis. Nunquam planè ociosus esto, sed semper aut legito, aut scribito, aut orato, aut cogitato, aut utilitatis aliquid in commune procurato. Corporis exercitationibus utendum est non sine discrimine, nec omnibus æquè adhibendæ sunt. Quæ communia non sunt, ea foris ostendi non debent: nam domi tutius exercentur priuata. Cavendum tamen ne ad publica piger, ad privata sis promptior: quin officio mandatisque defunctus, si quid amplius vacat, te tibi reddito, ut tua postulat religio. Non omnes eandem habere possunt exercitationem: quin aliæ aliis magis conveniunt. Neque non pro temporum ratione diversæ placent exercitationes, ut aliæ festis aliæ profestis magis adlubescant, aliis nobis opus est tempore certaminis, aliis tempore pacis & quietis, alia dum dolemus libet cogitare, alia dum læti sumus in Domino. Sæpe renovandæ sunt exercitationes bonæ, præsertim festis diebus, quasi tunc ex hac vita migraturi, & ad æterna festa perventuri simus, itaque sollicitè nos præparare debemus eo tempore, & religiosiores præbere, omniaque præcepta severius

verius exequi, tanquam laboris nostri præmium brevi à Deo percepturi. Quòd si dilatum fuerit, credamus nos minus bene præparatos, & adhuc indignos tanta gloria certo tempore nobis exhibenda, demusque operam ut nos diligentius ad exitum præparemus. Beatus ille servus (inquit Evangelista Lucas) quem Dominus, quum venerit, vigilantem invenerit, hoc certò scitote, futurum, ut eum suis omnibus bonis præficiat.

De amore solitudinis & silentii.

CAP. XX.

QUære aptum tempus vacandi tibi, & de Dei beneficiis frequenter cogita, omis-
sisque curiosis, ejusmodi argumenta le-
ctitato, quibus magis stimuletur animus, quàm occupetur. Nam si te ipsum à superfluis locutionibus otiosisque circuitionibus, nec non à rebus novis & rumoribus audiendis abstraxeris, tempus invenies longum & satis aptum bonis cogitationibus exercendis. Sic maximi sanctorum humana consortia, ubi poterant, vitabant, & Deo seorsum vivere malebant. Dixit quidam: Quoties inter homines fui, minor homo redii, hoc quippe sæpius experimur, quando diu confabulamur. Facilius est omnino tacere, quàm verbis modum non excedere, facilius domi latere, quàm foris à peccando se satis continere. Igitur qui ad interiora & spiritualia contendit, oportet ut turbam cum Jesu declinet.

clinet. Nemo tutò prodit, nisi qui libenter latet, nemo tutò præst, nisi qui libenter subest, nemo tutò præcipit, nisi qui libenter obedire didicit, nemo tutò gaudet, nisi qui animi bene sibi conscii testimonium habet, nemo tutò loquitur, nisi qui libenter tacet. Sempertamen sanctorum hominum securitas plena timoris Dei extitit : nec eo minus solliciti & animo demissi fuere, quia magnis virtutibus divinisque donis pollerent. At improborum securitas ex superbia & fastu oritur, tandemque in sui deceptionem vertitur. Nunquam tibi tuta omnia in hac vita promittito, quamvis religiosus & rerum humanarum contemptor esse videaris. Sæpe accidit, ut qui hominum opinione cæteris essent meliores, si gravius periclitati fuerint ob nimiam confidentiam, quò fit ut multis sit utilius, non carere prorsus tentationibus, sed sæpius impugnari, ne fortè nimium securi superbia efferantur, nève ad externas consolationes licentius declinent. Quòd si quis perituram lætitiā nunquam quæreret, si cum mundo nunquam rem haberet, ô quam bene sibi consciū animum perpetuò retineret. Si quis omnem vanam sollicitudinē amputaret, & duntaxat salutaria ac divina cogitaret, suamque spem omnem in Deo collocaret, ô quanta is pace & quiete frueretur ? Nemo dignus est cælesti consolatione, nisi qui se diligenter in animi sancta stimulatione exercuerit. Quam quidem

dem animi stimulationem si vis adipisci, intra in cubiculum tuum, hominumque tumultus excludito, sicut habet scriptum illud: Hæc in cubilibus vestris taciti cogitate. In cella sapius invenies quod foris amittes, cella perpetua dulcescit: eadem negligentius habitataedium gignit. Quod si eam principio tuæ ad frugem reversionis ritè frequentaveris, teque intra eam continueris, fiet tandem ut tibi nihil jucundius, nihil solatii plenius sit. In silentio & quiete proficit religiosus animus, & discit abditaliteratum. Ibi invenit flumina lacrymarum, quibus singulis noctibus se se lavet & mundet, ut conditori tuo tanto familiarior fiat, quanto longius degit ab omni hominum tumultu. Igitur qui se à notis & amicis abstrahit, hunc adit ipse Deus cum suis sanctis angelis. Præstat latere, & sui curam gerere, quam seipso neglecto vel miracula edere. Laudabile est homini religioso, rarò foras ire, fugere videri, nolle etiam homines videre. Cur vis videre quod non licet habere? perit & Mundus, & ejus cupido. Alliciunt voluptatis cupiditates ad spatium, sed postquam hora præterit, quid tu inde nisi gravem pœnitentiam, animique vagationem reportasti? Lætus exitus sæpe tristem redditum parit: & læta vigilia serotina triste matutinum facit. Sic omne carnale gaudium blandè intrat, sed ad extremum mordet & perimit. Quid potes alibi videre, quod hîc non videas?

C

ecce

ecce tibi cœlum & terram, & omnia elementa: nam ex istis omnia sunt facta. Quid usquam videre possis, quod diu sub sole duret? Satiatum iri te forsitan speras, sed id nunquam assequeris. Si vel omnia videres præsentia, quid illa essent nisi inanis aspectus? Attole in sublime ad Deum oculos, & peccatorum delictorumque tuorum veniam ora. Vana vanis relinque: tui intende, quæ tibi præcipit Deus. Conclude te intra ostium tuum, & dilectum tibi Jesum ad te vocato. Cum eo in cella maneto: nam alibi nusquam pacem tantam invenies. Si non exivisses, nec rumorum quicquam audivisses, facilius in bona pace permanisses, nunc postquam nova interdum audire delectat, efficitur ut animi sit ferenda perturbatio.

De stimulando animo. CAP. XXI.

SI quid proficere vis, Dei metum retine, ne nimis liber esto, sed sensus tuos omnes sub disciplina cohibe: ne te futili lætitiæ dedideris. Adde te ipsum animi stimulationi, & religionem invenies. Invenit ejusmodi stimulatio multum boni, quod socordia citò perdere consuevit. Mirum est, posse quenquam unquam verè lætari in hac vita, qui suum exilium & tot animæ suæ pericula consideret atque perpendat. Ob animi levitatem, & in delictis nostris socordiam non sentimus animi nostri dolores, sed sæpe leviter ridemus, quum meritò flere deberemus. Nulla usquam vera libertas
bona.

bonaque lætitia est, nisi in Dei metu cum animo bene sibi conscio. Felix qui potest abjectis occupationum omnium impedimentis, uni sese dedere animi stimulationi. Felix qui à se abdicat quicquid ejus conscientiam polluere aut gravare potest. Certa viriliter : consuetudo consuetudine vincitur. Si animum induxeris cæterorum negotiis te non immiscere, ipsi se vicissim tuis non immiscebunt. Alienum negotium tibi accersere, aut te majorum causis implicare noli. In te primum coniectos semper oculos habeto, teque ipsum in primis præ omnibus tibi charis commonefacito. Si hominum favore cares, ægrè id ferre noli, sed illud graviter ferto, quòd te non satis bene geras & circumspèctè, sicuti Dei cultorem & verè religiosum hominem vivere decet. Est homini sæpe & utilius & tutius in hac vita non multas habere consolationes, præsertim humanas: nam divinas quidem quòd aut non habemus, aut rarius sentimus, ipsimet in culpa sumus, qui nec animi quæramus aculeos, nec vanas & externas consolationes omnino abiciamus. Cognosce te non solum indignum divina consolatione, verum etiam dignum magna miseria. Si quando stimulatur homo animi veris igniculis, fit ut gravis ei & amarus sit totus orbis. Bonus homo magnas satis invenit causas dolendi atque flendi. Sive enim seipsum considerat, sive alterum intuetur, videt neminem huc sine calamitate

mitate vivere: quantoque sese acrius considerat, tanto gravius dolet. Sunt autem iusti doloris & stimulationis animi causæ peccata vitiaque nostra, quibus ita involuti jacemus, ut rarò cœlestia contemplari valeamus. Si frequentius de morte tua, quàm de vitæ longitudine cogitares, non dubium est quin ardentius te ipsum corrigeres. Rursus si futuros Orci cruciatus animo perpenderes, libenter opinor laborem doloremque tolerares, nec severitatem ullam reformidares. Sed quia in animum illa non demittuntur, & blanditias adhuc amamus, fit ut frigidi admodum pigrique esse pergamus, sæpe spiritus inopia laborantes, unde fit ut tam facile conqueratur miserum corpus. Quamobrem summissè Deum orato, ut in animo tuo divinos excitet igniculos & cum vate illo sic dicito: *Pasce me Domine pane lacrymarum, meamque potionem fletu dilue.*

Humana miseria consideratio.

CAP. XXII.

Miser es ubicunque sis, & quocunque te ver-
tas, nisi ad Deum te convertas. Quid tur-
baris, quia tibi res ex animi sententia non succe-
dunt? quis est cui ex voto cadant omnia? non
ego, non tu, non ullus mortalium: nemo,
inquam, usquam est omnis calamitatis & ango-
ris expers, non rex, non ipse Papa. Cujus
est igitur omnium optima conditio? nimirum
ejus, qui Dei causa aliquid pati valet. Dicti-
tant

tant plerique imbecilles & infirmi : En quàm beatam vitam vivit ille : quàm dives , quàm potens , quàm excelsus , quàm magnus , quàm pulcher ? Sed intueri in cœlestia bona , & videbis ista omnia hujus vitæ bona nihili esse , quippe , prorsus incerta atque onerosa , ut quæ nunquam sine sollicitudine & timore possideantur. Non in hujusmodi bonorum copia sita est hominis felicitas : quin ei satis esse debet mediocritas : nam in terris vivere verè miseria est. Quo se quisque diviniorem esse cupit , eo fit ei hæc vita acerbior , quanto videlicet humanæ vitiositatis delicta & magis sentit , & clarius videt. Nam comedere , bibere , vigilare , dormire , quiescere , laborare , cæterisque naturæ necessitatibus subjacere , verè magna miseria & calamitas est homini religioso , qui se ab omni peccato immunem liberumque esse cupit. Graviter enim premitur homo corporis necessitatibus in hac vita : ideoque suppliciter orat ille vates ab hisce liberum se fieri his verbis : Ex necessitatibus meis erue me , Domine.

Sed miseri sunt , qui miseriam suam non norunt , & insuper miseriores , qui miseriam hanc mortalemque vitam diligunt , quam quidem usque adeò amplectuntur nonnulli [cum tamen ab ore ac sollicitudine sua vix etiam necessaria ibi comparare queant] ut si semper hîc vivere iceret , Dei regnum nihil curarent. O insani & unimo infidentes , qui ita altè demersi jacent in

terris , ut nihil nisi carnalia in animo habeant miseri, & tandem aliquando non sine cruciatu sensuri quàm vile , quamque nihili fuerit quod adamarunt. At sancti illi Dei homines, & religiosi omnes , quotquot Christo amici fuerunt, non in ea intuebantur quæ carni placerent, aut quæ hoc tempore florent, sed ad æterna bona omni spe & aviditate anhelabant, totoque animo ad suprema & inaspectabilia ferebantur, ne aspectabilium amore traherentur ad infima. Noli, frater, desperare de proficiendo in rebus divinis, adhuc habes tempus & horam : cur procrastinas institutum tuum ? Surge, & protinus incipe , atque ita ratiocinare : Nunc agendi, nunc pugnandi, nunc vitam corrigendi tempus est , in rebus duris & adversis tempus est promerendi. Per ignem & aquam transeundum est, antequam venias in refrigerium , nisi ipse tibi vim feceris , vitium non superabis. Quandiu fragile corp⁹ hoc gerimus, sine tædio & dolore vivere nequimus. Cuperemusequidem ab omni miseria quietem habere: sed quia peccato perdidimus innocentiam, amisimus etiam veram beatitudinem. Itaque tenenda nobis patientia est , & Dei expectanda misericordia, donec prætereat injustitia, & hæc mortalitas absorbeatur à vita. O quanta est humana fragilitas, quæ semper prona est ad vitia ? Hodie confiteris peccata, & eadem confessus cras iterum perpetras. Nunc cavere statuis, & post unum horam

horam sic agis quasi non statuisses. Itaque magna nobis causa est nos ipsos deprimendi, & nihil unquam præclari de nobis sentiendi, qui tam fragiles sumus & instabiles. Citò etiam negligentia perdi potest, quod multo labore vix tandem Deo quæsitum est : quid nobis ad extremum futurum est, qui tam maturè tepescimus? Væ nobis si sic ad quietem contendimus, quasi jam pax sit & securitas, cum nullum adhuc veræ sanctitatis vestigium appareat in moribus nostris. Enimverò nobis opus est, ut de integro cœu tyrones, ad bonos mores instruamur, si qua fortè spes est reditutionis ad frugem, & majoris rerum divinarum profectus.

De meditatione mortis. CAP. XXIII.

CUM tam citò finienda sit vita tua, vide quid agas. Hodie viget homo : cras nusquam extat : & ex hominum oculis sublatus, mox etiam ex eorundem memoria elabitur. O hebetudinem & duritiam cordis humani, quod solum præsentia cogitans, futuri rationem non habet ! Sic te in omni & opere & cogitatione gerere debes, quasi statim sis moriturus. Si tibi bene conscius esses, non multum mortem timeres. Præstat peccata cavere, quàm mortem fugere. Si hodie paratus non es, quomodo cras eris? Incerta est crastina dies : qui scis an in crastinum victurus sis? Quid prodest diu vivere, quando tam parum corrigimur? Enimverò longa vita non semper corrigit hominem:

quin sæpe culpam auget. Utinam vel unum diem bene nos gessimus in hac vita. Multi annos computant correctionis sui, cum sæpè sit ejus fructus exiguus. Si mori formidolosum est, forsitàn periculosius est diutius vivere. Beatus qui mortis horam semper habet ob oculos, seque ad moriendum quotidie componit. Si quando hominem mori vidisti, cogita eadem tibi via migrandum. Manè dubitato an ad vesperum sis perventurus: itemque vespere matutinum tibi polliceri ne audeto, semperque ita paratus esto, itaque vivito, ut nunquam te imparatum mors inveniat. Multi subito nec opinantes moriuntur: nam qua hora non putatur Filius hominis venturus est. Ubi extrema illa hora venerit, multo aliter sentire incipies de omni antea cta vita tua, graviterque dolebis quòd tam negligens fueris & remissus. O felicem & prudentem, qui nunc in hac vitalis esse conatur, qualis in morte inveniri optat. Magnam enim spem affert feliciter moriendi perfectus Mundi contemptus, ardens cupido in virtute proficiendi, amor disciplinæ, labor pœnitentiæ, promptus animus ad obediendum, abnegatio sui & cujuslibet calamitatis tolerantia ob amorem Christi. Multa tu dum sanus es, rectè facere potes: ægrotus nescio quid poteris: nam pauci morbo emendantur, & qui vitæ correctionem in illud tempus differunt, rarò sancti fiunt. Præstat mutare, &

re, & ita nunc, quando licet, vivere, ut postea
vivas in perpetuum. Alioquin si occasionem
hanc de manibus amiseris, postea serò requi-
res, eritque cùm vel unum diem aut horam ad
te corrigendum fortasse frustra cupies. Quare
age, perpende quanto te periculo eximere,
quantum malum vitare possis, si semper cautus
mortem prospicias. Da operam ut nunc ita vi-
vas, ut in hora mortis gaudeas potius quàm ti-
meas. Disce nunc mori mundo, ut tunc cùm
Christo vivas. Disce nunc omnia contemne-
re, ut tunc liberè possis ad Christum pergere.
Subige nunc corpus tuum vitæ correctione, ut
tunc certam habeas confidentiam. Ah stulte,
quid te diu victurum cogitas, cùm nullum hîc
diem habeas exploratum? quàm multi decepti
sunt, & ex insperato ex corpore extracti? Quo-
ties dici audivisti: Ille gladio cecidit: ille aqua
submersus est: ille ex alto delapsus cervicem
fregit: ille cibum capiendo obriguit: ille luden-
do vitam finivit: alius igne, alius ferro, alius pe-
ste, alius latrocinio periit: ita est omnium finis
mors: præteritque quasi umbra quædam vita
hominum. Quis tibi post mortem, si in vita oc-
casionem amiseris, opem feret? nunc, nunc a-
gendi tempus est, dum & mortis horam igno-
ras, & in futurum tutò tibi prospicere potes.
Dum tempus habes; congere tibi divitias im-
mortales, & nihil nisi de salute tua cogita, so-
lasque res divinas cura. Nunc tibi amicos para,
qui

qui te vita defunctum accipiant in æterna tabernacula. Præbe te in terris peregrinum & hospitem, ad quem mundi negotia nihil pertineant. Animum habe liberum, & ad Deum sursum erectum, quum durabilem civitatem hinc non habeas. Illuc preces & gemitus quotidianos cum lacrymis dirige, ut spiritus tuus post mortem ad Deum feliciter migret.

De ultimo Dei judicio & pænis peccatorum.

CAP. XXIV.

OMnibus in rebus finem intuere, & quomodo coram severo illo iudice staturus sis, cui nihil occultum est, qui nec muneribus placatur, nec injustas excusationes admittit, sed ex æquo & vero judicat. Miserum te & insipientem, ô homo nocens, quid Deo respondebis, omnia peccata tua scienti, qui irati hominis vultum interdum reformidas? Cur tibi non prospicis in illius iudicii diem, in quo nemo ab altero excusari defendive poterit? quippe quisque sibi satis magno erit oneri. Nunc fructuosus est tuus labor, nunc fletus acceptus, nunc exaudiri potest gemitus: & Deum pacare dolor, ac te expiare. Et omnino salutariter expiatur patiens homo, qui dum afficitur injuria, magis ob alterius improbitatem, quàm ob illatam sibi injuriam dolet, & adversariis suis veniam libenter orat, eisque ex animo ignoscit, & ipse ab aliis veniam petere non cunctatur, & facilius
mife-

miseretur , quàm irascitur , & ipse sibi vim frequenter facit, carnemque suam spiritui prorsum subicere conatur. Atque hæc non differenda , sed in hac vita , & quidem primo quoque tempore præstanda sunt. Sed nos profectò intemperato amore carnis nosipsum decipimus. Enimvero quid aliud comburet ignis ille, quàm peccata ? Quanto tu tibi magis nunc indulseris , carnique obsequutus fueris, tanto postea graviores pœnas lues, tantoque copiosorem, materiam tibi ad ardendum congereris. Nam in quibus quisque peccaverit , in iisdem pro peccati magnitudine punietur. Ibi segnes ardentibus stimulis pungentur. Ibi epulones acri fame & siti cruciabuntur. Ibi luxuriosi & voluptatum amatores ardenti pice fœtidoque sulphure perfundentur. Ibi invidi rabiosorum canum ritu ululabunt , denique nullum vitium non afficietur suo cruciatu. Ibi superbi omni probro obruentur , & avari miserrima egestate vexabuntur. Quid multis ? ibi erit una hora gravior in pœna , quàm hîc longum tempus in corrigendis moribus. Ibi nulla requies, nulla miseris consolatio : at hîc est interdum doloris intercapedo, & amicorum demulcet consolatio. Quamobrem esto nunc sollicitus & ob peccata tua doleto, ut in illius iudicii die tutus gaudeas cum beatis. Tunc enim stabunt iusti magna cum constantia adversus eos à quibus vexati fuerint & oppressi. Tunc sedebit ad iudicandum

dum qui nunc se demissè subjicit hominum judicio. Tunc magna erit fiducia pauper & modestus, paventibus undique superbis. Tunc videbitur sapiens in hac vita fuisse, qui pro Christo didicit stultus & despectus esse. Tunc erit toleratæ patienter miseræ jucunda recordatio, cum interea injusti omnes obmutescant. Tunc gaudebunt omnes religiosi, mœrentibus omnibus irreligiosis. Tunc magis exultabit antea vexatus homo, quàm si in perpetuis fuisset nutritus deliciis. Tunc splendet habitus vllis, & obscurabitur vestis subtilis. Tunc magis laudabitur pauperculum domicilium, quàm nunc inauratum palatium. Tunc plus juvabit constans patientia, quàm universa mundi potentia. Tunc magis extolletur simplex obedientia, quàm hominum omnis astutia. Tunc hominem magis exhilarabit munda & bene sibi conscia mens, quàm docta philosophia. Tunc pluris erit contemptus divitiarum, quàm mortalium omnium thesaurus universus. Tunc tibi majus solatium afferet religiosa precatio, quàm esus cupediarum. Tunc magis gaudebis servato silentio, quàm longa confabulatione. Tunc plus poterunt sancta tua opera, quàm copiosa eloquentia. Tunc jucundior erit severa vita, & corrigendorum morum asperitas, quàm omnis terrena delectatio. Quocirca discce nunc parva pati, ut tunc à gravioribus liberari queas. Hic antè explorato, quid postea perferre possis. Quòd si nunc tantula tole-

tolerare nequis , qui poteris tunc æternos perferre cruciatus ? Et si nunc tantulus dolor impatientem efficit , quid gehenna tunc faciet ? Nam profectò bis beatus esse non potes, ut & in hac vita voluptatibus fruires , & postea in cœlo cum Christo regnes. Jam verò finge te in hodiernum usque diem in perpetuis honoribus & voluptatibus vixisse , quid tibi ista omnia profuissent, si te è vestigio mori contingeret ? Nonne vides omnia esse vana, excepto amore cultuque solius Dei ? Qui enim Deum toto corde amat, is nec mortem, nec supplicium, nec iudicium, nec Orcum metuit : quippe cum perfectus amor tuum ad Deum aditum præbeat. At quem adhuc peccare delectat, non mirum est, si is mortem iudiciumque timet. Expediit tamen si te à malo nondum amor revocat, ut saltem gehennæ timor coerceat. Qui verò Dei timorem repudiat, is diu in bono stare non potest, sed in diaboli laqueos incurrit.

De ferventi correctione totius vitæ nostræ.

CAP. XXV.

ESto in Dei cultu vigilans & diligens , & cui rei destinatus, cur mundum reliqueris, frequenter cogitato: nimirum ut Deo viveres , & divinus homo fieres. Igitur ad proficiendum ardens esto, nam brevi laborum tuorum mercedem accipies , nec ullus deinceps timor erit: aut dolor in tuis finibus. Paululum nunc labora-

borabis, & magnam requiem, imo perpetuam lætitiā invenies. Si in agendo fidelem te navumque perpetuò præstiteris, Deus procul dubio fidelem se & locupletem præbebit in remunerando. Spem bonam foveto assequendæ palmæ: sed vitanda securitas est, ne torpeas aut insolescas. Exstitit aliquando quidam, qui inter metum & spem anxius fluctuans, inter precandum supplex sic dicebat: O si me perseveraturum esse certò scirem! ac protinus intus in animo audivit divinum hoc responsum: Quid tum postea, si scires, vellēs facere? Agedum, fac quod facere velles, & de perseverantia dubitare noli. Hac ille consolatione confestim confirmatus, divinæ se commisit voluntati: ita cessavit anxia fluctuatio, noluitque curiosè vestigare, quid sibi futurum foret, sed potius inquirere studuit, quidnam Dei voluntati conveniens, eidemque acceptum ac perfectum esset, ad opera laudabilia inchoanda atque perficienda. Spem habeto in Domino, & rectè facito, inquit Vates, & terram incoles, ejusque opibus pascēris. Unum est quod multos à profectu & ferventi sui correctione retrahit, horror difficultatis, laborque certaminis. Enimverò illi maximè præ cæteris in virtutibus proficiunt, qui gravissima quæque & sibi maximè adversantia, viriliter vincere nituntur. Nam tanto magis proficit quisque, Deique gratiam tanto obtinet ampliorem, quanto magis seipsum

psum vincit, & divina ope subigit. Sed non in omnibus tantundem inest ad vincendum & moriendum : verum qui hoc opus diligentius urgebit , is valentior erit ad promovendum (etiam si plura sint ei toleranda) quam alius bene alioquin moratus , sed ad virtutes segnior. Sunt autem duo potissimum, quæ ad sui correctionem multum conducunt , videlicet ab iis se violenter abstrahere, in quæ propensa est natura vitiosa , & in id bonum summo studio incumbere, quo indigeas. Illa quoque in primis tibi cavenda vincendaque sunt, quæ tibi in aliis maximè & frequentissimè displicent. Fac ut tibi ex usu sint omnia : ut si qua rectè factorum exempla videas aut audias , ad imitandum accendaris : si aliquid vituperandum animadvertas, caveas ne ipse idem facias : aut si quando fecisti, citò te ipsum corrigere studeas. Sicut tu in alios , sic alii vicissim in te coniectos habent oculos. Quàm jucundum & dulce est videre ardentem & religiosum hominem Christianum , bene moratum , & Christi disciplinæ obtemperantes? Rursumque quàm triste & grave est videre intemperanter viventes, & ea ad quæ vocati sunt non exercentes? Quàm detrimentosum est ordinis tui institutum deserere, & ad ea quæ tibi mandata non sunt, inclinare? Memor esto instituti tui , & imaginem tibi propone crucifixi Christi, teque pudeatejus inspecta vita, qui hactenus in illo imitando diligentior


rem

rem te non præstiteris, cum tamen Christianam vitam jam diu professus fueris. Certè religiosus homo, si se attentè & addictè in sanctissima illa Jesu vita & supplicio exercet, omnia sibi utilia & necessaria ibi abundè inveniet, nec opus est ut extra Jesum aliquid melius quærat. Si Jesus crucifixus nobis in animum veniret, quàm citò & satis docti evaderemus? Ardens homo Christianus jussa faciliè capeffit atque fert: idem si negligens & tepidus est, calamitatibus aliis super alias premitur, & undique angoribus vexatur, quippe qui & interiori consolatione careat, & exteriorè quærere vetetur. Et omnino quisquis Christi disciplinæ limites excedit, is gravi ruinæ subjectus est: & qui laxiorem & remissiorem vitam quærit, is semper angitur, quia semper aliquid est quod ei displiceat. Propone tibi potius sanctorum illorum Christi apostolorum & discipulorum severam illam & religionis plenam vitam, & eos tibi imitandos ducito, ac de Dei erga te benevolentia, quin tibi ad illa vires libenter concessurus sit, dubitare noli. Hac vita, virium speique plenè evades: hac via, cœlesti passu sic illuc contendes, ut humana omnia despicias.

Atque utinam nihil faciendum incumbere, quàm ut Deum toto corde & ore laudaremus, ejusque præcepta exequeremur. Utinam mundanis negotiis soluti sola divina, summa ope totisque viribus curaremus. Nam postquam

quam eò pervenit homo , ut à nulla re mortali solatium quærat, tum demum fit, ut ei Deus verè sapere incipiat: ut omnem rerum eventum boni consulat, nec rebus secundis lætitia effertur, nec afflictis angatur , sed sese totum Deo confidenter committat , qui est omnia in omnibus , cui nihil perit aut moritur , sed omnia vivunt , & ad nutum incunctanter inserviunt. Semper finem spectato , & perditum tempus nunquam reversurum memento. Virtutem quidem sine sollicitudine & diligentia nunquam assequêris. Quòd si tepesces, in deterius ferentur res tuæ : si ardenti animo operi incumbes, altam pacem invenies, leviolemque laborem senties, tum ob Dei erga te favorem, tum ob tuum virtutis amorem. Homo ardens & diligens ad omnia paratus est. Majoris est laboris resistere vitiis & animi perturbationibus, quàm corporis insudare laboribus: & qui parva delicta non vitat, is paulatim labitur in majora. Gaudebis semper vespere , si diem impenderis fructuosè. Tibi ipsi invigila, te ipsum excita & admone, te ipsum noli negligere, quicquid tandem aliis fiat. Tantum proficies, quantum ipse tibi vim intuleris.

FINIS LIBRI PRIMI.



D

LIB. II.



LIBER SECVNDVS.

DE

INTERIORE HOMINIS
VITA.

CAP. I.



REGNUM Dei intus in vobis est, inquit Dominus. Converte te toto animo ad Dominum, relicto hoc misero mundo, & inveniet animus tuus requiem. Disce exteriora contemnere, & interioribus te addicere, & videbis regnum Dei in te venire. Est enim regnum Dei pax & gaudium in Spiritu Sancto, quod non datur impiis. Veniet ad te Christus, suam tibi consolationem exhibiturus, si ei se dignam intus paraveris mansionem. Intus enim situs est omnis ejus splendor & pulchritudo, ibi libenter versatur. Frequens illi itio est ad hominem, internum, dulcis fermocinatio, grata consolatio, multa pax, familiaritas singularis. Agendum anima fidelis, præpara huic sponso cor tuum, quò ad te venire, & in te habitare dignetur.

tur. Sic enim dicit: Si quis me diligit, is dicta mea exequetur, & ego paterque meus ad eum veniemus, & apud eum degemus. Da ergo Christo locum, cæteris omnibus ingressum ad te denegans: illum si habebis, dives eris & copiosus. Ipse tibi prospiciet, tuaque omnia ita fideliter procurabit, ut in hominibus te spem habere nihil sit opus. Homines enim citò mutantur, velociterque deficiunt: at Christus in perpetuum manet, suisque constanter adest ad extremum. Non est neque magna fiducia collocanda in homine fragili & mortali, etiam si utilis sit & charus: neque magnoperè dolendum, si is interdum adversetur & contradicat. Qui hodie à te sunt, iidem cras ut adversentur fieri potest, & contrà, quippe qui sæpè ut aurà verstantur. Tuam omnem fiduciam in domino collocato, facitoque ut hunc timeas, hunc ames. Ipse tuam causam probè aget, & quàm optimè componet. Non habes hic durabilem civitatem, & ubicunque es, externus es & peregrinus, nunquam requiem adepturus, nisi cum Christo intimè conjunctus. Quid hic circumspecis: cum non sit iste locus tuæ quietis? In cœlestibus debet esse habitatio tua, suntque tibi terrestria omnia obiter aspicienda, prætereunt omnia, neque non tu itidem cum eis. Sic ea aspice ut eis non adhærescas, nec captus pereas. Ad supremum Deum ferantur cogitationes tuæ, Christumque precibus sine intermissione in-

bis. Ipse tui liberandi tempus novit, ideoque te illi debes concedere. Dei est adjuvare, & hominem ab omni probro liberare. Sæpe multum prodest ad nos magis magisque deprimendos, vitia nostra ab aliis sciri atque argui. Dum se homo ob vitia sua demittit, facile alios placat, parvoque negotio sibi irascentibus satisfacit. Demissum hominem Deus protegit & liberat: ad demissum sese demittit: demisso multa largitur, eumque post ipsius depressionem ad gloriam extollit: demisso arcana sua patefacit, eumque suaviter ad se trahit & invitat. Demissus licet contumelia ignominiaque affectus, tamen pacato est animo, quippe Deo nixus, non mundo. Noli te quicquam profecisse existimare, nisi te omnium infimum esse sentias.

De bono & placido homine.

CAP. III.

Tlbimet primo pacem concilia: ita demum cæteros pacificare poteris. Plus prodest homo placidus, quam bene doctus. At contentiosus etiam bonum in malam partem trahit, & malum facile credit. Bonus & placidus homo omnia in bonam partem convertit. Qui pacato est animo, is de nullo sinistrè suspicatur: at qui sua sorte contentus non est, & variis suspicionibus agitur, is nec quiescit ipse, nec alios quiescere patitur, dicit sæpe quod non debet,

bet, & omittit quod fieri expediret. Quid aliorum sit officii considerat, ipse sui negligens. Quare tuum officium in primis curato : ita demum alterius quoque officium merito curabis. Tu facta tua excusare ac tolerare probe nosti, & aliorum excusationes non admittis. Aequius esset, ut te ipsum accusans, alterum excusares. Si ferri vis, ferto tu vicissim alterum : ac vide quam procul absis adhuc à vera charitate atque modestia, quæ nulli, nisi sibi metipso, indignari irascive novit. Cum bonis & mansuetis rem habere haud magnum est, quippe cum id omnibus naturaliter jucundum sit, & pacem quisque exoptet, sibi que consentientes plus cæteris diligat. Sed cum duris & perversis, nobisque adversantibus aut malè moratis, pacatè posse vivere, hoc verè magni fortisque viri est, & magna laude digni. Sunt autem, qui & ipsi secum & cum aliis pacem colunt, sunt qui nec ipsi pace fruuntur, nec alios eadem frui sinunt, graves illi quidem cæteris, sed sibi metipsis semper graviores. Sunt & qui tum seipsos in pace retinent, tum alios ad pacem reducere student. Cæterum omnis pax nostra in hac misera vita, potius in modesta tolerantia ponenda est, quàm in non sentiendò adversa. Quo quisque magis adversa pati novit, eo majore pace fruitur, idemque & victor est sui, & dominus Mundi, & amicus Christi, & hæres cæli.

De mentis sinceritate, intentionis & simplicitate.

CAP. IV.

DUabus alis homo supra terrestria attollitur, simplicitate videlicet & sinceritate. Simplicitas intentionis, sinceritas affectionis est: illa Deum intendit, hæc apprehendit & gustat. Nulla te bona actio impedit, si animum habebis ab omni intemperato affectu liberum. Si nihil aliud quam Dei voluntatem, & alterius utilitatem intendes & quæres, fruëris animi libertate. Si rectus esset animus tuus, esset tibi universarum rerum natura speculum vitæ, & liber sanctæ doctrinæ, nam nulla tam parva, tamque vilis res est, quæ Dei bonitatem non repræsentet. Quod si bonum purumque animum haberes, omnia sine impedimento videres, & probè perciperes. Purus enim animus & cælum penetrat & Orcum: ac qualem quisque animum habet, sic & de rebus externis judicat. Si usquam gaudium est, eo fruitur puri cordis homo: rursus si usquam est calamitas & angustia, eam melius novit nemo, quam animus sibi malè conscius. Sicut ferrum coniectum in ignem rubiginem amittit, totumque candens efficitur: sic homo ad Deum se totum convertens, torporem exuit, & in novum hominem mutatur. Tepescens homo vel tantulum laborem refugit, & externam ambit consolationem, idem si seriò seipsum vincere,

ere , divinaque via viriliter ingredi cœpit, fit
ut quæ prius gravia sentiebat , eadem nunc le-
via ducat.

De sui consideratione. CAP. V.

NObis ipsis nimis credere non debemus:
nam sæpe & dotes nobis & sensus de-
est. Exiguo lumine præditi sumus , &
dipsum negligentia faciliè amittimus. Sæpe
etiam tam cæco esse nos animo non adverti-
mus : sæpe & peccamus , & peccatum insu-
per pejus excusamus , & interdum cupiditate
perciti , Zelum putamus. In aliis parva
reprehendimus : ipsi nostra majora præteri-
mus. Quæ ab aliis nobis inferuntur, ea facillimè
sentimus & magni pendimus : quid à nobis fe-
rant alii, non advertimus. Enimverò si quis sua
bene riteque perpenderit , is cur de altero gra-
vius judicet causam non habebit. Interior ho-
mo sui ipsius curam omnibus curis anteponit: &
qui sibi metipso diligenter intendit , is faciliè de
altero tacet. Interior & religiosus nunquam
eris, nisi de altero filebis , & in te ipsum in pri-
mis intueberis. Si tibi & Deo totus intendes,
parum te movebunt, quæ extrinsecus accident.
Ubinam es, dum ipse tibi præsens non es ? aut
postquam omnia percurristi , quid te neglecto
profecisti? Ut veram pacem & concordiam adi-
piscaris , necesse est ut omnibus postpositis te
solum ob oculos habeas. Itaque & multum
proficies , si omni humana cura superfedebis:

& multum decresces, si quid humanum magnificies. Nihil altum, nihil magnum, nihil gratum, nihil acceptum tibi sit, nisi quod aut planè Deus, aut Dei sit: à rebus quidem creatis quicquid solatii affertur, id totum inane ducito. Dei amans præ Deo despicit universa. Solus Deus æternus, immensus, implens omnia, solatium est animæ, & vera cordis lætitia.

De bona conscientia lætitia:

CAP. VI.

Boni viri gloria in animi sibi bene conscii testimonio posita est. Esto tibi bene conscius, & perpetua fruëris lætitia. Bene sibi conscius animus, & plurima ferre potest, & inter adversa etiam exultare lætitia, at malè sibi conscius semper timidus est & inquietus. 'Suaviter requiesces, si te animus tuus non reprehendet. Noli lætari nisi cum bene feceris. Mali nunquam nec vera lætitia fruuntur, nec animi pacem experiuntur, quippe cum impii [ut ait Dominus] sint pacis expertes. Quòd si se in pace degere, nec malis invadendos, nec quenquam sibi nocere ausurum dixerint, eis ne credito, nam tanta in eos repentinè existet ira Dei, ut & in nihilum redigantur eorum actiones, & pereant cogitationes. De calamitate gloriari amanti difficile non est: sic enim gloriari, est de Domini cura gloriari. Brevis est gloria, quæ ab hominibus vel tribuitur vel accipitur, humana-

namque gloriam semper comitatur tristitia. Bonorum gloria in ipsorum conscientia, non in hominum ore sita est. Justorum læticia & de Deo & in Deo est, eorumque gaudium de veritate. Qui veram æternamque gloriam cupit, is temporariam non curat, qui verò temporariam aut quærit aut non ex animo contemnit, is omnino minus amat cœlestem. Magnam habet animi tranquillitatem, qui nec laudes nec probra curat. Facile sorte sua contentum pacatumque se præbet is, cujus conscientia munda est. Neque sanctiores si laudaris, neque deteriores si vituperaris: id ipsum es quod es neque major dici potes, quàm quantus Dei iudicio es. Si attendes quid intus in animo sis, non curabis quid de te foris loquantur homines. Homo vultum, Deus animum videt, homo facta, Deus consilia pensat. Semper benefacere, & seipsum parvipendere, modesti animi indicium est. Nullius humanæ rei solatium admittere, singularis sinceritatis & intimæ fiduciæ argumentum est. Qui nullum aliunde de se testimonium quærit, non dubium est, quin is se totum Deo commiserit. Non enim qui seipsum commendat, is probandus est, inquit Paulus, sed quem Deus commendat. Habere cum Deo negotium in animo, nec ulla affectione extrinsecus agitari, status est hominis interioris.

De Jesu super omnia amando.

CAP. VII.

BEatus qui intelligit quid sit Jesum amare, & seipsum propter Jesum contemnere. Ob diligendum relinquendus est dilectus, quandoquidem vult Jesus se solum amari supra omnia. Est humanarum rerum dilectio fallax & instabilis : at Jesu fidelis & durabilis. Humanæ rei qui adhæret, is cum caduco casurus est: at Jesum qui amplectitur, is in perpetuum consistit. Illum dilige, ejus amicitiam retine, qui omnibus discedentibus non sit te derelicturus, neque tandem perire passurus. Ab hominibus velis nolis aliquando divelleris: quocirca tum vivens tum moriens adhæresce Jesu, ejusque fide te committe, qui omnibus deficientibus solus tibi opem ferre potest. Est ille tuus amicus eo ingenio, ut alienum non admittat, sed solus animum tuum sibi vendicet, & qui in ejus folio, tanquam rex, sedeat. Quod si rerum omnium humanarum societatem abjicere scires, libenter tecum habitaret Jesus. Penè totum perditum invenies, quicquid extra Jesum in quemcunque impenderis. Noli confidere aut innitenti nutanti calamo: nam mortales omnes herba sunt, & eorum omnis gloria floris instar cadit. Facile decipieris, si duntaxat in hominum speciem oculos conjeceris, nam si in aliis solatium lucrumque tuum quæres,

is, sæpe detrimentum patiere. Si Jesum in omnibus quæres, Jesum utique invenies: sin te ipsum quæres, te ipsum equidem invenies, sed ad tuam perniciem. Nam ipse sibi quisque plus nocet, si Jesum non quærit, quàm universus oris, omnesque adversarii.

De familiari amicitia Jesu.

CAP. VIII.

U^M Jesus adest, bene se habent omnia, nec quicquam difficile videtur: eodem absente omnia dura sunt. Jesu in hominis animo non loquente, quævis consolatio parum habet momenti: eodem vel unum verbum loquente, mens sentitur consolatio. Sic Maria Magdalena ex loco surrexit in quo flebat, simulatque Magistrum adesse, ipsamque vocare ei Martha nuntiavit. Felix hora, qua Jesus à lachrymis vocatus ad gaudium spiritus. Quàm aridus & durus sine Jesu? quàm insipiens & vanus si cupis aliquid extra Jesum? majore profectò jactura, quàm si totum mundum perderes. Quid enim potest conferre mundus sine Jesu? Esse sine Jesu, acerbamors, cum eodem esse, vitadulcis est. Si tecum erit Jesus, nullus nocere poterit inimicus. Jesum qui invenit, bonum thesaurum invenit, vel potius summum bonorum: eundem qui amittit, nimium amittit. Quid dixi nimium? plus amittit, quàm si universum orbem amitteret.

Sine

Sine Jesu qui vivit, pauperrimus est : cum Jesu cui bene convenit, ditissimus est. Cum Jesu verari magnæ artis est, eundemque scire retinere, magnæ prudentiæ. Esto modestus & placidus, & tibi aderit Jesus. Esto religiosus & quietus, & tecum permanebit Jesus. Eundem facile fugaveris, ejusque gratiam amiseris, si ad exteriora deflexeris. Quòd si illum fugatum amiseris, ad quem tunc confugies ? aut quem tunc quæres amicum ? Sine amico quidem diu vivere non potes, quòd si Jesus tibi præ cæteris omnibus amicus non erit, desertus ab eo supra modum dolebis. Itaque stultè facis, si ulli alii confidis, aut alio lætaris. Præstaret vel totum orbem quàm unum Jesum habere in sensum. Quamobrem omnium qui chari sunt, sit Jesus longè dilectissimus, cæteri propter Jesum, Jesus propter seipsum diligatur. Solus Jesus Christus singulariter est amandus, qui solus amicorum bonus & fidelis inveniatur. Propter hunc & in hoc tibi chari esse debent tum amici tum inimici, idemque pro omnibus illis orandus est, ut eum omnes cognoscant & diligant. Nunquam cupias singulariter laudari & amari : hoc enim Dei est, qui parem non habet, neu velis ut cujusquam animus tibi sit addictus, neu tu in cujusquam amore occuperis : sed & in te & in omnibus bonis viris sit Jesus. Mundum, liberumque animum habeto, & ab omni humanarum rerum impedimento vacantem. Nam mundus
fis

sis oportet, & sincerum animum ad Iesum afferas, si vis vacare, & quam suavis sit Dominus videre. Et quidem eò nunquam pervenies, nisi ejus favore præventus & attractus, ut omnibus abolitis & abdicatis solus soli copuleris. Nam si Dei favor homini intervenit, fit ut nihil non possit homo: idem si discescit, pauper est & infirmus, & quasi tantum ad flagella relictus.

Quæ dum fiunt, dejici non debes, aut desperare, sed erga Dei voluntatem æquum animum gerere, omnesque casus tuos ad Iesu Christi laudem perpeti, nam hyemem sequitur æstas, & post noctem redit dies, & tempestati succedit magna serenitas.

De vacuitate solarii. CAP. IX.

NON arduum est, humanum contemnere solatium, dum adest divinum, sed tum humano tum divino posse carere solatio, & ob Dei gloriam animi exilium libenter ferre, & nulla in te sibi studere, aut meritum suum spectare, hoc lemmum magnum, vel potius maximum. Quid magni est, si, dum Dei favor adest, tu hilaris es & religiosus? quis illam horam non optet? Suaviter equitat, quem Dei gratia portat: & quid mirum, si onus non sentit, qui portatur ab omnipotente, & ducitur à summo ductore? Libenter alicujus rei solatio adhærescimus, & difficulter homo seipso exuitur, multumque & liu certandum est homini, antequam discat seipsum plenè superare, suosque sensus omnes ad Deum

Deum trahere. Quamdiu seipso nititur homo, facile delabitur ad humana solatia: sed Christi verus amator, & studiosus virtutum sectator, ad solatia illa non declinat, nec tales sensuum dulcedines quærit, sed potius vehementes exercitationes, & pro Christo duros labores. Igitur si quando tibi spirituale solatium divinitus datur, id tu cum gratiarum actione accipito, & Dei munus, non meritum tuum esse scito, neve eo superbito. Noli dono nimium gaudere, aut inaniter insolescere, sed esto potius tanto modestior, neque non in cunctis actionibus tuis cautior atque timidior. Nam præteribit tempus illud solatii, sequeturq; tentatio. Igitur sublato solatio, ne protinus desperato, sed cœlestem opem cum modestia & patientia expectato. Potest enim Deus amplius te & dono & consolatione iterum afficere. Neque verò novum istud est, aut insolens, expertis viam Dei, siquidem præcipuæ sanctitatis homines, prisci-que vates, hujusmodi vicissitudinem sæpe sunt experti. Itaque quidam divina ope fultus ita dicebat: Equidem cum in tanta felicitate essem, nunquam mihi labefactandus videbar.

Eadem sublata quid sibi evenerit, subjungit his verbis: Deinde te vultum tuum abdente, perturbatus sum.

Interea tamen nequaquam desperat, sed tanto vehementius Dominum orat, atque ita dicit:

dicit: Invocavi te, Domine, supplicavi Domino.

Tandem supplicationis suæ fructum reportat, seque exauditum testatur dicens: Exaudivit Dominus meique misertus est. Sed in quonam? Tū meum mœrorem, inquit, in chorum vertisti, meque exutum centone, amicivisti gaudio. Quòd si hæc tantæ sanctitatis viris contigerunt, nobis humilibus & inopibus desperandum non est, si modò in frigore, modò in ardore sumus: quandoquidem spiritus venit abique arbitratus. Eam ob causam dicit Jobus. Eum tanti facis, ejus ut rationem habeas, eumque quotidie cures, & per singula momenta explores.

Quanam ergo in re spem habere, aut cui confidere debeo, nisi soli illi summæ Dei misericordiæ gratiæque cœlesti? Nam licet, adsint homines boni religiosique fratres, & amici fideles, aut sancti libri & elegantes sermones, aut dulces cantus & carmina, omnia hæc parum juvant, parum arrident, si divina ope destitutus, meæ sum relictus inopiæ. Tunc nullum est melius remedium, quàm patientia & abnegatio mei secundum Dei voluntatem. Equidem in nullum unquam incidi religiosum hominem, cui non aliquando subtractum fuerit divinum præsidium, aut qui non senserit amoris diminutionem: nec extitit ullus unquam vir sanctus tam altè raptus & illuminatus, quin

E

is vel

is vel citius, vel serius, aliquando certè fuerit tentatus. Non est enim dignus alta Dei contemplatione, qui pro Deo non fuit exercitatus aliqua miseria. Solet enim præcedens tentatio sequentis consolationis esse signum. Nam iis qui tentationibus explorati sunt, cœlestis promittitur consolatio. Qui vicerit, inquit, dabo ei edere de arbore vitæ. Et datur consolatio divina, ut sit homo fortior ad adversa perferenda. Ersequitur tentatio, ne bono superbiat. Non dormit diabolus, nec adhuc mortua est caro: ideoque nunquam intermittito, te ipsum ad certamen præparare: nam à dextra sinistraque sunt hostes irrequieti.

De gratitudine erga Dei beneficia.

CAP. X.

Quid quæris quietem, cum natus sis ad laborem? Dede te potius patientiæ, quàm consolationi, & cruci portandæ, quàm lætitiæ. Quis enim vel mundanus homo non libenter consolatione spirituali semper fruatur, si semper potiri queat? quippe quæ omnibus mundi deliciis carnisque voluptatibus antecellat. Nam omnes mundanæ deliciæ aut turpes sunt aut vanæ: at spirituales solæ jucundæ, solæ honestæ, ex virtutibus progenitæ, & à Deo puris infusæ mentibus. Sed ejusmodi sunt divina hæc solatia, ut eis nemo suo arbitrio frui queat, quippe cum non diu cesset tentatio. Multum
ad-

adversatur cœlesti auxilio falsa libertas animi, nimiaque sui confidentia : & Deus benefacit, qui in hominem solatii beneficium conferat : sed homo malè facit , qui non totum Deo cum gratiarum actione acceptum ferat. Hinc fit, ut in nos influere divina dona ideò nequeant, quia ingrati sumus in authorem, nec omnia refundimus in fontis originem. Gratiam enim qui habet novam provocat : & à superbè ingratitis auferri solet, quod in modestè gratos confertur. Nolo solatium quod mihi auferat aculeos , nec affert rerum perspicientiam, quæ me evehat in superbiam. Non enim quicquid altum est, idem & sanctum, nec omnis cupiditas pura est : nec quicquid dulce , idem & salubre : nec quicquid homini charum, idem & Deo gratum. Libenter ea beneficia accipio, quibus modestior timidiorque reddar , & ad me ipsum relinquendum paratior. Qui acceptis à Deo beneficiis, & iisdem postea subtractis doctus atque castigatus est, is sibi nihil audet boni arrogare, sed potius inopem se nudumque confitetur. Da Deo quod Dei est, & tibi adscribe quod tuum est, hoc est, Deo gratias pro beneficiis age , tibi verò culpam tribue , & pro culpa pœnas deberi censeo. Habeto te semper infimo loco, & tibi dabitur summus : nam sine infimo summus non constat. Quos Deus nomine sanctitatis pro summis habet , ii se ipsos pro minimis habent : quantoque sunt gloriosiores, tanto se ge-

runt summissius, pleni veritate & gloria cœlesti, non vanæ gloriæ cupidi. Qui Deo nixi consistunt, ii ut insolescant, fieri nullo modo potest: & qui Deo adscribunt quicquid boni adepti sunt, ii mutuam gloriam non ambiunt, sed eam quæ à solo Deo est volunt, Deumque tum in se, tum in omnibus cæteris sanctis hominibus laudari supra omnia cupiunt, semperque eodem tendunt. Quocirca gratum te in parvis præstato, & dignus eris, qui maiora consequare. Sint tibi vel minima vilissimaque dona pro maximis & eximiis. Nam si datoris dignitas spectatur, nullum donum aut munus parvum aut vile videri debet. Non enim parvum munus est, quod à summo Deo donatur, usque adeò, ut si vel pœnas & verbera donet, id gratum esse debeat, utpote cum semper ad salutem nostram faciat, quicquid nobis usu venire permittit. Qui Dei gratiam retinere cupit, is se & gratum pro collatis & patientem, pro sublati beneficiis præbeto, utque redeant orato, & ne amittat cautus & modestus esto.

De paucitate amatorum crucis Jesu.

CAP. XI.

HAbet nunc Jesus regni sui cœlestis amatores multos: sed crucis gestatores paucos: habet consolationis cupidos multos, sed calamitatis paucos: mensæ socios invenit frequentes: sed continentiae paucos. Cum Christo gaudere

dere volunt omnes , sed cum eodem adversa
ferre pauci. Iesum multi ad panis usque fra-
ctionem sequuntur : sed ad supplicii calicem
potandum pauci : Ejus miracula venerantur
multi : sed crucis ignominiam sequuntur pau-
ci. Iesum multi diligunt quandiu adversa non
contingunt, eundem multi laudant & gratias a-
gunt , quandiu aliquid solatii ab eo accipiunt.
Idem si se abscondit , & paulisper eos relinquit,
aut in querimonias , aut in animi dejectionem
nimiam cadunt. At qui Iesum propter Iesum,
non propter ullum suum ipsorum solatium di-
ligunt, illi eum in calamitatibus & animi ango-
ribus æquè ac in summis solatiis concelebrant,
eique semper gratias agunt, idem facturi etiam,
si ille omnem eis consolationem in perpetuum
denegaret, tantum potest merus amor Iesu nul-
lo privato commodo aut amore sui permixtus.
Itaque omnes mercenarii dicendi sunt, qui sem-
per quærunt solatia , omnes sui magis quàm
Christi amatores esse perspicuum est , qui sua
commoda lucraque semper cogitant. Gratis
quidem servire Deo qui velit quotusquisque
est? aut qui sit ita spiritualis , ut omnibus hu-
manis rebus sit nudatus? Verè, inquam, animo
pauperem, & ab omnibus munda is rebus nu-
dum quis inueniat? pretiosum illum, & ab ulti-
mis usque orbis finibus petendum ? Si vel o-
mnes facultates suas impendat homo : nihil ad-
huc egit : & si gravi se peccatorum pœnitentia

castiget , adhuc parum est : & si scientiam omnem percipiat, adhuc longè abest : & si singulari virtute, ardentissimaque sit religione præditus, adhuc multum ei deest, unum scilicet, quod ei summè necessarium est. Sed quidnam illud tandem? nimirum ut cæteris omnibus relictis seipsum relinquat , totusque ex seipso egressus , nihil privati amoris retineat. Quum omnia fecerit, quæ facienda sciverit , nihil se fecisse sentiat, neque magni pendat quòd magnus haberi possit, sed verè inutilem servum se pronunciet, sicut veritas ait. Quum feceritis omnia quæ vobis præcepta sunt , tamen ita dicite: Servi sumus inutiles. Tum demum animo inops & nudus erit, eique cum vate illo dicere licebit. Solus & inops ego sum. Et tamen illo nemo ditior, nemo liberior , nemo potentior, qui & se & omnia relinquere sciat, & ad infima se dejicere.

De Christi cruce ferenda.

CAP. XII.

DUrum multis videtur dictum hoc : Abnegate ipsum , tolle crucem tuam , & Iesum sequere. Sed multo durius erit illud ultimum; Ite hinc execrabiles in ignem æternum. Qui enim nunc libenter audiunt & sequuntur dictum crucis , ii tunc non horrebunt tristem illam æterni supplicii sententiam. Atque hoc signum crucis erit in cælo , quum Dominus ad judi-

judicandum veniet. Tunc omnes servi crucis, qui vitam crucifixo congruam vixerint, ad Christum accedent iudicem cum magna fiducia. Quid igitur crucem tollere dubitas, per quam itur ad regnum? In cruce salus est, in cruce vita, in cruce præsidium adversus hostes, in cruce infusio supernæ suavitatis, in cruce robur mentis, in cruce gaudium spiritus, in cruce virtus summa, in cruce perfectio sanctitatis, denique absque cruce nec animæ salus, nec æternæ vitæ ipes est. Tolle ergo crucem tuam, & sequere Iesum, & ibis in vitam æternam. Processit ille ferens crucem suam, & in cruce pro te mortuus est, ut tu quoque crucem feras, & in cruce mori cupias. Nam si unâ cum eo mortuus fueris, unâ etiam vives: & si socius fueris supplicii, socius eris & gloriæ.

Etenim ut hoc scias, in cruce atque in moriendo sita sunt omnia, nec ad vitam veramque pacem animi ulla alia via est quàm crucis, & quotidianæ enectiōis suæ. Quocunque te vertas, in quamcunque patrem conjicias oculos, nullam usquam suprâ infrâve vel altiore vel tutiorem viam invenies, quàm crucis. Omnia arbitrio iudicioque tuo componas licet atque compares, fieri non poterit quin tibi vel volenti vel inuito semper sit aliquid patiendum, semperque in crucem incurras. Aut enim corporis dolorem experire: animi ægritudine cruciabere: interdum à Deo derelin-

queris, interdum ab altero exerceberis: & quod gravius est, sæpe tibi metipſi gravis eris: idque ita ut nullo remedio queas aut ſolatio liberari, quin tibi, quandiu volet Deus, id ſit perferendum. Vult enim Deus, ut miſeriam ſine conſolatione pati diſcas, eique te totum ſubjicias, & modeſtior calamitate fias. Chriſti ſupplicium nemo ſic animo ſentit, ut is cui ſimilia pati contingit. Crux igitur ſemper parata eſt, & ubique te manet, nec effugere poteſ, quocunque curras: nam quocunque veneris, teipſum tecum portas, & ſemper teipſum invenies.

Converte te ſuſum, converte deorſum, converte extrorſum & introrſum, ubicunque crucem invenies, ac neceſſe eſt ut ubicunque patientiam teneas, ſi animi pace frui, & perpetuam obtinere viſ coronam. Si tu crucem libenter portabis, ipſa te viciffim portabit, & ad optatum finem perducet, ubi videlicet patiendi finis erit, qui quidem hic futurus non eſt. Sin invitus portabis, onus tibi facies, & teipſum magis gravabis, & tamen ferendum erit. Si crucem unam abjicies, in alteram proſectò incurres, & quidem forſitan graviorem. Tene ſperas evaſurum, quod nulli mortalium licuit declinare? Quis ſanctorum virorum in orbe ſine cruce fuit & miſeria? Ipſe dominus noſter Jeſus Chriſtus nullam horam fuit expertus doloris & cruciatus, quandiu in hoc orbe vixit. Oportebat enim Chriſtum pati, & à mortuis reſurgere,
atque

atque ita gloriam suam inire , & tu aliam viam quæres, ac non regiam hanc viam crucis? Tota vita Christi crux fuit & cruciatus , & tu tibi requiem quæres & lætitiā? Erras, erras, si aliud quæris quàm calamitatum perpeſſionem: quippe cùm tota hæc vita mortalis plena fit miſeriis, & circumſepta crucibus, ac quanto quisque in rebus divinis majores progreſſus habet , tanto læpius in graviores cruces incidit, utpote cùm calamitatis dolor magis amore creſcat. Neque tamen tam multiplicibus calamitatibus preſuſ hic de quo loquor , caret levamento conſolationis, quando quidem ex hac cruce ſua uberem fructum percipere ſe ſentit. Nam dum ſe cruci ſponſe ſubjicit , fit ut omne calamitatis onus in divinæ conſolationis fiduciam convertatur : ac quanto magis labefactatur calamitate caro , tanto magis animi conſolatione, corroboratur ſpiritus, adeoque nonnunquam confirmatur ſenſu calamitatis. & rerum adverſarum [tantus eſt amor ſimilitudinis crucis Chriſti] ut dolore & miſeria vacare non optet: quoniam tanto ſe Deo acceptiorem eſſe credit , quanto plura & graviora pro eo ferre poteſt. Neque verò fit illud hominis virtute, ſed Chriſti beneficio , quod tantum poteſt, tantumque perficit in carne fragili, ut quod naturaliter ſemper abhorret & fugit homo, id ardore ſpiritus aggrediatur & amet. Non humanæ facultatis eſt crucem ferre, crucem ama-

re, corpus domare & subigere, fugere honores, libenter ferre contumelias, seipsum despiciere, & despici optare, adversa quæque cum damnis perpeti, & nihil prosperitatis in hoc orbe cupere. Horum tu nihil tuo marte poteris, si à teipso pendebris: sin Domino confides, dabitur tibi de cælo fortitudo, tuæque ditioni subijcietur Mundus & caro, quin ne Diaboli quidem inimicitias timebis, si fide armatus, & Iesu cruce signatus eris. Quamobrem applica te, sicuti fidelem bonumque Christi servum 'decet, ad ferendam viriliter crucem domini tui, pro te præ amore in crucem sublati. Paratus esto ad toleranda multa adversa & varia incommoda in hac misera vita: siquidem sic tecum agetur ubicunque deges, critque tibi omnino hæc ferenda conditio, ubiubi latebis, nec ulla usquam via est evadendi calamitatum dolorumque miseriam: quine ea perpetienda est. Tu Domini calicem avidè pota, si ejus amicus & consors esse cupis: quod ad consolationes attinet, eas Deo committe, iis ipse utatur arbitrio suo, tu ferendis calamitatibus deditus esto, easque pro maximis solatiis ducito. Neque enim pares sunt hujus temporis calamitates futuræ gloriæ, quâ sumus aliquando afficiendi, etiam si solus tu omnes perferre posses. Postquam eò perveneris, ubi tibi pro Christo adversa ferre dulce sit & jucundum, tunc tecum bene agi existimato, qui cœleste regnum inveneris in terris.

Rur-

Rursum quamdiu ferre gravaberis, & fugitabis, tamdiu malè tecum agetur, teque ubique vexabit fuga calamitatis. Sin te ad officium tuum, hoc est, ad patiendum moriendumque applicabis, brevi sublevaberis, & pacem invenies. Etiam si vel in tertium cælum cum Paulo raptus fueris, non ideò exploratum habebis, nihil tibi adversi esse eventurum. Ego (inquit Iesus) ei ostendam quantum ei sit meo nomine patiendum. Itaque ut patiari necesse est, si Iesum diligere, & ei perpetuò servire placet. Atque utinam dignus sis, qui pro Iesu nomine aliquid patiaris: quanta inde & tibi gloria, & sanctis omnibus lætitia, & hominibus utilitas existet? Nam patientiam commendant omnes, licet pauci pati velint. Equidem magna causa est, cur pro Christo paululum pati velis, quum multò graviora patiari pro Mundo. Atque illud certò scito, tibi moriendo vivendum esse: ac quanto quisque sibi magis moritur, tanto eundem Deo magis vivere. Nemo aptus est ad comprehendenda cœlestia, nisi qui se submiterit ad adversa pro Christo ferenda. Denique nihil vel Deo acceptius, vel tibi salutaris in hac vita, quàm libenter pati pro Christo: adeò ut si tibi detur optio, malle debeas pro Christo adversa pati, quàm multis consolationibus recreari: ita enim & Christo, & omnibus ejus cultoribus sanctis similior existes. Neque enim in copia voluptatum, & consolationum situm, est

est meritum nostrum officiique profectus , sed potius in gravibus malis calamitatibusque perferendis. Quòd si quid melius aut homini salutarius esset quàm adversa pati , utique Christus id & verbis & factis ostendisset. Nunc & discipulos sectatores suos, & omnes sui sequendi cupidos manifestò ad crucem ferendam hortatur in hunc modum : Si quis post me venire vult, abneget semetipsum, tollat crucem suam, & me sequatur. Igitur omnibus perlectis & exploratis fit hæc orationis conclusio. Per multas calamitates nobis in Dei regnum intrandum est.

FINIS LIBRI SECUNDI.





LIBER TERTIUS.

DE

INTERIORE CHRISTI
COLLOQUUTIONE CUM IN-
TERIORE ANIMA FIDELI.

CAP. I.

AUdiam quid in me loquatur dominus
Deus. Beata anima, quæ loquentem
in se Dominum audit, & ex ejus ore ser-
monem consolationis accipit. Beatæ
aures, quæ divini susurri sonitum accipiunt, &
hujus mundi susurrationses nihil advertunt.
Beatæ planè aures, quæ non foris sonantem vo-
cem auscultant, sed loquentem interiorius do-
centemque veritatem. Beati oculi, qui
exterioribus clausi, interioribus sunt in-
tenti. Beati qui ad interiora penetrant,
& ad capienda arcana cœlestia magis magis-
que quotidianis exercitationibus sese student
præparare. Beati qui Deo vacare gestiunt, &
ab omni humano impedimento se excutiunt.
Hæc

cum silentio audienda, cumque omni modestia atque aviditate accipienda. SERVUS. Beatus est quem tu erudis Domine, & de lege tua doces, ut ei calamitatis tempore opituleris, ne pessum eat. DOMINUS. Ego & olim vates docui, & nunc etiamnum omnes alloqui non intermitto: sed multi ad vocem meam surdi sunt & duri. Plerique mundum libentius audiunt quàm Deum, faciliusque carnis suæ appetitui, quàm Dei voluntati obsequuntur. Promittit Mundus & temporalia & parva, & servitur ei magna aviditate: ego summa æternaque promitto: & torpent corda mortalium. Quis mihi tanta cura in omnibus servit & obedit, quanta Mundo Mundique dominis servitur? Pudeat te, & si causam quæris, audi. Ob exiguum stipendium longa via à multis curritur: & ob æternam vitam vix à paucis pes semel attollitur. Vile precium studiosè quæritur: pro uno numo interdum turpiter litigatur: & pro re inani parvaque promissione dies noctesque fatigari non dubitatur: at pro bono immutabili, pro præmio inæstimabili, pro summo honore, & gloria immortalis, vel tantulum laborare piget. Pudeat igitur te, serve piger & querule, quod illi ad interitum, quàm tu ad vitam, paratiores existant: magisque vanitate, quàm tu veritate gaudent. Et illi quidem spe sua nonnunquam frustrantur: at mea promissio neminem fallit, nec mihi confidentem re infecta dimittit. Ego quod
ver-

verbis promitto atque pronuncio, idem re ipsa præsto atque impleo, si quis modò ad finem usque in amore perseveret. Ego bonorum omnium remunerator, ego idem religiosorum omnium vehemens sum explorator. Inscribe verba mea cordi tuo, eaque diligenter pertracta: erunt enim tentationis tempore valde necessaria. Quæ tu legens non intelligis, eadem curationis tempore cognosces. Soleo autem electos meos duobus modis curare, videlicet tentatione & consolatione: eosque duabus rationibus quotidie instituo, primum eorum vitam reprehendendo: deinde eos ad virtutum incrementa cohortando. Qui verba mea habet, eademque spernit, habet à quo damnetur in novissimo die.

Precatio, qua divina doctrina & religio imploratur. CAP. IV.

Domine mi Deus, qui meum omne bonum es, quis ego sum, ut te alloqui audeam? pauperrimus ego servulus tuus & abjectus vermiculus, multo & pauperior & vilior, quam vel scio, vel dicere audeo. Et tamen vel hoc ipsum memento, Domine, me nihil esse, nihil habere, nihil valere. Tu solus bonus, tu justus, tu sanctus, omnia imples, solos fontes relinquens inanes. Recordare misericordiae tuæ Domine, & imple animum meum favore tuo, qui opera tua vacua esse non vis. Nam qui possim in misera
F
hac

hac vita consistere, nisi me tua misericordia favorque confirmet ? Noli vultum tuum à me avertere : noli tuam mei curationem procrastinare : noli consolationem tuam abstrahere , ne tibi fiat anima mea, qualis terra est humoris expers. Domine doce me exequi voluntatem tuam : doce me coram te dignè submissequè versari. Nam tu mea sapientia es, meque verè & cognoscis & cognovisti antequam non solùm ego in Mundo natus sum , verum etiam antequam Mundus ipse factus est.

*Veritatem modestiamque coram Deo
colendam esse.*

CAP. V.

NAte veritatem coram me colito , meque semper cum animi simplicitate quærito. Qui veritatem in meo conspectu colit , is à mali incurfibus defendetur, eumque veritas à deceptoribus & improborum calumniis liberabit. Quòd si te veritas liberaverit, verè liber eris, nec hominum inania verba curabis. SERVUS. Est ut dicis, domine, atque ut ita mecum agatur, quælo, videlicet ut me tua veritas doceat, custodiat, & ad felicem exitum perducatur. Eadem me ab omni prava cupidine, & intemperato amore liberet : ita fiet ut magna animi libertate erga te utar. VERITAS. Et ego te quid rectum quidque mihi acceptum sit docebo. Recole cum magno animi dolore ac mœrore peccata tua, nève
tibi

tibi ob tua recte facta quicquam arroges. Nam revera nocens es & multis animi morbis obnoxius atque implicitus, qui tuapte natura semper ad nihilum tendas, facileque labaris, facile vincaris, facile turberis & pessunderis. Denique nihil habes quo gloriari possis: sed potius multa ob quæ te parvifacere debeas, quippe multo infirmior quàm ut id percipere queas. Quocirca fac ut omnium operum tuorum nihil magnum tibi videatur, nihil grande, nihil pretiosum & admirabile, nihil denique suspiciendum censeas, nihil altum, nihil verè laudabile & appetendum, nisi quod æternum est. Tibi supra omnia placeat æterna veritas, displiceat tua summa vilitas, nihil sic timeas, nihil sic vituperes, & fugias, ut vitia peccataque tua, quæ magis displicere debent, quàm cujusvis rei jactura. Quidam se mihi non sinceros præbent: quin quadam curiositate & arrogantia ducti, arcana mea, arduasque res studiosè rimantur, se suamque salutem negligentes, hi sæpe in graves tentationes & peccata propter suam curiositatem & superbiam, me eis adversante, labuntur. At tu omnipotentis Dei sententiam, iramque pavidus time, néve Supremi opera excute, sed vitia tua perscrutare, quantum vel mali feceris, vel boni neglexeris. Nonnulli suam omnem religionem solum in libris, alii in picturis, nonnulli in exterioribus signis figurisque circumferunt, alii in ore me gestant, in corde non item. Sunt

contrà qui mente perspicaces, & animo puri, ad æterna semper anhelant, de terrestribus inviti audiunt, naturæ necessitatibus dolenter interviunt: & hi quidem quid veritatis spiritus in ipsis loquatur sentiunt, quippe qui eos terrestribus despectis amare cœlestia, mundoque contempto, cœlum dies noctesq; appetere doceat.

Dei laudatio, & de ejus beneficiis gratiarum

actio: itemque de vi amoris Dei.

CAP. VI.

Collaudo te pater cœlestis, pater Domini mei Jesu Christi, qui mei inopis dignatus fueris recordari. Omisericordiæ pater, omnisque consolationis Deus, ago tibi gratias, qui me omni indignum consolatione, quandoque tuarecreas consolatione. Te ego perpetuò collaudo atque concelebro, nec non unigenitum filium tuum, & confirmatorem Spiritum Sanctum, in omnem seculorum perpetuitatem. Eja domine Deus, mei amator sancte, ubi in animum meum veneris, toto pectore exultabo. Tu mea gloria, meique cordis exultatio es: tu mea spes & perfugium tempore calamitoso. Sed quia adhuc amore debili & virtute sum imperfecta, necesse habeo à te confirmari afficique consolatione: quocirca vise me sæpius, sanctaque instrue disciplina. Libera me à pravi animi perturbationibus, animumque meum ab omnibus effrenatis cupidinibus & vitiis sana, ut
intus

intus sanatus , & probè purgatus aptus efficiat ad amandum, fortis ad patiendum, constans ad perseverandum. Magna res est amor, magnum omnino bonum , quod solum & leve reddit quicquid onerosum, & æqualiter fert, quicquid est inæquale. Nam onus sine onere portat, & amara omnia in dulcia sapidaque convertit. Ille, inquam, Jesu nobilis amor ad magna facienda impellit: excitatque ad appetenda semper perfectiora. Amor vult esse sursum, nec ullis humilibus rebus retineri. Amor vult esse liber, & ab omni mundana affectione alienus, ne ejus interior impediatur aspectus, neve temporali aliquo vel commodo implicetur , vel incommodo succumbat. Amore nihil dulcius, nihil fortius, nihil altius, nihil latius , nihil jucundius, nihil plenius, nihil vel in cælo, vel in terra melius, quippe qui Deo sit natus, nec nisi in Deo super omnia creata possit requiescere. Amans volat, currit, lætatur, liber est, neque tenetur : omnia dat pro omnibus & habet in omnibus omnia, utpote qui in uno summo supra omnia quiescat , ex quo manat & oritur omne bonum, Non dona spectat, sed ad donantem se convertit supra omnia bona. Amor modum nullum novit, sed supra omnem modum fervet. Amor onus non sentit, labores nihili facit, supra vires conatur, utrum fieri id possit an secus, nihil pensi habens, quippe cum sibi nihil arduum, nihil illicitum arbitretur. Ergo valet ad omnia,

omnia, multaque ad finem perducit, nisi non deficit & jacet amans. Amor vigilat, & dormiens non dormitat: laborans non lassatur, pressus non opprimitur, territus non perturbatur, sed quasi vivida flamma, ardensque facula sursum erumpit, tutoque penetrat. Si quis amat, novit quid hæc vox clamet. Magnus clamor in auribus Dei est ipse ardens affectus animi, dum dicit, Mi Deus, mi amor, tu totus meus, ego totus sum tuus, gigne in me amorem copiosum, ut discam interiore cordis ore degustare, quam suave sit amare, & in amore quasi liquefactum natare. Fac ut ita amore flagrem, ut studii ardore me ipsum superem. Cantem amoris canticum, in sublime te sequar amicum meum, tuasque laudes tanto amore decantem, ut me deficiat animus.

Te plus quam me ipsum amem: quin neque me, neque cæterorum quenquam, qui te verè amant, nisi & propter te, & in te amem, sicuti jubet lex amoris ex te relucens. Est amor velox, sincerus, pius, jucundus & amœnus, fortis, patiens, fidelis, prudens, tolerans, utilis, & sibi nunquam studens.

Ubi enim sibi quis studet, ibi cadit amor. Est amor circumspectus, modestus, rectus, non mollis, non levis, nec vanis rebus addictus, sobrius, castus, constans, quietus, & in cunctis sensibus temperans. Est amor subjectus & obediens majoribus, sibi vilis & despectus, erga
Deum

Deum religiosus & gratus, confidens semperque sperans etiam tum, cum à Deo fastiditur: quandoquidem sine dolore non vivitur in amore. Qui non est paratus omnia pati, seque amici voluntati accommodare, indignus est qui amator appelletur. Denique amantem oportet omnia dura & amara propter amicum amplecti, nec adversis casibus ab eo avocari.

De veri amatoris exploratione, & quomodo sit hosti resistendum.

CAP. VII.

NAte nondum fortis es & prudens amator. SER. Quare domine? DOM. Quia vel ob exiguum insultum cæpto desistis, & nimis avidè consolationem quæris. Fortis amator confitit in tentationibus, nec callidis credit suasionibus inimici: itaque rebus secundis delectatur, ut adversis non offendatur. Prudens amator non tam amantis donum, quàm donantis amorem spectat, idem animum potius quàm censum attendit, & amico omnia munera postponit. Non in dono, sed in me supra omne donum acquiescit nobilis amator. Neque verò continuò despondendum est animum, si quando vel de me vel de mei cultoribus sanctis minus bene sentis, quàm velles. Affectus ille bonus & dulcis, quo interdum permulceris, affectus est favoris præsentis, & prægustatio quædam patriæ cœlestis, cui prægustationi non ni-

mis innitendum est, ut quæ vicissitudinem habeat. Sed adversus animi pravos motus certare, Diabolique sollicitationes spernere: hoc verò virtutis opus, magnæque mercede dignum est. Itaq; non est quod te usque adeò urant absurdæ istæ imaginationes, ex quavis occasione occurfare solitæ: persevera constanter in instituto, & erga Deum animo esto sincero. Neque verò illusio est, quod aliquando in sublime subito raperis, & mox ad animi solitas ineptias reverteris: quas quidem quoniam invitus potius pateris, quàm earum auctores, quandiu displicent & reniteris, utiles potius sunt quàm perniciosæ. Scito antiquum illum hostem in id omnino incumbere, ut tuum boni studium impediat, teque ab omni religionis exercitatione avocet, videlicet à pia supplicii Christi memoria, ab animi tui custodia, à firmo proposito proficiendi in virtute. Multas malas cogitationes injicit, ut tibi tædium horroremque incutiat, quo te à precibus sacrarumque literarum lectione revocet. Displicet ei summissa peccatorum confessio, & si posset, communione te revocaret. Ei tu ne credito, néve eum cures, licet tibi sæpius fallaces intendat laqueos. In ipsum mala turpiaque ingentem retorqueto, eique sic dicito: Abi immunde spiritus, erubescere miser, impurissime tu, qui talia inferis auribus meis, faceffe à me, impostor pessime, nihil apud me efficies. Jesus enim mihi fortis bellator

tor aderit, & tu fœdè vincèris. Malo mori, & quidvis ferre, quàm tibi assentiri. Tace & obmutesce, jam ego te non audiam, etiamsi plura mihi faceſſas negotia. Dominus mea lux & ſalùs eſt: ecquem metuum? Dominus mea vitæ firmamentum eſt, ecquem formidem? Si contra me caſtra fiant, non metuum animo, Domino me adjuvante atque liberante. Certa more militis: quòd ſi quando ob infirmitatem cecideris, reſumito vires prioribus fortiores, de meo erga te favore etiam majore bene ſperans: & inanem arrogantiam ſuperbiamque etiam atq; etiam caveto, quæ in cauſa eſt ut multi in errorem ducantur & in cæcitatem penè incurabilem quandoque labantur. Afferat tibi cautionem perpetuamque modeſtiam ruina illa ſuperborum, ſtultè ſibi nimis arrogantium.

De Dei beneficiis modeſtè occultandis.

CAP. VIII.

NAte utile tibi & tutum eſt, collatum tibi divinitùs religionis ſtudium diſſimulare, nec id insolentius jactando verbis efferre, aut ſupra modum extollere, ſed potius teipſum deſpicere, & tanquam illis in indignum collatis timere. Non eſt ei affectioni tenacius inhærendum, quæ citò mutati poteſt in contrarium. Cogita dum tibi Dei adeſt gratia, quàm miſer & inops eſſe ſoleas ſine gratia: nec in eo duntaxat ſitos eſſe progreſſus vitæ ſpiritualis, ſi divinæ conſo-

solationis beneficio frueris , sed etiam si ejusdem subtractionem modeste , temperanter patienterque feras , ita ut tunc in precum studio non torpescas , nec reliqua opera tua consueta omnino dilabi permittas , quin quam optimè poteris & scies , libenter quod in te erit facias , nec propter illam quam sentis mentis ariditatem aut anxietatem officium prorsus negligas. Multi enim , si quando eis non bene successit , protinus impatientes fiunt aut desides. Non semper est arbitrii hominis suis rebus moderari : sed Dei est & dare , & consolari & quando vult , & quantum vult , & cui vult , idque ut ipsi demum libet. Nonnulli seipsos ob collatum in se religionis studium incerti perdiderunt , dum supra vires conando pravitatem suam non perpendunt , sed magis animi affectum , quàm rationis iudicium sequuntur. Hi quia majora quàm Deo placitum fuit , susceperunt , divinum favorem citò amiserunt : & qui sibi in cælo nidum posuerant , iidem inopes , viles , derelicti evaserunt , ut depressi ac depauperati non alis suis volare , sed pennis meis niti discerent. Qui adhuc tyrones sunt , & viæ Domini imperiti , nisi prudentiorum consilio obtemperent , facilius decipi pessundarique possunt : iidemque si opinioni suæ potius obsequuti sunt , quàm exercitatis obtemperarunt , in maiore versantur periculo ; qui à concepta semel opinione retrahi noluerint. Rarò fit , ut quis sibi sapere videtur ,
is al-

is alterius imperium modestè ferat. Itaque præstat parum sapere cum modestia, exiguaque rerum perspicientia, quàm abundanter scientia sibi nimium placere, præstat minus habere, quàm multum habentem superbire. Non satis circumspectè agit, qui se totum lætitiæ tradit, oblitus pristinæ suæ inopiæ, castique timoris Domini, qui ne collata sibi beneficia amittat, solet metuere. Nec ille quidem satis cum virtute sapit, qui adverso difficilique tempore nimium desperanter se gerit, & de me minus fidenter, quàm debet, cogitat atque sentit. Qui pacis tempore nimis securum se præbet, is belli tempore sæpe nimis dejectus & formidolosus existit. Si semper modestum te animique demissi præstare, spiritusque tuos bene moderari ac regere scires, haud tam facilè in periculum & offensam incideres. Consultum est ardoris spiritu concepto cogitare quid futurum sit, si lux discesserit: rursumque ubi id contigerit, eandem reverti posse cogitare, à me ideò subtraham, ut & tu cautior, & ego reddar gloriosior. Est enim sæpe talis exploratio conducibilior, quàm si rebus secundis perpetuò fruereris arbitrato tuo. Neque enim in eo sita sunt virtutis opera, si divinis visis & consolationibus abundes, aut literarum sis peritus, aut in sublimi gradu colloceris: sed si vera modestia nitaris, si divina charitate sis plenus: si Dei gloriæ castè & sincerè perpetuò studeas: te ipsum nihili facias,

facias, vereque despicias, neque non ab aliis quoque despici deprimique magis. quàm honorari gaudeas.

De seipso in Dei oculis parvifaciendo.

CAP. IX.

DOminum meum alloqui audeo, ipse pulvis & cinis: qui si me pluris fecero, tu mihi contrà stas, & dicunt contra me verum testimonium mea crimina, cui non possum contradicere. Sin me ipsum vilipendens in nihilum redegero, abjectaque omni de me existimatione me ipsum pro pulvere, ut sum, habuero, erit mihi propitia gratia tua, & vicina cordi meo tua lux: atque ita fiet ut si me vel tantuli feci, etiam illud ipsum tantulum, me prorsus in nihilum depresso, evanescat in perpetuum. Hic tu me mihi ostendes quid sim, quid fuerim, & unde venerim, nihil videlicet & de nihilo, qui si mihi metipsum relinquor, continuò nihil sum nisi mera infirmitas. Sin tu me subito respexisti, statim fortis efficior, novaque repleor lætitia, & admodum mirum est me sic repentè sublevari, te tam benignè complectente, qui me opte pondere semper ad ima feror: facit hoc amor tuus me gratis præveniens, & in tot necessitatibus subveniens, meque à gravibus periculis tutans, & ex innumeris (ut verè dicam) malis eripiens. Nam & me ipsum malè amando perdidi: & te solum quærendo sincereque amando tum meipsum,

psum, tum te inveni, eoque amore me ipsum etiam magis in nihilum demersi. Nam tu, ô mihi dulcissime, plura in me confers non solum quàm promereri queam, verùm etiam quàm sperare, ne dicam rogare, audeam. Ago tibi gratias, mi Deus, quòd licet ego sim omni indignus bono, tua tamen nobilitas & immensa bonitas etiam ingratis & à te longè averfis benefacere nunquam intermittit. Converte nos ad te, ut simus grati, summissi, religiosi, tu qui nostra salus, & virtus, & fortitudo es.

*Omnia ad Deum, ceu ad finem ultimum,
esse referenda.*

CAP. X.

NAte supremus tibi ultimusque finis ego sim oportet, si beatus esse cupis. Hac intentione expiabitur ingenium tuum, sæpius ad seipsum & ad res creatas malè propensum. Nam simulatque in re quapiam tibi ipsi studes, in teipso deficis & arescis. Itaque omnia ad me unum referas oportet, quippe qui omnia dedero, & singula ex me summo bono manare scias, ideoque ad me, ceu originem suam, esse revocanda. Ex me parvus æquè ac magnus, pauper æquè ac dives, tanquam ex vivo fonte vivam aquam hauriunt: & qui mihi spontè & liberaliter serviunt, ii beneficiis aliis super alia cum labuntur. Sed extra me si quis gloriari, aut aliquo privato bono delectari voluerit, is perpetuo

tuo veroque gaudio, animique lætitia non potietur, sed in varia incommoda & angores incurret. Itaque nihil boni, nihil virtutis vel tibi vel omnino ulli mortalium adscribere debes, sed omnia Deo, sine quo nihil habet homo, accepta ferre. Ego omnia dedi, ego idem omnia mihi jure vendico, magnaque cum severitate gratiarum actionem exigo. Hæc veritas est, qua fugatur humanæ gloriæ vanitas.

Quòd si quis cœlesti favore veraque charitate præditus erit, hunc nec invidia, nec animi dejectio, nec amor sui occupabit. Vincit enim omnia, animique vires omnes explicat divina charitas. Quòd si rectè sapias, in me solo gaudebis, in me solo sperabis, quemadmodum unus Deus bonus est, super omnia laudandus, & in omnibus celebrandus.

Dulce esse contempto Mundo / servire Deo.

CAP. XI.

Nunc iterum loquar Domine, neque silebo, inque mei & Dei & Domini & regis sublimè cælum incolentis auribus in hunc modum fabor : O quanta est, Domine, voluptas illa, quam tui reverentibus, repositam habes ? nedum amantibus, nedum toto animo tibi servantibus. Vere ineffabilis est tui contemplandi dulcedo, quam largiris amatoribus tuis. Atque in eo maximè charitatis tuæ dulcedinem exeruisti, quòd cum non essem, tu me feci-

fecisti, & postea longè à te errantem in viam reduxisti, ut tibi servirem : utque te amem præcepisti. O fons amoris perpetui, quid de te dicam, aut tui oblivisci quì possim ? qui mei recordari dignatus fueris : qui tua erga me, postquam jam contabueram atque perieram , contra spem omnem , misericordia usus fueris , & nihil pro merito , favore amicitiaque demerueris, pro qua quidem beneficentia quam tibi gratiam referam ? Serviam videlicet tibi, sed quid magnum est ei servire, cui omnis rerum natura servire debet ? Illud potius magnum mihi & admirandum videtur, quod tam inopem , tam indignum in servitutem admittere , & in dilectorum tibi servorum numerum cooptare dignaris. En tua sunt omnia quæcunque habeo, & quibus tibi servio. Sed quid quòd magis tu mihi servis, quàm ego tibi ? En cælum ipsum & terra, à te ad hominis usus condita, præstò sunt, & quotidie quicquid à te mandatum est, exequuntur. Quin etiam angelos ad hominis usus creasti atq; ordinasti. Sed omnium longè maximum est, quòd tu ipse servire homini dignatus es, & te ipsum ei daturum promisisti. Pro quibus innumeris beneficiis quamnam tibi gratiam referam ? Utinam tibi per omnem vitam servire possim : utinam is sim, qui vel unius diei dignum servitium exhibeam. Verè tu omni servitio , omni honore & æterna laude dignus es. Verè tu Dominus meus, & ego tenuis servus tuus sū, quì
tibi

tibi totis viribus servire, laudibusque tuis nunquam satiari debeo. Et quidem sic volo, sic cupio, & quicquid mihi deest, tu supplere dignare. Magnus honor, magna gloria tibi servire, & omnia propter te contemnere. Magnam enim mercedem reportabunt, qui se sanctissimæ isti servituti sponte subjecerint, invenientque suavissimam sancti spiritus consolationem, qui amore tui humanas abjecerint voluptates. Magnam animi libertatem consequentur, qui arctam pro nomine tuo ingressi viam, mundanas curas omnes contempserint. O gratam jucundamque Dei servitutem, qua homo verè liber & sanctus efficitur. O sacrum statum religiosi famulus, qui hominem angelis reddit æqualem, Deo acceptum, dæmonibus terribilem, cunctisque fidelibus commendatum. O amplectendum & semper optandum servitium, quo & summum bonum paratur, & gaudium quæritur sine fine mansurum.

*Animi cupiditates examinandas esse
& moderandas.*

CAP. XII.

Nate multa tibi adscribenda restant. S. Quænam, Domine? D. Ut cupiditatem tuam arbitrio meo planè subjicias, & non jam tui amator, sed meæ voluntatis exequendæ sis cupidus. Sæpe te cupidines accendunt, & vehementer impellunt: hic tu considerato, utrum honore meo,

meo, an commodo tuo magis moveare. Nam si mea causa cupis, boni consules quicquid ego statuerō: sin privati quæstus aliqua cupido latet, id ipsum est quod te impedit & gravat. Cave ergo ne conceptæ, inconsulto me, cupiditati nimium innitaris, ne fortè postea pæniteat, ac quod primò placuerit, quodque ceu optimum affectaveris, idem deinde displiceat. Nam nec omnis affectio, quæ bona videtur, statim est sequenda, nec contraria primo aspectu fugienda. Expedit interdum etiam bonis studiis & cupiditatibus frænos adhibere, ne vel animi importunitatem modum transeas, vel aliis intemperantia tua offensionis sis, vel iisdem resistentibus subito turbatus labaris. Nonnunquam violentia uti convenit, & appetitui repugnare, neque quid velit, quidve nolit caro, rationem habere, quin potius operam dare, ut vel invita spiritui obtemperet, & tam diu coerceatur servitutemque ferat, donec parata sit ad omnia: paucisque contenta esse, & tenui conditione delectari, nec adversus ullum incommodum obmurmurare condiscat.

De ratione patientia, & certamine adversus cupiditates.

CAP. XIII.

ERgo quantum audio, mi Domine Deus, est mihi perquam necessaria patientia: multa enim in hac vita accidunt adversa: ut licet pacem

eam omni ratione appetam, fieri tamen nequeat, ut sine bello & dolore vitam degam. D. Ita est, nate. Nolo autem te eam pacem quærere, quæ tentationibus careat, aut adversa non sentiat: sed tunc quoque pacem à te inventam existimare, cum variis multisq; miseriarum rerumq; adversarum calamitatibus exagitantibus explorare. Quòd si te multa pati posse negabis, æternum ignis cruciatum ferre qui poteris? De duobus malis semper minus est eligendum. Utergo æternà illa futura supplicia evadas, mala præsentia pro Deo æquo animo ferre studeto. An putas seculi hujus homines aut nihil malorum aut parum pati? ne delicatissimos quidem à malis immunes esse comperies. Dices: Sed fruuntur multis voluptatibus, suæque voluntati obsequuntur, ideoque misérias suas parvi pendunt, finge eis omnia ex animi sententia succedere, quamdiu id duraturum est? Nimirum fimi ritu peribunt, qui in hac vita copiosi sunt, ita ut præteritorum gaudiorum nulla supersit recordatio. Quin & adhuc superstites non sine acerbitate & molestia ac timore illis fruuntur. Etenim quibus ex rebus voluptatem capiunt, ex iisdem dolorem non rarò concipiunt: & meritò; ut qui intemperanter voluptates consecretantur, iidem non sine acerbitate & preturbatione eas percipiant. Sunt illæ sanè perbreves omnes, & falsæ, & intemperantes, & turpes: sed hoc illi præ ebrietate & cæcitate non

non vident : quin brutorum animalium ritu ob exiguam vitæ mortalis delectationem , animæ mortem sibi conciliant. Quocirca tu nate cupiditates tuas sequi noli, sed voluntatem tuam averse. Delectare Domino, & animi tui postulata tibi concedet. Etenim si verè delectari, largamque consolationem à me vis percipere, scito tibi in rerum omnium mundanarum contemptu , infirmarumque istarum voluptatum abiectione sitam esse felicitatem, amplumque præmium consolationis : quantoque tu te magis ab omni humanarum rerum solatio subtraxeris, tanto suaviores majoresque consolationes in me inventurum esse. Sed ad eas non sine tristitia & labore certaminis pervenies: obstat enim inolita consuetudo, sed ea meliori consuetudine vincetur : obmurmurabit caro , sed ea spiritus ardore frenabitur: instigabit te & exacerbabit serpens antiquus, sed precibus fugabitur, & insuper & utili labore magnus ei aditus obstruetur.

De obediendo majoribus exemplo Jesu Christi.

CAP. XIV.

NAte qui se obedientiæ subducit, is se divino favori subducit: & qui privata quærit, amittit communia. Qui non libenter & sponte superiori se subdit, hoc ipso indicat suam se carnem nondum prorsus habere dicto audientem, sed eam sæpe recalcitrare & obmurmurare.

G a

Qua-

Quocirca disce celeriter superiori te submittere, si carnem tuam domare cupis. Citius namque vincitur exterior inimicus, si interior homo est illa befactus. Nullus animæ molestior aut peior hostis est quam tute tibi non concordans cum spiritu. Oportet enim te verum adhibere contemptum tui, si vis carne & sanguine superior evadere: quandoquidem adhuc intemperantius amas, ideoque te totum alienæ voluntati committere horres. Sed quid magnum, tu pulvis, & nihil præstas, si propter Deum te subdis homini? cum ego ille omnipotens & supremus, qui ex nihilo omnia creavi, homini me tua causa submissem subjecerim, factus omnium humilimus & infimus, ut tu superbiam istam humilitate mea vinceret? Disce obtemperare, pulvis: disce te deprimere, terra & lime, omniumque pedibus subicere: disce voluntatem tuam fraudare, & omnibus subiectum te præbere. Exardesce contra te ipsum, neve patere fastum in te vivere, sed ita subiectum parvumque te præbe, ut te pervadere, & luti vicorum ritu conculcare possint omnes. Quid habes, inanis homo, quod conqueraris? quid est ô impure, quod vituperantibus contradicas, cum toties offenso Deo, toties Stygias pœnas meritus sis? Sed ego tibi benignus peperi, animam tuam habens in pretio, ut tu cognito meo erga te amore, gratum te de beneficiis meis semper præberes, veræque obedientiæ & modestiæ per-

perpetuò addictus, tui contemptum patienter ferres.

*De occultis Dei judicijs considerandis,
ne bonis expellamur.*

CAP. XV.

TU tuis judicijs in me tonans, Domine, omnia membra mea timore concutis ac tremore, animumque meum supra modum perterres. Attonitus ego illud considero, cælos ipsos in tuo conspectu non esse mundos, quod si in angelis ipsis vitiumprehendisti, nec eis pepercisti, quid de me futurum est? si stellæ ipsæ de cælo cecidere, ego pulvis quid sperem? Quorū opera videbantur laudabilia, ii ad ima deciderunt: & qui angelorum pane vescebantur, eos vidiporcorum filiquis delectari. Nulla est ergo sanctitas, si tu manum tuam, Domine, retrahas: nulla prodest sapientia, si tu gubernare desistas: nulla juvat fortitudo, si tu conservare desinas: nulla prodest sui custodia, nisi tua adfit sacra vigilantia.

Nam relictī mergimur & perimus: iidem te curante erecti vivimus: inconstantes nos quidem, sed qui à te confirmemur: tepidi, sed qui à te accendamus.

Enimverò mihi de meipso humillimè & abjectissimè sentiendum est, planeque nihili pendendum, si quid boni videor habere; debeo, inquam, meipsum tuis illis inexhaustis judicijs

submississimè subjugare , ubi me nihil aliud quàm nihil de nihilo esse comperio. O pondus immensum: ô pelagus intranabile, ubi me nihil nisi totum nihili esse comperio. Ubinam est igitur latebra gloriæ? ubi pactæ gloriæ confidentia? Absorpta est omnis vana gloria in tuorum de me iudiciorum gurgite. Quid sunt mortales omnes in tuo conspectu? scilicet gloriatur lutum adversus figulum. Potestne vanis laudibus insolescere, cujus animus in veritate Deo subiectus est? non si universus eum mundus extollat, postquam eum sibi subjecit veritas: nullo inquam laudantium ore movebitur, qui spem suam omnem fixit in Deo. Nam & illi ipsi quiloquantur, omnes nihil sunt, & cum verborum suorum sonitu defecturi sunt. At Domini veritas æterna manet.

Quo animo esse, & quid dicere oporteat in rebus experendis.

CAP. XVI.

NAte omnibus in rebus sic tibi dicendum est: Domine si tibi placitum fuerit, hoc ita fiat. Domine si hoc tibi honori futurum est, fiat in tuo nomine. Domine si hoc mihi expedire & utile fore vides, effice ut eo utar ad honorem tuum: sin mihi non salutare, sed noxium fore nosti, aufer à me cupiditatem hanc. Neque enim à spiritu sancto est omnis cupiditas, etiã si homini recta bonaque esse videatur: est-

estque difficile certò judicare bonusne an diversus spiritus impèllat ad hoc aut illud aven- dum: an potius tuo ipsius spiritu moveare. Multi ad extremum decepti sunt, qui primò spiritu bono videbantur instigati. Itaque semper cum Dei metu animique summissione cupi- endum est, quicquid animo optandum occur- rit: cumque mera objurgatione sui tota res committenda Deo, atque ita dicendum: *Do- mine utrum magis expediat, tute scis: utrum ipse voles facito.* Da quod vis, & quantum vis, & quando vis, age mecum ut agendum nosti, ut- que tibi placet, & quod tibi maximam gloriam pariat. Ibime colloca ubi voles, & mecum om- nibus in rebus liberè agito. In manu tua e- go sum: verte versàque me in omnem partem. Ecce me servum tuum ad omnia paratum: quandoquidem non mihi, sed tibi [utinam di- gnè & perfectè] vivere cupio.

Preces ob Dei voluntatem exequendam.

CAP. XVII.

CONcede mihi, benignissime Jesu, favorem tuum, qui mihi adsit, mecum laboret, me- cum ad finem usque perseveret. Da mihi semper velle & cupere, quæ tibi accepta charaque sint. Tua voluntas mea sit, mea que tuam semper sequatur, & cum ea optimè con- cordet. Sit mihi idem velle & nolle tecum, ita ut nihil nisi quod tu velis aut nolis, ego velle aut nolle queam. Da mihi ut omnibus quæcun-

que sunt in mundo moriar, ac propter te in hoc seculò contemni amem, & nesciri. Da mihi super omnia optata in te acquiescere, animumque pacatum habere: tu vera pax cordis, tu sola requies: extra te omnia dura sunt & inquieta, in hac pace, hoc est, in uno te summo æternoque bono dormiam & requiescam.

Verum solatium in solo Deo esse querendum.

CAP. XVIII.

QUicquid solatii optare aut cogitare possum, id non hîc, sed in futurum expecto, quòd si vel omnia quæ usquam sunt solatia solus haberem, omnibusque deliciis frui possem, certum est eas diu durare non posse. Itaque plenam consolationem consequi, perfecteque recreari non nisi in Deo potes, ô anima mea, in opum consolatore, modestorumque opitulatore. Expecta paulisper, anima mea, expecta divinum promissum, & consequeris in cælo copiam omnium bonorum. Quòd si præsentia ista, intemperantius appetes, æterna cœlestiaque perdes. Sint tibi temporalia in usu, æterna in cupiditate. Nullo tu temporali bono satiari potes, quippe ad quod fruendum non sis creata. Etiam si omnia bona creata haberes, non tamen beata fores: quin in omnium creatore Deo sita est tua felicitas: non illa quidem qualis stultis mundi amatoribus videtur & laudatur: sed qualem expectant boni fidentesque Christi discipuli,

scipuli, qualemque prægustant interdum spirituales & mundi cordis homines, quorum obversatio in cælo est. Vanum & breve est omne humanum solatium: beatum & verum, quod int9 à veritate percipitur. Religiosus homo ubique circumfert consolatorem suum Jesum, eumque sic alloquitur: Adesto mihi Domine Jesu, omni & loco & tempore. Hæc mihi sit consolatio libenter carere, aut si quando aberit tua consolatio, sit mihi tua voluntas, istaque exploratio pro summo solatio. Neque enim, tu is es, qui perpetuò irascaris aut terrefacias.

Omnem sollicitudinem esse Deo committendam.

CAP. XIX.

NAte sine me tecum agere, quod volo: scio. Nego quid è re tua sit. Tu cogitas ut homo, & in multis sic sentis, ut tibi humana mens suadet. S. Domine vera dicis: majorem tu mei curam geris, quàm ego ipse possem, nam caducè sanè stat, qui non omnem suam sollicitudinem tibi committit. Domine dummodò recta firmaque permaneant erga te mea voluntas, utere me arbitrio tuo, nam non nisi bonum esse potest, quicquid de me statueris. Igitur five me in tenebris esse vis, laudo: five me in luce, id quoque laudo. Sive me dignaris consolari, laudo: five rebus adversis vis premi, hoc quoque laudo. D. Nate sic te animatum esse oportet, si mecum cupis habere negotium: nec minus ad

G s

pati-

patiendum quàm ad gaudendum alacris , illibentius inops & pauper, quàm plenus & dives esse debes. S. Domine libenter pro te pariar, quicquid tu mihi evenire volueris : voloque de manu tua bonum juxtà ac malum , dulce ac amarum , lætum ac triste accipere, & pro omnibus quæ mihi acciderint gratias agere. Tuerre me ab omni peccato , & nec mortem nec orcum timebo, modò tu me in perpetuum non repudies, aut de libro vitæ deleas, nulla mihi calamitas nocebit.

Hujus vitæ misérias Christi exemplo ferendas esse a quo animo.

CAP. XX

NAte ego ob salutem tuam de cælo descendi, tuasque misérias non necessitate, sed charitate trahente suscepi, quo tu patientiam disceres , & temporales misérias non indignanter ferres. Nam à qua hora natus sum , donec in cruce vitam finii, nunquam defui re quos ferrem dolores : rerum necessariarum magnam penuriam tuli: multas de me querimonias frequenter audiui: ignominias & probra comiter tuli: pro beneficiis ingritudinem reportavi: pro miraculis maledicta : pro doctrina reprehensiones. S. Domine, quandoquidem tu te in vita patientem præbuiſti (in quo quidem maximè patris tui præceptum exequutus es) æquum est ut miser ego & nocens secundum voluntatem

luntatem tuam patientem me præbeam , ac quamdiu ipse voles, vitæ mortalis onus pro salute mea portem. Nam etsi onerosa sentitur vita præsens, tamen tuo jam beneficio facta est levior , & tum tuo exemplo , tum sanctorum tuorum vestigiis tolerabilior, infirmis clarior, quàm & multo magis consolatoria, quàm fuit olim in lege veteri , quum & cœli porta clausa manebat , & obscurior via videbatur , & tam pauci regnum cœleste quærere curabant ; quin etiam qui tunc iusti servandique erant , ii ante supplicium tuum , sacræque mortis meritum in cœleste regnum intrare non poterant. Quam ego tibi gratiam debeo , quod tum mihi, tum cunctis fidentibus rectam bonamque ad æternum regnum tuum viam dignatus es ostendere ? Nam via tua, via nostra est , & per sanctam patientiam ad te , coronam nostram, contendimus : qui nisi nos antecessisses atque docuisses, quis sequi curaret ? quam multi non solum pone, sed etiam procul manerent, nisi tua præclara ista exempla inspicerent. En etiam tuis tot signis & præceptis auditis , tamen tepidissimi sumus , quid fieret si tantum lumen ad te sequendum non haberemus ?

De injuriarum tolerantia, & quemnam verè patientem esse constet.

CAP. XXI.

Quidnam istud est quod loqueris, fili? desine con-

conqueri : considera tam meum tum cæterorum sanctorum supplicium , nondum ad sanguinem usque restitisti. Parum est quod tu pateris; si cum illis conferaris , qui tam multa passi sunt , tam vehementer tentati , tam graviter afflicti , tot modis explorati & exercitati. Itaque tibi in memoriam revocandi sunt aliorum casus graviores, ut levius feras tuos tantulos, aut si tibi tantuli non videntur , vide ne & hoc tua faciat impatientia : atque omnino sive parvi sunt , sive magni , da operam ut omnes patienter feras. Nam quanto te melius ad patiendum composueris , tanto & sapientius egeris, & majora mereberis, & facilius feres, animo & usu ad hoc non segniter paratus. Neque verò ita dixeris: Hoc ab illo homine pati nec possum nec debeo, nam & grave damnum intulit, & quæ nunquam cogitavi, de aliis me criminatur : ab alio quidem libenter feram quæ ferenda videro. Insipientiæ est ista cogitatio, neque patientiæ virtutem considerat, nec à quo coronanda sit, sed magis personas & illatas sibi injurias perpendit. Non verè patiens est, qui non nisi quantum & à quo libeat, vult pati. At verè patiens homo nihil pensi habet à quonam homine : majore ne, an æquali , an inferiori : bono ne & sancto , an perverso & improbo exerceatur : quin quicquid ei ab ullo mortalium adversi infertur , quantum & quotiescunque id fit, id grato animo, ceu de Dei manu accipit, &
in

in lucro ponit: quia nihil tantum tantulumve est, si id pro Deo patiatur, quin mercedem mereatur. Quapropter esto ad pugnam accinctus, si vis potiri victoria. Sine certamine quidem patientiæ coronam nunquam obtinebis. Quod si pati non vis, coronari recusas: si coronari cupis, viriliter certato, pugnamque patienter sustineto. Nam nec sine labore requies, nec sine pugna paratur victoria. S. Effice Domine, ut tuo beneficio præstare queam, quod natura posse non videor. Scis me alioquin parum posse pati, & vel levi casu facilè dejici: fac ut mihi omnis rerum adversarum miseria pro tuo nomine amabilis sit & optanda: nam pro te pati & vexari, est animæ meæ admodum salutare.

*De infirmitatis suæ confessione, & hujus
vitæ miseriis.*

C A P. XXII.

Injustitiam infirmitatemque meam tibi, Domine, confitebor. Sæpe me parvares dejicit, & mœrore afficit. Interdum fortem me præstare statuo: & mox velexiguo casu tentatus, in magna verfor angustia. Nonnunquam ex re vilissima existit gravissima tentatio: ac quæ me, quum eam non sentirem, non intuitum esse putavi, idem me nonnunquam levi statu penè labefactari video. Quamobrem aspice, Domine, humilitatem fragilitatemque meam tibi
cogni-

cognitissimam: miserere mei, meque ex hoc clu-
to eripe, ne submersus funditus peream. Urit
hoc me subinde, & coram te pudefacit, quòd
tam sum caducus, & ad resistendum perturba-
tionibus infirmus: quæ etsi me non omnino
ad assensionem pertrahunt, tamen mihi mole-
sta & gravis est earum infestatio, tædetque ad-
modum sic quotidie in lite vivere. Atque hinc
mihi perspicua fit infirmitas mea, quòd me mul-
to facilius invadunt sceleratæ cogitationes,
quàm discedunt. Utinam tu meos labores &
dolores, ô fortissime Deus Israelitarum, & fide-
lium animarum cupidissime, respicias, meaque
cœpta omnia secundes. Robora me cœlesti
fortitudine, ne vetus homo, misera caro, spiri-
tui nondum planè subiecta, dominetur, adver-
sū quam certandum erit, quamdiu in hac miser-
rima vita spirabitur: miserrima, inquam, quip-
pe in qua nunquam desint calamitates & mise-
riæ, in qua plena laqueis & hostibus sint omnia.
Nam succedunt tentationes tentationibus, quin
etiam adhuc durante priore conflictu, super-
veniunt nec opinanti plures alii. Potestne i-
gitur amari vita, quæ tot habet amaritudines,
totque calamitatibus & miseriis subiecta est?
aut potestne etiam vita dici, quæ tot mortes
pestesque gignat? Et tamen amatur, & in ea
voluptates multi consecuntur. Vituperatur
frequenter mundus, quòd tam fallax sit & va-
nus: nec tamen facilè relinquitur, nimium do-
minan-

minantibus carnis cupiditatibus. Nimirum alia ad eum amandum, alia ad contemnendum alliciunt, ad amandum allicit carnis oculorumque cupido, & vitæ superbia: ejusdem odium tridiumque pariunt pœnæ & miseriæ subsequentes. Sed vincit, proh dolor, voluptas pravam mentem mundo addictam, ita ut sensuum titillarionibus delinita retineatur, quando Dei suavitatem, interioremque virtutis dulcedinem neque vidit, neque gustavit. Verùm qui mundum planè contemnunt, & Deo sub sancta disciplina vivere student, ii divinam dulcedinem iis qui seipso verè abnegaverint, promissam non ignorant, & quàm graviter mundus erret, quamque variè fallatur, vident.

In Deo supra omnia bona donaque acquiescendum esse. CAP. XXIII.

Supra omnia & in omnibus semper in Domino acquiesce, anima mea : siquidem ipse est sanctorum æterna requies. Da mihi, dulcissime & amantissime Jesu, in te supra omnem rerum naturam acquiescere : supra omnem salutem & pulchritudinem, supra omnem glóriam & honorem, supra omnem potentiam & dignitatem, supra omnem scientiam & solertiam, supra omnes divitias & artes, supra omnem lætitiâ & exultationem, supra omnem famam & laudem, supra omnem suavitatem & solatium, supra omnem spem & promissionem,
supra

supra omne meritum & cupiditatem, supra omnia dona & munera, quæ tu dare potes & fundere, supra omne gaudium & jubilum, quod mens capere potest & sentire, denique supra omnes angelos & archangelos, supra omnem cæli exercitum, supra omnia visibilia & invisibilia, & supra quicquid tu, mi Deus, non es. Nam tu mi Deus omnium optimus es: tu solus potentissimus: tu solus copiosissimus & plenissimus: tu solus suavissimus & solatii efficientissimus, tu solus pulcherrimus & amabilissimus: tu solus omnium nobilissimus & gloriosissimus: in te unò omnia bona, eaque perfecta & sunt & fuerunt & futura sunt: ideoque & minus & parum est quicquid tu præter te ipsum mihi donas, aut de te ipso patefacis promittisve, non viso nec plenè adepto. Siquidem non potest animus meus verè quiescere, nec eo quod adest, satis contentus esse, nisi omnia dona omnemque rerum naturam prætergressus, in te acquiescat. O mi dulcissime sponse Jesu Christe, amator purissime, dominator universi, utinam veræ libertatis alas habeam ut ad te volem, & in te requiescam. O quando licebit planè vacare mihi, & videre quàm tu sis suavis, Domine mi Deus? Quando tandem me in te planè colligam, ita ut præ tui amore non jam me ipsum, ad te solum incredibili sentiendi modo, eoque non cuivis cognito, sentiam? Nunc frequenter gemo, & infelicitatem meam cum dolore fero, quia
multa

multa mala in hac miseriarum valle occurrunt, quæ me sæpius conturbant, contristant, obnubilant, sæpius impediunt, distrahunt, alliciunt, implicant, ne liberum ad te aditum habeam, neve jucundis fruam amplexibus, præsens semper beatis spiritibus. Moveant te mea tot suspiria, tot ærumnæ, quas in terris perfero.

O Jesu splendor æternæ gloriæ, solamen peregrinantis animæ, apud te est os meum vocis expers, teque meum alloquitur silentium. Quousque tardat adventum suum Dominus meus? veniat ad me pauper culum suum, lætumque faciat: & porrecta manu miserum ex omni angustia eripiat.

Veni, veni: nam sine te nulla dies, hora nulla erit quieta, quippe qui mea sis lætitia, sine quo vacua est mens mea.

Miser ego sum, & nescio quo pacto quasi carcere compedibusque premor, donec tu me luce præsentis tuæ reficias, ac libertate dones, amicumque vultum ostendas. Quærant alii pro te quicquid libuerit: mihi quidem aliud nihil nec placet nec placebit, nisi tu, mi Deus, mea spes & salus æterna. Nunquam tacebo, nunquam precari desinam, donec tuus revertatur favor, meque domi alloquaris. JESUS. En adsum ego tibi, quia me invocasti: tuæ me lachrymæ, animique cupido & dejectio atque angor, ad te me commovendo devocarunt. S. Ego te Domine, tui fruendi cupidus invocavi, propter

H

teo-

te omnia respuere paratus. Tu enim prior me ad te quarendum excitasti: qua equidem dere tibi, Domine, grátias ago, qui pro tua singulari misericordia tum me tanto affeceris beneficio. Denique quid pluribus opus est, aut quid superest, nisi ut me tibi modestissimè submittam, injustitiæ vilitatisque meæ perpetuò memor? Tui enim nullus usquam in omnibus, quæ cælo terraque admiranda continentur, similis est. Tua opera supra modum bona sunt, Domine, sententiæ veræ, & providentiæ tuæ reguntur universa.

Quamobrem laudibus & gloria afficiar, ô patris sapientia! te animusque osque meum unâ cum universa rerum natura collaudet atque concelebre.

De tot Dei beneficiorum recordatione.

CAP. XXIV.

APeri, Domine, meæ mentis oculos, meque secundum legis tuæ præcepta vivere doce. Effice ut voluntatem tuam intelligam, magnæque cum reverentia ac diligenti consideratione tua cum in universos tum in me collata beneficia recolam, ut inde dignas tibi gratias agam. Quanquam, ut verum fatear, ne minimam quidem eorum partem laudibus æquare possim, tantumque abest ut tot collatis in me bonis par sim, ut dum liberalitatem tuam confidero, præ ejus magnitudine deficiat me spiritus. Nam quæ-

quæcunque vel animi vel corporis, siue extra siue intus, tum naturaliter tum contra naturam possidemus, tua sunt beneficia, tuamque beneficentiam, benignitatem, bonitatem commendant, à quo bona omnia acceperimus. Quòd si alius alio plura aut pauciora accepit, omnia quidem tua sunt, & sine te ne minimum quidem haberi potest. Quòd si quis majora adeptus est, non potest de merito suo gloriari, neque se supra cæteros extollere, aut minori insultare: siquidem tanto quisque major meliorque est, quanto sibi minus adscribit, quantoque est in agendis gratiis modestior & religiosior: ac quò se quisque magis omnium vilissimum indignissimumque existimat, eo est maioribus obtinendis aptior. Rursum si quis pauciora adeptus est, dolere, aut id indignè ferre, aut ditiori invidere non debet, sed te potius intueri, tuamque bonitatem maximè laudare, quod tam copiosè, tam libenter, nullo personarum discrimine, tua largiaris. A te omnia, ideoque in omnibus laudandus es: ac quid cuique donari expediat, tu scis: & cur hic minus, ille plus habeat, dijudicare non nostrum, sed tuum est, quicquid cuique conveniat, perspectum habes. Itaque, Domine Deus, magni etiam beneficii loco habeo, non multa habere quæ humano more laudanda & gloriosa esse videantur: atque ita censeo, debere homines sua vilitate & inopia non modò non angere & dolere, animumque deicere, verum etiam ma-

gnum inde solatium hilaritatemque percipere: quia tu, Deus, inopes & humiles, vulgoque despectos, tibi familiares domesticosque cooptes. Testes sunt ipsi apostoli tui, qui à te totius orbis principes constituti, ita modestos, ita simplices se & omnis malitiæ dolique expertes præstiterunt, ut non modò à querelis abstinerent, verum etiam contumeliis pro tuo nomine affici se gauderent, & à quibus homines abhorrent, ea ipsi avidissimè amplexarentur. Nihil ergo tui amatorem tuorumque beneficiorum agnoscen-tem, æque exhilarare debet, ut tuæ voluntatis, æternique decreti cognitio, quo quidem ita contentus esse, itaque id boni consulere debet, ut non minus minimum, quàm alius maximum se esse cupiat, nec minus infimum, quàm summum locum boni consulat, nec minus libenter despectus sit & abjectus, nulliusque nominis homuncio, quàm vel omnium illustrissimus atque maximus. Nam voluntas tua, & amor honoris tui, omnia superare debet, eumque magis consolari, & ei magis placere, quàm omnia in ipsum vel collata vel conferenda beneficia.

De quatuor pacem conciliantibus.

CAP. XXV.

Nunc te, fili, viam veræ pacis & libertatis docebo. S. Fac Domine quod dicis: nam istud audire mihi gratum est. D. Da operam, fili, ut alterius potius, quàm tuam voluntatem

tatem facias. Semper minus quàm plus habere malis. Semper infimum locum quære, & omnibus parere cupias. Semper opta oraque ut Dei voluntas in te planè fiat. Hæc qui præstat, eum scito in fines pacis & quietis ingredi. S. Domine iste tuus sermo multum continet perfectionis : estque dictu exiguus ille quidem, sed & mente plenus, & fructu copiosus. Quòd si ei fideliter obtemperem, equidem non tam facilè existeret in me perturbatio : ac quories me impacatum pravatumque sentio, ab hac doctrina me deflexisse comperio. Sed tu qui omnia potes, & humanæ animæ profectum semper amas, auge tuam erga me beneficentiam, ut & tua dicta exequi, & salutem assequi valeam.

Precatio adversus malas cogitationes.

CAP. XXVI.

Domine mi Deus, noli à me discedere : mi Deus, vide ut mihi opem feras : nam existunt in me pravæ cogitationes, & timores qui animum meum vexent : quas ego cogitationes quonam pacto illæsus transeam aut perfringam ? D. Ego tibi præibo, humanamque potentiam deprimam : & aperto carceris ostio arcana abditaque tibi pandam. S. Ita facito, Domine, omnesque parvas cogitationes tuo vultu fugato. Hæc mihi unica spes est & consolatio, ad te in omni calamitate confugere, tibi confidere, te

te intimis sensibus invocare, & patienter consolationem tuam expectare.

Preces ad mentis illuminationem obtinendam.

CAP. XXVII.

Collustra me, bone Jesu, splendore luminis æterni, & ex animi mei quasi domicilio dissipa tenebras universas. Cohibe tot evagationes, & violentas tentationes retunde. Pugna pro me fortiter & expugna malas bestias, nempe illecebrarum cupiditates, ut virtute tua pax fiat, sanctaque aula, hoc est, mundatus animus meus, laudibus tuis personet. Impera ventis & tempestatibus, jube mare pacari, jube flatum aquilonis sedari, & erit magna tranquillitas. Mitte lucem veritatemque tuam, quæ terram collustret: nam ego terra sum rudis & iners, donect tu me illumines. Effunde favorem tuum desuper: perfunde animum meum beneficentia cœlesti: suppedita religionis aquam, quæ irrigata terræ superficie bonum, vel potius optimum fructum eliciat. Eleva mentem pressam mole peccatorum, & ad cœlestia totam cupiditatem meam suspende, ut gustata suavitate supernæ felicitatis, tædeat de terrenis cogitare. Eripe, vel potius rape me ex omni rerum humanarum non durabili consolatione: nam appetitum meum planè sedare & solari nulla res creata potest. Junge me tibi indissoluto amoris vinculo: nam tu solus

lus amanti sufficis , & absque te frivola sunt universa.

*De vitanda curiosa inquisitione in vitam
alterius. CAP. XXVIII.*

NAte noli esse curiosus, supervacaneas habere sollicitudines : quid hoc aut illud ad te ? tume sequere. Quid enim tua refert, qualis quisque sit, quidve quisque agat aut loquatur ? Non necesse habes , aliorum causam agere : pro teipso rationem reddas oportet, quid ergo te alienis implicas ? Ego omnes novi , & omnia quæcunque sub sole sunt, video : ac quomodo cum quoque agatur scio, quid cogitet, quid velit, & quò tendat ejus consilium. Itaque mihi committenda sunt omnia : tu pacem colito, & inquietos quidlibet agitare finito , suorum omnium factorum dictorumque rationem utique reddituros, neque enim fallere me possunt. Néve magni nominis umbra , néve multorum familiaritas, néve privata hominum amicitia tibi sit curæ. Nam animi distractiones ista gignunt , eumque atra caligine circumfundunt. Equidem libenter tibi dicta mea eloquerer, & arcana detegerem, si adventum meum diligenter observares, & animi ostium mihi aperires.

In quibusnam firma pax animi, verusque profectus consistat. CAP. XXIX.

Flli, ego sic loquutus sum: Pacem relinquo vobis, pacem meam do vobis , non quomodo

mundus dat, ego do vobis. Pacem omnes cupiunt: sed quæ ad veram pacem necessaria sunt, non omnes curant. Pax mea cum modestis, & animi mansueti hominibus rem habet. Pax tua in magna patientia sita est, eaque multa frui tibi licebit, si me audieris, & vocem meam sequutus fueris. Quamobrem omnibus in rebus attende quid agas aut dicas, & hoc unum age, ut mihi placeas, & extra me nihil cupias aut quæras. De aliorum quidem dictis factisque nihil temerè judices, nève rebus tibi non commissis te implices, hac ratione fiet, ut & parum & rarò turberis. Nam nullam unquam sentire perturbationem, nec ulla animi aut corporis affici molestia, præsentis temporis non est, sed status æternæ quietis. Quare ne existima te veram pacem invenisse, si nihil molesti sentis: aut totum esse bonum si nullum pateris adversarium: aut perfectum, si omnia ex animi tui sententia succedunt: neve te magni aliquid esse putes, aut unicè amari existimes, si in magna religione versaris & dulcedine. Neque enim ex istis cognoscetur verus amator virtutis, nec in istis consistit hominis profectus & perfectio. In quonam igitur? nimirum in offerendo te ipsum toto animo voluntati divinæ, nullaque in re tanta tantulave, nec in tempore nec in æternitate tibi ipsi studendo: ita ut inter prospera & adversa eundem vultum cum gratiarum actione perpetuò retineas, omnia æqua lance pensando. Denique

que si tam fortem te tamque perseverantis fidei præstiteris, ut subtracta interiori consolatione animum tuum vel ad majora perferenda præpares, nec te justum sanctumque prædices atque collaudes, fiet ut veram rectamque pacis viam gradiare, sitque indubitata spes fore ut rursus vultum meum cum læto cantu videas. Quod si ad plenum tui contemptum perveneris, scito futurum esse ut pace tanta frui, quanta maxima cadit in istam mortalitatem.

De libera mentis excellentia: itemque supplicem precationem præstare lectioni.

CAP. XXX.

Est hoc sanè opus perfecti viri, Domine, nunquam cœlestium rerum tractatione animum relaxare, & inter multas curas quasi sine cura transire, non more torpentis, sed præstabilitate liberæ mentis, nihil humanæ rei intemperatio-
re cupidine adhærendo. Obsecro te, mi clementissime Deus, tuere me ab hujus vitæ curis, ne tot corporis necessitatibus nimis implicer, néve earum rerum quæ animæ officiunt, voluptate capiar, néve molestiis fractus dejiciar. Non de rebus illis loquor, quas toto animo ambit mundana levitas: sed de miseriis illis, quæ animum meum communi mortalitatis infelicitate pœnali gravant, retardantque quo minus in libertatem spiritus quoties libet, intrare queat. O mi Deus, dulcedo ineffabilis, verte mihi in

H.

amari-

amaritudinem omne carnale solatium, quod ab æternorum amore me abstrahit, intuitu nescio cujus præsentis delectantisque boni allicit. Ne me vincat, mi Deus, ne vincat caro & sanguis, ne me mundus ejusque brevis gloria decipiat: ne me diabolus astutia sua supplantet. Da mihi ad resistendum fortitudinem, ad tolerandum patientiam, ad perseverandum constantiam. Da pro omnibus mundi solatiis suavissimam tui spiritus unctionem: & pro carnali amore infunde tui nominis amorem. Ipse cibus & potio, & vestis, & cætera ad corporis alimoniam necessaria, ardenti spiritui sunt onerosa. Effice ut hujusmodi alimentis temperatè utar, non cupidine eorum nimia implicer. Omnia quidem abjicere non licet, quippe cum sustentanda sit natura: rursus superflua & jucundissima quæque appetere, lex sancta vetat: nam alioquin caro adversus spiritum insolesceret. Inter hæc quæso manus tua me regat & doceat, ne quid nimium fiat.

Amore sui à summo bono maximè retardari homines.

CAP. XXXI.

Flli, totum toto emas oportet, neque quicquam tui retineas, nam ut hoc scias, plus tibi nocet amor tui, quàm quicquid usquam est: fitque ut secundum eum quem geris amorem & cupiditatem, res magis minusve adhæreat.

Quòd

Quòd si puro, simplici, temperato amore præditus eris, carebis servitute rerum. Noli concupiscere quod non licet habere. Noli habere quod te impedire, & animi libertate privare potest. Mirum quòd non te ipsum cum omnibus quæ optare, aut habere potes, mihi toto animo penitus committis: cur vano mœrore consume-
ris? cur superfluis curis fatigaris? Præbe te arbitrio meo obtemperantem, & nullum pati-
re detrimentum. Nam si, ut commoda tua com-
pares, optatisque potiare, animum rebus quæ ren-
dis applicueris, locumque mutare concupive-
ris, nunquam quietem assequeris, nec à solici-
tudine liber eris, nam in omni re erit quod desi-
deres, & in omni loco erit qui adversetur. Ju-
vat igitur res quæque, non adepta aut copiosè
aucta, sed potiùs contempta, & ex animo radi-
citùs excisa: id quod non tantùm de censu æ-
ris aut divitiarum dictum accipias velim, verum
etiam de honoris ambitione, vanæque laudis
cupiditate, quæ omnia cum mundo intereunt.
Locus quoque hominem parum munit, si deest
ardens spiritus: nec diu consistit pax illa ex-
trinsecus quæsitæ, si vacat vero fundamento
constitutionis animi: hoc est, nisi in me steteris,
locum non animum mutaveris. Nam orta
sumptaque occasione non solùm quæ fugeris,
sed etiam plura invenies.

*Preces ad animi mundiciem, cœlestemque
sapientiam obtinendam.*

CAP. XXXII.

Confirma me, Deus, dono sancti spiritus :
Da mihi virtutem tantam, ut corroborato in-
teriore homine, animum ab omni inutili solici-
tudine & languore evacuem, nec ullius rei, five
vilis, five pretiosæ, variis cupiditatibus trahar :
sed & me ipsum & cætera omnia pro perituris
habeam: quandoquidem nihil sub sole perpetu-
um est: quin vana sunt omnia, & animi excru-
ciantia. Hæc qui sic accipit, is inprimis sapit.
Da mihi, Domine cœlestem sapientiam, ut te su-
pra omnia quærere & invenire: te supra omnia
sapere & diligere, & cætera secundum ordinem
sapientiæ tuæ uti sunt, sic accipere condiscam.
Da & prudenter declinare adúlantes, & patien-
ter ferre adversantes: nec quavis verborum
aura moveri, nec aurem blandienti præbere Si-
reni: ea demum sapientia est, atque ita demum
tutò pergitur cœpta via.

In maledicos. CAP. XXXIII.

Flli, si qui de te malè senserint aut dixerint, id
tu ægrè ferre noli: quin ipsèmet de te ipso
deteriora sentito, & neminem te infirmio rem
esse credito. Si animi occulta virtutis via ince-
des, volantia verba haud magni pendes. Est
non parva prudentia filere adverso tempore, a-
nimumque suum ad me convertere, nec huma-
no ju-

no iudicio perturbari. Non in hominum sententia tibi debet esse posita pax: apud quos sive bene, sive malè audias, non idcirco es alius. In me, in me, inquam, vera gloria veraque pax sita est, eaque multa fruetur, si quis hominibus nec placere concupiverit, nec displicere metuerit. Ex intemperato quidem amore, & vano timore oritur animi omnis inquietudo, sensuumque distractio.

*In rebus adversis quomodo sit invocandus
laudandusque Deus.*

CAP. XXXIV.

Collaudetur nomen tuum, Domine, in perpetuum, qui me hac calamitate tentari volueris: quam equidem effugere non possum, sed ad te confugere necesse habeo, ut me adjuves, & hæres mihi ut bono sit efficias. Domine nunc in calamitate sum, nec animo meo bene est, quin præsentī casu multum vexor. Itaque quid dicam, pater charissime? teneor angustiis: vindica me ab hac hora, in quam quidem ideo veni, ut tu celebreris, me tantopere depresso, deinde tua ope liberato. Quæso te, Domine, ut me ex hoc malo velis eripere, inopem, & sine te quò me vertam nescientem. Da mihi, Domine, nunc quoque patientiam, adjuva me, mi Deus, & feram vel gravissimos casus intrepidè. Enimverò inter hæc quid dicam? Domine fiat voluntas tua, ego malum hoc atque angorem

rem sum sanè meritis, ideoque mihi ferendum est (atque utinam id patienter faciam] donec finita tempestate lætiora succedant. Potest autem omnipotens manus tua hanc quoque tentationem à me amovere, & ejus impetum mitigare, ne planè succumbam, quemadmodum antea quoque sæpe mecum egisti, mi Deus, pro tua erga me misericordia. Quanto autem difficiliore casu premor, tanto suavius ope tuæ suæ premæ dexterae recreabor.

*De divino petendo auxilio, & confidentia
recuperanda gratia.*

CAP. XXXV.

NAte, ego sum Dominus ille hominum confirmator in rebus adversis, ad quem tu te recipias si quando tibi non bene est. Illud autem cœlestem consolationem maximè impedit, quòd tu te tardius ad preces convertis. Nam antequam me sedulò ores, multa interim solatia quæris, teque rebus externis recreas, ideoque fit ut parum profint omnia, donec advertas eum esse me, qui eos ex malis eripiam, qui spem suam in me collocarunt, extra quem nullum validum sit auxilium, nec utile consilium, nec durabile remedium. Sed jam resumpto spiritu, post tempestatem rursus convalesce in luce meæ misericordiæ, nam præstò adsum (inquit Dominus) ad universa non solum in integrum restituenda, verùm etiam cumulatè instauranda.

da. Nunquid mihi quicquam est difficile? aut eorum similis sum, qui promissa non præstant? ubi est fides tua? ita firmiter & perseveranter: præsta te virum tolerantem atque fortem, aderit tibi suo tempore consolatio. Expecta, expecta me, veniam & te curabo, tentatio est quæ te vexat, & sollicitudo vana, quæ exterreret: quid confert sollicitudo de futuris casibus, nisi ut dolorem super dolorem habeas? Satis est suum di-ei malum: vanum est & inutile de futuris vel turbari, vel lætari, quæ forsitan nunquam evenient. Sed humanum est hujusmodi imaginationibus illudi, & parvi adhuc animi signum tam facile hostis sollicitudine trahi. Ipse quidem verisne an falsis illudat ac decipiat, & præsentiumne amore, an futurorum formidine proster-nat hominem, nihil pensi habet.

Quare noli animo turbari aut formidare: crede mihi, & in misericordia mea fiduciam habeto. Sæpe tibi propè adsum, quum tume procul abesse putas, quumque omnia tibi peris-sisse arbitraris, sæpe tanto majus instat lucrum. Non idcirco perierunt omnia, si res in contrari-um cecidit. Non debes ex præsentium malorum sensu judicare, neque orta alicunde calamitate sic affici, atq; percelli, quasi spes omnis sublata sit emergendi. Noli te prorsus derelictum pu-tare, si quando ego tibi ad tempus vel calamita-tem misi, vel etiam optatam subtraxi consolatio-nem: sic enim pergitur ad cœleste regnum:
&

& hoc profectò magis è re tua est, cæterorumq; cultorum meorum ut adversis excitemini, quàm si vobis omnia ex animi sententia succederent. Ego abditas cogitationes ita novi, ut sciam tuæ salutis magnopere interesse, ut interdum in tristibus relinquere, ut fortè secundo successu elatus in eo tibi placeas, quod non es. Ego quod dedi auferre, & iterum reddere possum quando libet. Si dedi, meum est: si ademi, tuum non ademi, cùm omne munus bonum perfectumque donum meum sit. Igitur si quando tibi mali adversique aliquid mitto, noli indignari, aut animo concidere: ego idem te citò sublevare, & omnia tristitia in gaudium mutare queo. Cæterum in eo quod sic tecum lango, iustus sum, multumque commendandus, quòd si sapias, & factum hoc meum verè perpendis, nunquam ob res adversas tam dejectè dolere debes, sed potius gaudere, & mihi gratias agere: quinimò hoc unicè gaudendum judicare, quòd ego te doloribus affligens tibi non parco. Sicut dilexit me pater, ego vos diligo, dixi meis illis charissimis discipulis, quos utique non ad peritura gaudia misi, sed ad magna certamina: non ad honores, sed ad infamiam: non ad otium, sed ad labores: non ad requiem, sed ad copiosum fructum cum patientia ferendum. Horum memento, fili mi, verborum.

*De spernendis omnibus rebus humanis, ut
creator possis inveniri. CAP. XXXVI.*

MI Domine, longè majore adhuc tuo favore indigeo, ut quidem eò perveniam, ut me neque hominum quisquam, neque res ulla creata possit impedire. Nam quamdiu meres ulla retinet, ad te liberè volare nequeo. Cupiebat ille liberè volare, qui dicebat, Utinam columbæ ritu alas habeam, ut in quietem avo-lem. Quid simplici oculo quietius? aut quid eo liberius, qui in terris nihil concupiscit? Oportet igitur omnes pertransire res creatas, & seipsum eò usque promovere, ut extra seipsum raptus homo, videat te conditorem nihil cum rebus creatis habere simile. Quòd nisi ab omnibus rebus creatis sit expeditus homo, divinis liberè vacare non potest. Ideò enim pauci extant rebus divinis contemplandis addicti, quia pauci à perituris rebus humanis se totos se-movere sciunt, quam quidem ad rem magno opus est favore divino, qui animum attollat, & supra seipsum rapiat. Atqui nisi homo spiritu attollitur, & ab omnibus rebus humanis liberatus, totus Deo conjungitur, haud magni ponderis est quicquid vel scit, vel habet. Diu parvus erit, & humi jacebit, qui rem ullam magni æstimat præter unum immensum æternum bonum. Quicquid quidem Deus non est, id nihil est, proque nihilo ducendum. Multum sanè
I dif-

differt inter hominis divinitus illuminati ac religiosi sapientiam, & literati eruditique scientiam: estque multò nobilior illa doctrina quæ supernè manat ex divina scaturigine, quàm quæ humano ingenio laboriosè quæritur. Existunt equidem multi rem divinam contemplandi cupidi: sed qui quæ ad eam rem necessaria sunt, exercere non studeant. Est & illud magnum impedimentum, quòd in signis & rebus sensibilibus statur, & perfectæ interfectioni sui exigua opera impenditur. Nescio quid sit, & quo spiritu ducamur, & quid nobis in mentem veniat, qui spirituales dicimur, quòd summa ope & sollicitudine in res perituras atque viles incumbimus: iidemque de animi nostri negotiis vix rarò collectis plenè sensibus cogitamus. Quid quòd post exiguam collectionem statim foras erumpimus, nec opera nostra severiori examinatione trutinamus? Ubinam versentur affectus nostri non attendimus, & quod tam impura sint omnia nostra non deploramus. Sunt enim omnium hominum corrupti mores, quæ olim causa fuit tanti diluvii. Corrupto igitur intus affectu, necesse est ut & sequens actio, index vacuitatis vigoris, corrumpatur. Nam ex puro animo bonæ vitæ fructus proficiscitur. Quantum quis faciat quæritur: sed quanta virtute faciat, non tam studiosè perpenditur. Num dives sit, num fortis, num pulcher, num strenuus, bonusque scriptor,

ptor, aut cantor, aut agricola, investigatur: quàm pauper sit spiritu, quàm patiens & mitis, quàm religiosus & interior, à multis tacetur. Natura hominis exteriora intuetur: gratia ad interiora se convertit: illa frequenter fallitur, hæc in Deo spem habet, ne decipiatur.

*De sui abnegatione, & omnis cupiditatis
abdicatione. CAP. XXXVII.*

Nate libertatem perfectè adipisci non potes, nisi te ipsum totum abneges. Captivi sunt omnes avari & sui amantes, cupidi, curiosi, vagi, voluptatum non Jesu Christi semper studiosi, & sæpè non statura molientes, quippe cùm periturum sit quicquid ex Deo ortum non est. Accipe breve absolutumque dictum: Omnia relinque, & omnia invenies, relinque cupiditatem, & invenies requiem. Hoc mente pertracta, & postquam omnia impleveris, intelliges. S. Domine non est hoc opus unius diei, aut puerorum ludus: quin in eo paucis comprehenditur omnis religiosi hominis perfectio. D. Nate, non protinus averti, aut animum despondere debes, audito nomine perfectionis: sed potiùs ad sublimiora provocari, & ad ea saltèm cupiditate suspirare. Utinam eo loco essent restuæ, eoque pervenisses, ut tui ipsius amans non esses, sed arbitrio meo planè pareres: ita fieret ut mihi valdè placeres, omnemq; vitam cum gaudio & pace transfigeres.

Habes adhuc multa relinquenda, quæ nisi mihi prorsus tradideris, non adipisceris quod postulas. Suadeo tibi ut à me emas aurum igne candens, quo locuples fias: hoc est sapientiam cœlestem, omnia humilia conculcantem. Abjice terrenam sapientiam, hoc est, desine tibi humano more placere & blandiri. Dixi tibi vilissima emenda pretiosis, & quæ in rebus humanis magni fiunt Nam vilis & parva, ac penè oblivioni tradita videtur illa vera cœlestis sapientia, quæ sibi non multum arrogat, nec in terris magni cupit fieri: quam quidem multi ore prædicantes, vita longè dissentiunt: & tamen ea est pretiosa illa, & multis abdita margarita:

De humani animi instabilitate, deq; Deo sibi unice omnia proponendo.

CAP. XXXVIII.

NAte noli ei in quo nunc es, affectui credere, quippe mox in alium mutando. Quamdiu enim vives, mutabilitati subjectus eris etiam nolens. ut modò lætus, modò tristis, modò pacatus, modò turbatus, nunc religiosus, nunc contra, nunc sedulus, nunc piger, nunc gravis, nunc levis existas. Sed supra mutabilia ista stat sapiens ille & spiritu ritè doctus, non attendens quid in se sentiat, aut qua parte flet ventus instabilitatis, sed omne mentis institutum ad quem debet finem, hoc est, ad optimum intendens. Nam ita fit ut possit homo hujusmodi idem-

demque inconcussus permanere, simplici intentionis oculo per tot & tam varios eventus ad me sine intermissione directo. Quantò autem purior est intentionis oculus, tantò constantius inter diversas itur procellas, sed in multis caligat ille oculus, facilèque in objectam aliquam voluptatem intuetur, ut rarò reperiatur qui ab amoris sui nævo totus sit immunis. Sic Judæi olim Bethaniam ad Martham & Mariam venerant, non propter Jesum tantum, sed ut Lazarum viderent. Mundandus ergò est intentionis oculus, ut simplex sit & rectus, atq; ultra omnia quæ varia interveniunt, ad me dirigendus.

Deum amanti, supra omnia & in omnibus esse jucundum.

CAP. XXXIX.

ECce Deus meus & omnia : quid amplius volo ? aut quid felicius optare possum ? O sapidum & dulce verbum ; sed amanti verbum non mundum, nec ea quæ in mundo sunt. Deus meus & omnia : intelligenti satis dictum est : & idem sæpè repetere, jucundum est amanti. Te siquidem præsentè jucunda sunt omnia : eodem absente molesta. Tu animum efficis tranquillum & magnam pacem festinamq; lætitiā. Tu facis ut de omnibus benè sentiat, & in omnibus te laudare : neq; quicquam sine te diu placere potest : quin ut aliquid gratum sapidumq; sit, favor tuus adsit oportet, &c.

& illud sapientia tua condiatur. Cui tu sapias, quid ei non sapiat ? rursus cui tu non sapias, quid ei voluptatem afferre queat ? Sed in tua sapientia deficiunt mundi sapientes, & qui carnem sapiunt: quippe hic mors, illic plurima vanitas invenitur. Verum qui te per mundanorum contemptum carnisque interfectionem sequuntur, ii verè sapientes censendi sunt, utpote qui de vanitate ad veritatem, de carne ad spiritum transferantur. His sapit Deus: & quidquid in rebus creatis extat, id totum referunt ad laudem conditoris. Dissimilis tamen est, & quidem admodum dissimilis sapor creatoris & creaturæ, æternitatis & temporis, lucis increatæ, & lucis illuminatæ. O æterna lux, & quæ cuncta creata superas lumina, affulge mihi: tuaque coruscatione omnia animi mei intima penetra, expia, exhilara, collustra, vivifica spiritum meum cum suis facultatibus, quò tibi cum gestientis lætitiæ cantu adhærescam. O quando veniet beata illa & optanda hora, qua tu me sic tua præsentia saties, ut mihi sis in omnibus omnia. Hoc quidem quamdiu non dabitur, ne gaudium quidem plenum erit. Adhuc (id quod mihi dolet) vivit in me vetus homo, nondum totus crucifixus, nondum planè mortuus. Adhuc vehementer concupiscit adversus spiritum, bella movet intestina, nec regnum animæ quietum esse patitur. Sed tu qui maris potestati dominaris, eiusq; fluctuum

mo-

motus componis , age adjuva me. Dissipa gentes belli cupidas , easque virtute tua contere : exere magnitudinem tuam , istamque dextram nobilita : nam mihi nulla usquam spes, nullum perfugium est , nisi in te , Domine mi Deus.

*Hanc vitam nunquam à tentationibus esse
intam. CAP. XL.*

NAte nunquam in hac vita periculis carebis, quin quoad vives semper tibi necessaria erunt arma spiritualia. Inter hostes versaris : dextra sinistraque oppugnaris. Itaque nisi undique sapientiæ scuto protegaris, non eris diu sine vulnere. Præterea nisi animum tuum in me defixeris , cum sincera voluntate cuncta propter me patiendi, ardorem istum ferre , aut beatorum palmam consequi nequibis. Quamobrem omnia viriliter pervadas oportet, & valida manu utaris adversus objecta. Nam vincenti datur manna : torpenti verò relinquitur multa miseria. Quod si quæris in hac vita requiem, quomodo tunc pervenies ad æternā? Addice te non quieti, sed patientiæ , quære veram pacem non in terris, sed in cælis : non in hominibus cæterisve rebus humanis , sed in solo Deo. Dei amore debes omnia libenter, subire, labores, dolores, tentationes, vexationes, anxietates, necessitates, infirmitates, injurias , obloquutiones, reprehensiones , depressiones, probra, correctiones, despectiones.

Hæc ad virtutes invitant , hæc Christi tironem explorant , hæc fabricant cœlestem coronam: huic ego homini pro brevi labore æternam mercedem, pro intereunte probro sempiternam gloriam persolvam. Tene putas spiritualia semper habiturum arbitrio tuo solatia ? Non ea fuit olim meorum illorum sanctorum conditio: quin gravia multa, variasque tentationes, & ingentes clades pertulerunt: in quibus tamen omnibus patientes se præstiterunt, Deo magis quàm seipsis confisi, scientes hujus temporis adversa nequaquam esse futuræ ipsorum gloriæ paria. Visne tu statim habere, quod multi post multas lachrymas & labores vix tandem obtinuerunt ? Expecta Dominum, virum te præbe, néve diffidentia cœpto desistito , sed pro Dei gloria corpus animamque constanter impendito. Ego te cumulatissimè remunerabor, tibi que in omni calamitate adero.

Contra hominum vana judicia.

CAP. XLI.

NAte animum tuum in Dominum constanter conjicito , néve humanum judicium metuito, ubi tua te conscientia pium in fontemque pronunciat. Ista pati conducibile beatumque est, neque id modesto animo , & Deo magis quàm sibi metipsi confidenti grave est. Multi multa loquuntur , ideòque eis parum adhibendum est fidei: & ut omnibus satisfiat fieri

fieri non potest. Et quanquam studuit Paulus omnibus placere, seque omnibus omnia præbuit, tamen idem humano judicio censeri minimi facit. Præstitit ille quidem ad aliorum utilitatem salutemque pro virili quod potuit: sed quò minus aliorum judicio damnaretur aut despiceretur, prohiberi non potuit, ideòque totum negotium Deo, qui totum noverat, commisit, & adversus improborum summaque cum licentia mentientium calumnias & maledicta, patientia se modestiaque defendit. Respondit tamen interdum, ne infirmis taciturnitate sua pareret offensionem. Cur tu tandem ab homine mortali damnari reformides? qui hodiè vigens, cras nusquam compareret. Deum time, & homines non expavesces. Quid in te verbis injuriisve potest quisquam? Sibi potius quàm tibi nocet, nec Dei judicium effugere poterit, quicumque tandem ille est. Habe tu Deum ob oculos, & querulis verbis noli contendere. Quòd si in præsentia immerita infamia opprimi videris, id ægrè ferre noli, aut impatientia coronam tuam minuere, sed ad me potius in cælum intueri, qui possum hominem ab omni probro & injuria vindicare, & pro suis quemq; factis remunerari.

De pura integraque traditione sui, ad animi libertatem obtinendam. CAP. XLII.

Nate relinque te ipsum, & me invenies, fac
 I 5 ut

ut nihil tibi vendices : nihil proprium habeas ,
semper lucraberis. Nam majoribus insuper
donabere, simul atque teipsum non revocatur.
rustradideris. S. Domine quoties me tradam,
& in quibus me relinquam? D. Semper & omni
hora, tum in parvis tum in magnis rebus.
Nihil excipio : quin in omnibus nudatum
te inveniri volo. Alioquin quâ possis
esse meus, & ego tuus, nisi sis ab omni pro-
pria voluntate intus forisque spoliatus? Hoc
quantò celerius egeris, tantò melius tecum a-
getur: & quantò plenius & sincerius, tantò &
magis mihi placebis, plus lucrabere. Non-
nulli sese tradunt illiquidem, sed cum aliqua
exceptione. Neque enim plenè Deo confidunt,
ideòque ut sibi provideant dant operam. Alii
primò etiam totos se dedunt: sed postea pul-
sante tentatione ad sua redeunt, ideòque in
virtute minimè proficiunt. Hi ad veram puri
cordis libertatem, & jucundissimum meæ fami-
liaritatis beneficium nunquam aspirabunt, nisi
antegressa fuerit sui integra traditio immola-
tioque quotidiana, sine qua ut Dei conjunctio-
ne fruaris nec sit, nec futurum est. Dixi tibi sæ-
pissimè, & nunc iterum dico: relinque tradeque
teipsum & fruèris alta pace animi. Da totum
pro toto, nihil exige, nihil repete; in me merè &
citra hæsitacionem mane, & me habebis, animo-
que liber, & à tenebris immunis eris. Hoc co-
nare, hoc ora, hoc ut optes operam da-
to, ut

to, ut te ipso planè exutus nudus nudum Jesum sequare, tibiq; mortuus mihi vivas in perpetuum. Tunc abeunt & vanæ imaginationes, & improbæ perturbationes, & curæ superfluae: tunc & immoderatus timor facesset, & intemperans morietur amor.

De rebus externis rite administrandis, deq; confugiendo ad Deum in periculis.

CAP. XLIII.

Nate illud tibi diligenter curandum est, ut in omni & loco & externa actione atq; negotio animum liberum & sui compotem habeas, omniaq; tibi, non te illis subicias, actionumq; tuarum non servus sis aut mancipium, sed dominus, sed rector, sed verè manumissus, & Hebræus, in liberorum Dei sortem libertatemque translatus, qui præsentia calcantes, æterna speculantur, & mortalia sinistro, cœlestia dextro oculo intuentur: quos temporalia non trahunt ad inhærendum: sed potiùs ea ipsi trahunt ad benè serviendum, sicut & à Deo & à summo opifice constituta sunt, qui nihil inordinatum reliquit in rebus à se conditis. Jam verò si in omni casu non rei speciei inhæseris, neq; carnali oculo visa auditave lustraveris, sed in quaq; re protinus in tabernaculum ad consulendum Dominum cum Moyse intraveris, audies nonnunquam divinum responsum, deq; multis tum præsentibus tū futuris doctus redibis. Semper enim Moyses
ad

ad tabernaculum se recepit in dubiis & quæstionibus solvendis, confugitque ad precationis opem, ad pericula hominumque improbitatem propulsandam. Sic & tu in cordis penetrabile debes confugere, divinam opem intentius implorando. Nam propterea deceptos à Gabonitis Josuam cæterosque Israelitas fuisse memoriæ proditum extat, quòd Dominum non prius consuluerunt: sed dulcedini verborum creduli pietatis specie delusi sunt.

Ne importunus sit homo in negotiis.

CAP. XEIV.

NAte causam tuam mihi semper committito: ego eam suo tempore ritè componam. Expecta decretum meum, & senties inde profectum. S. Domine libenter equidem rem omnem tibi committo, quia parum mea proficit cognitio. Atque utinam non sic essem de futuris casibus sollicitus, sed me incunctanter arbitrio tuo subjicerem. D. Nate sæpè rei cujuscumque cupidas homo eam affectat: deinde eandem adeptus aliter sentire incipit: quippe cum durabiles non sint ejusdem rei cupiditates, sed vos ad alia atque alia impellant. Itaque vel in minimis se ipsum relinquere non est minimum, estque verus hominis profectus in sui abnegatione positus, ut qui id præstiterit, is liberrius sit atque tutissimus. Sed antiquus ille hostis omnibus bonis adversans à tentatione nunquam

quam cessat, & noctes diesque graves molitur insidias, si fortè incautos in fraudis laqueum præcipitare possit. Quare vigilate & orate, inquit Dominus, ne intretis in tentationem.

hominem nihil ex seipso habere boni, neque de ullare gloriari posse. CAP. XLV.

Domine quid est homo ut tu sis ejus memor? quid est homine natus, ut eum cures? quid promeruit ut eum favore tuo prosequeris? Domine quid possum conqueri, si me deserueris? aut quid meritò expostulare, si mihi postulata non concesseris? Certè hoc mihi verè cogitare licet addicere: Domine nihil ego sum, nihil per me boni habeo, quin omnium inops ad nihil semper tendo. Quòd nisi à te adjutus, & intus in animo instructus fuero, totus efficior tepidus & dissolutus. Tu verò Domine semper idem es, idemque permanes in æternum, semper bonus, justus, sanctus, qui omnia benè, justè, sanctè facias, & cum sapientia componas. At ego ad defectum magis quàm ad perfectum pronus, non semper in eodem statu perduro, quippe temporis vicissitudinibus obnoxius. Sed idem tamen, te manum adjuatricem porrigente, facilè recreor, quandoquidem solus sine ulla humana ope auxiliari potes, meque usque adeò confirmare, ut vultus meus jam in diversa non mutetur, sed in te uno animus meus corrigatur & acquiescat.

Ita-

Itaque si dum vel animi religionem desidero, vel aliqua necessitate ad te quærendum (quippe cum nemo sit qui me consoletur) impellor, omnem humanam consolationem scirem abjicere, equidem de favore tuo meritò benè sperare, nonnunquam consolationis donum cum lætitia expectare possem. Denique tui est beneficii quicquid unquam mihi benè succedit: ego tibi vanus & nihili homuncio sum, inconstans & infirmus.

Igitur gloriari unde possim? aut cur suscipi cupiam? de nihilo videlicet: at id quidem vanissimum est. Verè pestilentissima & inanissima res est ambitio, quæ hominem & à vera gloria abstrahat, & cœlesti favore spoliet. Nam dum sibi placet homo, tibi displicet: dum humanis laudibus inhiat, veris virtutibus privatur. Est autem vera gloria, sancta quæ; lætitia, de te, non de seipso gloriari: deque tuo nomine, non de sua virtute gaudere, aut re ulla nisi propter te delectari. Ergo tuum, non meum nomen laudetur: tuum, non meum opus extollatur: tuum illud sanctum nomen ita celebretur, ut ego nulla hominum laude afficiar. De te perpetuò lætus gloriabor: de me nihil nisi de infirmitatibus meis. Appetant Judæi mutuam inter se gloriam: ego ei studebo quæ à solo Deo est. Omnis quidem humana gloria, omnis honor mortalis, omnis mundana excelsitas, si cum tua ista æterna gloria conferatur, vanitas est & stultitia. O mea veri-

veritas, mea misericordia, mi Deus, beata trinitas, tibi soli laus, virtus, honor, gloria, in omnem seculorum perpetuitatem. Amen.

De mortalis honoris contemptu.

CAP. XLVI.

NAte tua nihil referre putato, si alios honorari & extolli, te verò despici contemnique videas. Erige ad me in cælum animum, & ab hominibus in terris contemni non ægrè feres. S. Domine in cæcitate sumus, & vanitate, facile seducimur. Si rectè me ipsum inspicio, nunquam mihi ab ulla re est injuria, quo fit ut quod de te meritò conqueri non habeam. Sed quia in te & frequenter & graviter peccavi, meritò armatur in me omnis rerum natura. Igitur mihi infamia & contemptus, tibi laus, honor, gloria debetur. Ac nisi me sic comparavero, ut me ab omnibus despici atque derelinqui, planèque nullo loco haberi æquo animo feram, non possum nec animum consequi pacatum atque stabilem, neque divinitus illustrari, nec tibi plenè conjungi,

Pacem sibi in omnibus non esse collocandam.

CAP. XLVII.

NAte si tibi pacem in quoquam mortalium propter tuam cum illo concordiam atque consuetudinem collocaveris, instabilis eris, & inquietus. Sin te ad sempiternam immortalemque

que veritatem receperis , amici discessu obitu-
ve non cruciabere. Tantò enim magis Deo
propinquat homo, quantò ab omni solatio ter-
reno longiùs recedit: tantòque in Deum altiùs
ascendit , quantò in se profundius descendit,
quantòque magis sibi vilescit. Qui verò boni
quidpiam sibi arrogat, is Dei favorem in se vi-
gere prohibet, quippe cum Sancti spiritus favor
submissum animum semper quærat. Si tu tei-
psum planè in nihilum redigere, atque ab omni
creato amore eximere scires, equidem in te ma-
gna cum beneficentia defluerem. Sed dum tu
in res creatas intueris, subtrahitur tibi creatoris
aspectus. Disce te ipsum in omnibus ob crea-
torem vincere : ita fiet ut ad Dei cognitionem
pervenias. Vel quantulacunque res si intem-
peranter amatur & respicitur , à summo bono
retardat, hominemque vitiat.

In vanam secularemque scientiam.

CAP. XLVIII.

NAte elegantibus acutisque hominum di-
ctis moveri nolito, neque enim in sermo-
ne, sed in virtute, situm est regnum Dei.
Attende verba mea quæ & animos accendunt,
& mentes illuminant, & igniculos injiciunt, &
veram afferunt consolationem. Nunquam quic-
quam eo consilio legas, ut ditior aut sapientior
esse videare: sed ut vitia interimas operam dato:
hoc enim tibi plus proderit, quàm multarum
diffi-

difficilium quæstionum notitia. Ubi multa legeris cognoverisque, ad unum tandem veniendum erit principium. Ego is sum qui homines scientiam doceo, & parvulis perspicaciorē intelligentiam concilio, quā a quoquam hominum doceri queat: ita ut quos alloquar, faciliē sapientes evadant, & in spiritu multum proficiant. Væ illis qui curiosa multa ex hominibus quærunt, & viam mihi serviendi parū curant. Veniet tempus illud quum existeret magister magistrorum Christus dominus angelorum, qui ab omnibus rationes exigat, omniumque conscientiam examinet: cū quidem Jerosolyma adhibitis lucernis perscrutabitur, fiēntque manifesta quæ in tenebris latuerint, tacentibus lingvarum argutiis. Ego is sum qui demissam mentem uno momento sic attollo, ut veritatis æternæ plures capiat rationes, quā quis vel decem annorum studio literario consequi possit. Ego doceo sine strepitu verborum, sine turba opinionum, sine fastu ambitionis, sine pugna argumentorum.

Ego is sum qui doceo terrena despiciere, præsentia fastidire, æterna quærere & sapere, fugere honores, ferre offensiones, omnem spem in me ponere, extra me nihil cupere, & me super omnia ardentē amare. Nam amando me quidam divina penitus ita didicit, ut mira loqueretur, plusque omnia relinquendo profecit, quā ulla studiorum subtilitate potuisset. Sed

K

aliis

aliis communia, aliis singularia eloquor : nonnullis in signis & figuris suaviter appareo : aliis in multo lumine arcana patefacio , librorum quidem una vox est, quæ non omnes æquè instruat. At ego intus sum doctor veritatis , animorum scrutans , cogitationum intelligens, actionum promovens, & tantum cuique tribuens, quantum æquum esse judico.

De non attrahendo ad se res exteriores.

CAP. XLIX.

NAte in multis inscium te esse oportet, & pro mortuo in terris te ducere , proque eo cui totus orbis sit crucifixus. Multa etiam surda aure prætereunda sunt, & quæ ad pacem tuam pertineant cogitanda. Utilius est oculos ab his quæ displicent, avertere, & suam cuique sententiam relinquere, quàm contentiosis sermonibus servire. Si cum Deo tibi probè convenierit, inque ejus judicium intuitus fueris, facilius vinci te sustinebis. S. O Domine quò devenitum est? en breve damnum defletur , ob exiguum quæstum laboratur & curritur , vixque tandem sub noctem domum reditur, & spirituale detrimentum oblivioni traditur. Quod parum, ne dicam nihil prodest, huic studetur: & quod summè necessarium est, negligenter præteritur: usque adeò totus in externa effluit homo, & nisi citò resipiscat, libens in exterioribus jacet.

Non

Non omnibus esse credendum, itemque defacilitate lapsus verborum.

CAP. L.

Opitulare mihi, Domine, in hac calamitate: nam hominum quidem inane est præsidium. Quàm sæpè ibi non inveni fidem, ubi fore putavi? rursumque ibi reperi, ubi minùs sperassem? usque adeò vana spes est in hominibus & in te uno, Deus, salus est posita justorum. Agimus tibi gratias, Domine Deus, ob omnia quæ nobis accidunt infirmis & instabilibus, quique facillè fallamur & mutemur. Quis est qui se omnibus in rebus ita cautum circumspectumq; præbere queat, ut non aliquando in aliquam fraudem difficultatemque veniat? Sed tibi, Domine, qui confidit, animoque simplici studet, is non ita facillè labitur, aut si in aliquam incidit calamitatem, quantacunque tandem difficultate implicetur, citò à te vel inde eripitur, vel consolatione confirmatur, quippe qui eos qui in te spem habent, ad extremum non deseras. Equidem rari sunt fidi amici, qui in omnibus perseverent rebus adversis: tu, Domine, tu solus es fidelissimus in omnibus, neque quisquam tui similis est. O quàm sapuit sancta illa anima quæ dixit: Confirmata est mea mens, & in Christo fundata. Si sic mecum ageretur, non tam facillè me sollicitaret humanus timor, nec verborum jacula moverent. Sed quis omnia prævi-

dere,

K 2

dere, quis cavere futura mala queat ? Quòd si quamvis prævifa, tamen sæpè lædunt , quantò feriunt improvifa graviùs ? Sed cur mihi miſer non meliùs proſpexi ? aut cur aliis tam facilè credidi ? Verùm homines ſumus , & quidem fragiles , etiamſi à multis angeli exiſtimemur & dicamur. Cui verò credam, Domine, cui niſi tibi, qui ipſa veritas es, neque fallis neque falli potes. Nam homines quidem omnes ſunt mendaces, infirmi, inſtabiles, caduci, maximè in verbis , ut non temerè protinùs credi debeat quicquid veri ſpeciem præ ſe fert , quo fit ut prudenter præmonueris cavendos eſſe homines : & ſuos cujuſque domeſticos eſſe ipſius inimicos , neque credendum eſſe dicentibus, hic a deſt, aut illic a deſt. Doctus ſum damno meo, atque utinam cautior inde, non inſipientior afficiar. Cautus eſto [inquit quidam] cautus eſto, & quod dico, tacitè habeto. Deinde tacente me, & illud occultum credente ipſemet filere non potuit, quod ſileri juſſerat, ſed ſtatim & me & ſe prodito abiit. Ab huiusmodi fabulis & incautis hominibus tuere me, Domine, ne unquam in eorum manus incidam , aut talia committam. Suggere ori meo vera ſtabiliaque dicta, callidamque linguam à me procul amove. Nam quòd mihi fieri nolim , id alteri ne faciam omninò cavere debeo. Quàm bona quàmque tranquilla res eſt de aliis ſilere , neque omnia nullo discrimine credere , neque facilè pluſcu-

plurculum eloqui, paucisque se indicare, semperque te animorum cognoscentem quærere, neque quovis verborum vento circumferri, sed omnia tum interiora tum exteriora arbitrio nutuque tuo cupere perfici. Quàm tutum est ad Dei favorem retinendum humanum fugere splendorem, nec ea appetere, quæ sua specie sunt admirationi: sed illa omni diligentia sectari, quæ vitæ correctionem & pietatis ardorem afferunt. Quàm multis nocuit cognita & & præproperè laudata virtus? rursus quàm profuit eadem silentio servata in hac fragili vita, quæ tota tentatio fertur & malitia?

*De habenda in Deo confidentia, si male-
dictorum jaculis appetere.*

CAP. LI.

NAte constantem te præbeto, in me spem firmam habeto, quid enim sunt verba nisi verba? quæ per aerem volantia lapidem non laudant. Si sones, vide ut te corrigere velis. Sin nullius tibi peccati conscius es, da operam ut calumniam in Dei gratiam æquo animo feras, & saltem verba interdum tolere, qui verberum asperitatem tolerare nondum queas. Cur verò tantula animum tuum commovent, nisi quia adhuc carnalis es, & hominum majorem quàm debes rationem habes? Nam quia despici metuis, reprehendi ob delicta non vis, & excusationum quæris umbracula. Sed inspicere te dili-

ligentiùs, & cognosces vivere adhuc in te mundum, & vanum amorem placendi hominibus. Cùm enim ob commissa tua contundi pudefierique refugias, ex eo utique perspicuum fit nec verè modestum te, nec verè vel mundo te, vel tibi mundum esse mortuum. Sed audi verba mea, & non curabis vel decem millium hominum verba. En si in te dicerentur quæcunq; vel fingi malitiosissimè possunt, quid tibi ea nocerent, si ea ferri sineres, neque pluris quàm festucam penderes? nunquid vel pilum tibi evellerent? Sed qui & parvi animi est, nec Deum habet ob oculos, is facilè maledicto movetur. Qui verò mihi confidit, nec à suo judicio pendet, is humano terrore vacat. Ego enim arcanorum omnium judex sum & cognitor: ego quo pacto sit acta res, scio, ego & injurium & injuriam passum novi, à me ortum est istud negotium meque permittente accidit, ut multorum hominum mentes patefiant. Ego & de fonte judicabo: sed prius utrumque occulto judicio explorare volui. Hominum testimonium sæpè fallit: meum judicium verax est, idemque consistet non evertendum, & latet illud quidem plerumque atque à paucis penitus perspicitur: sed nunquam vel errat, vel errare potest, etiamsi insipientibus parùm æquum esse videatur. Itaque ad me confugiendum est in omni judicio, nec suo cuique utendum est arbitrio. Justus quidem nullo sibi divinitòs obla-

oblato casu perturbatur, neque vel calumnias admodum curat, vel ob aliorum justas sui excusationes inaniter exultat. Perpendit enim eum esse me, qui corda renesque scruter, neque ex aspectu aut humana specie judicem. Nam sæpè in oculis meis culpandum reperitur, quod hominum judicio laudandum est. S. Domine Deus judex juste, fortis, patiens, qui hominum fragilitatem pravitatemque nosti, esto robur meum omnisque fiducia. Neque enim mihi satis est conscientia mea: tu nosti ignota mihi, itaque in omni reprehensione submittere me, eamque molliter ferre debui; quòd si quando non præstiti, ignosce mihi propitius, meque iterum hoc beneficio affice, ut me patientiorem deinceps præbeam. Nam conducibilior est mihi tua singularis misericordia ad veniæ consequutionem, quàm meæ justitiæ opinio ad latentis conscientiæ defensionem. Ac licet mihi nullius peccati sim conscius, non tamen idcirco sum absolvendus, quippe cùm remota misericordia tua, nullus apud te mortalium fit absolvendus.

*Ob æternam vitam omnia gravia esse
toleranda.*

CAP. LII.

NAte noli vellaboribus frangi, quos mea causa susceperis, vel rebus adversis usque adeò dejici: quin te mea promissio in omnibus

casibus robores atque consoletur, qui satis idoneus sum ad immensa præmia reddenda. Non tu hic diu laboribus, neque semper vexabere doloribus, expecta paulisper, & videbis celerem finem malorum, eritque cum cessabit omnis labor & tumultus. Exiguum & breve est quicquid tempore finem habet. Quocirca age ut agis, labora fideliter in vinea mea, ego ero merces tua. Scribe, lege, canta, geme, tace, ora, patere viriliter adversa, digna est his omnibus & majoribus præliis vita æterna. Veniet pax una die quæ nota est Domino, & erit non des aut noxi hujus scilicet temporis, sed lux perpetua, claritas infinita, pax firma, tuta requies. Tunc non dices illud: Utinam liberer ab hujus mortis corpore, neque item clamabis: Heu mihi cui tam diu sit hic habitandum, nam & mors pessundabitur, & salus erit nunquam intermoritura, angor nullus, lætitia beata, societas dulcis & honesta. O si vidisses sanctorum in cælo coronas perpetuas, quantaque nunc quoque gestiant gloria, qui isti mundo olim contempti, vel ipsa vita indigni putabantur: profectò tute protinus ad terram dejiceres, mallesque vel omnibus parère, quàm vel uni imperare, nec istius vitæ lætos dies concupisceres: quin potius Deicausa adversis premi gauderes, & nullo loco inter homines haberi maximum lucrum duceres.

Quòd si tibi hæc arriderent, & altius in animum

num dimitterentur, ne semel quidem conqueri auderes. Scilicet, ob æternam vitam non omnia sint laboriosa toleranda: aut divinum regnum vel adipisci vel amittere tantula res est.

Attolle in cælum oculos: en unà mecum omnes sancti mei, qui in ista vita acre certamen obiere, nunc gaudent, nunc consolationem percipiunt, nunc tuti sunt, nunc requiescunt mecum in regno patris mei, sine fine permansuri.

De æternitatis die, & hujus vite angoribus.

CAP. LIII.

O Supernæ civitatis mansio beatissima, ô dies æternitatis clarissima, quam nulla nox obscurat, sed summa veritas semper irradiat: dies semper læta, semper tuta statu nunquam in contraria mutando. O utinam illuxisset illa dies, & omnia hæc mortalia finem adepta forent. Lucet illa quidem sanctis perpetua claritate splendens, sed non nisi procul ac velut in speculo, quippe peregrinantibus in terra. Norunt cæli cives quàm læta sit illa: gement exules Evæ nati, quòd tam amara pleneque molestiarum sit hæc dies hujus temporis & parvi, & mali, plenique doloribus & angoribus, ubi homo tot peccatis inquinatur, tot malis irretitur, tot urgetur timoribus, tot curis distenditur, tot curiositatibus distrahitur, tot implicatur vanitatibus, tot erroribus circumfunditur, tot laboribus

ribus atteritur, premitur tentationibus, enervatur deliciis, egestate cruciatur. O quando finis erit horum tot laborum ? quando tandem liberabor à misera hac servitute vitiorum ? quando unius tui, Domine, memor ero ? quando in te plenè lætabor ? quando omni impedimento carens, vera libertate fruatur, sine ulla vel mentis vel corporis molestia ? quando erit pax solida, pax imperturbabilis atque tuta, pax intus & foris, pax ex omni parte firma ? Jesu bone quando te coram videbo ? quando regni tui gloriam contemplabor ? quando eris mihi omnia in omnibus ? aut quando tecum degam in regno tuo, quod ab omni æternitate tibi dilectis præparasti ? Relictus sum inops & exul in hostili solo, ubi quotidiana bella, ubi vigent infortunia maxima. Solare exilium meum, mitiga dolorem, quando ad te summa animi cupiditate anhele. Nam ab hoc quidem mundo quicquid offertur ad solatium, id mihi est oneri. Te penitus frui cupio, sed apprehendere nequeo. Opto inhærere cœlestibus, sed deprimunt res temporales, & non interemptæ affectiones. Mente omnia superare volo, sed carni invitus subjacere cogor. Sic ego infelix homo mecum ipse pugno, sumque mihi metipsum gravis, dum sursum spiritus, deorsum caro tendit. Quantum intus certamen patior, dum mente tracto cœlestia, & mox oranti occurrit turba carnalium ? Mi Deus noli à me procul discedere, neve
præ

præ ira tuum me averſare. Diſſipa fulguris tui ſplendore omnes quæ ab hoſte injiciuntur imaginationes, easque jactis ſagittis diſturba, recollige ad te ſenſus meos, fac ut mundanorum omnium oblivifcar, utque vitiorum imaginationes citò abjiciam atque contemnam. Succurre mihi, æterna veritas, ut nulla me moveat vanitas. Adveni cœleſtis ſuavitas, fugiente adventu tuo omni impuritate. Illud quoque mihi miſericorditer ignoſce, veniam da, quoties in precibus aliud quàm te revolvo. Etenim ut verum fatear, admodum diſtrahi ſoleo, ac ſæpenuerò ibi non ſum, ubi corpore ſto aut ſedeo: ſed potiùs quò cogitationibus feror, ibi ſum, inquam, ubi mea eſt cogitatio, ubi mea frequenter verſatur cogitatio, ibi eſt quod amo, quodque me aut naturaliter delectat, aut ex conſuetudine placet, id mihi facilè occurrit. Hanc ob cauſam tu veritas apertè dixiſti: Ubi eſt theſaurus tuus, ibidem & animus. Si cœlum amo, cœleſtia libenter perpendo. Sin mundum amo, mundi rebus ſecundis gratulor, & ejusdem res adverſas doleo. Si carnem amo, carnalia ſubinde imaginor: ſin ſpiritum, de ſpiritualibus cogitare me delectat. Quæcunque enim amo, de iis libenter & loquor & audio, eorumque imagines domum mecum reporto. Enimverò beatus ille qui propter te, Domine, humana omnia miſſa facit, naturæ vim infert, carniſque cupiditates ſpiritus ardore crucifigit.

cifigit, ut serenata conscientia, puras tibi preces libet, dignusque sit qui angelorum cœtibus interfit, omnibus terrenis tum foris tum intus exclusis.

De aeterna vita desiderio, & quanta sint certantibus bona promissa.

C A P. L I V.

NAte quum tibi beatitudinis æternæ desiderium desuper infundi sentis, & ex tabernaculo corporis exire concupiscis, ut claritatem meam sine vicissitudinis umbra contemplari possis, aperi animum tuum, & sanctum hunc afflatum avidissimè accipe. Age summas supernæ bonitati gratias, quæ tecum benignè agat, te tam clementer invisat, tam ardentè excitet, tam validè sublevet, ne tuo pte pondere ad terrestria labaris. Neque enim id cogitatione conative tuo consequeris, sed sola dignatione supernæ gratiæ aspectusque divini, ut cum in cæteris virtutibus, tum in primis in modestia proficias, & ad futura certamina te præpares, operamque des, ut mihi totius animi viribus adhareas, ardentique voluntate servias. Nate, sæpè ignis ardet, sed flammæ semper comes est fumus, sic & nonnulli desiderio flagrant rerum cœlestium, & tamen à carnalium affectionum tentatione liberi non sunt, ideòque non planè ob solam Dei gloriam ea faciunt, ad quæ ferenda ejus opem tam cupidè perunt. Tale est

est & tuum sæpè desiderium, cujus tamen summam esse sinceritatem præ te fers. Neque enim purum perfectumque est, quod privata commoditate est infectum. Petit non quod tibi jucundum commodumque, sed quod mihi acceptum sit & gloriosum, nam si rectè judicas, decretum meum & desiderio tuo, & omnibus quæ desiderantur, præferre sequique debes. Novi desiderium tuum frequentesque gemitus audiui: jam velles esse in gloriosa libertate natorum Dei: jam te delectat æterna domus, & cœlestis patria plena gaudio: sed nondum venit hora illa, quin adhuc aliud tempus est, belli videlicet, laboris, & explorationis, optas summo repleti bono: sed id assequi nondum tibi licet. Ego is sum (inquit Dominus) quem expectare debes donec veniat regnum Dei. Explorandus es adhuc in terris, & in multis exercendus. Concedetur equidem tibi interdum consolatio, sed plena satietas non item. Quocirca constantem te fortemque præbeto tum in agendo, tum in patiendi naturæ contraria. Oportet te novum induere hominem, & in alterum virum mutari, sæpèque tibi & facienda sunt quæ nolis: & omittenda quæ velis. Aliis sui conatus succedent, tibi non item, aliorum dicta audientur, tua pro nihilo ducentur, alii petentes impetrabunt, tu repulsam pati, alii hominum ore magni celebrabuntur, de te tacebitur: aliis munia obeunda committentur, tu ad

ad nihil utilis judicabere. Has ob causas nonnunquam docebit natura tua, magnumque certamen tolerabit: sed magnum bonum inde consequeris, si id silentio tuleris. His & hujus generis aliis explorari solet fidelis Domini servus, & qui seipsum abnegare, & in omnibus frangere queat, ac vix quicquam est in quo mori æquè è re tua sit, ac in eo, ut quæ voluntati tuæ adversentur, ea videas & perpetiaris, maxime dum absurda & tuo judicio minùs utilia imperantur: in quibus quia majoris potestati, cui subiectus es, resistere non audes, fit ut alterius nutui omni tua sententia obtemperare durum tibi videatur. Sed considera nate, quis fructus, quantum præmium, quàm brevi labores istos sit sequuturum, & non ægrè feres, sed patientiæ solatium percipies maximum.

Nam pro brevi ista, quam nunc sponte reliqueris voluntate, fruèris in cælo perpetua. Ibi quippe quicquid voles, quidquid optare poteris, invenies: ibi bonorum omnium copiam nullo amittendi timore habebis, ibi tua voluntas una tecum nihil unquam extraneum privatumve cupiet: ibi nullus tibi resistet, nemo de te conqueretur, nemo te impediet, quin optata universa præstò aderunt, animæque tuæ cupiditatem cumulatissimè explebunt. Ibi reddam gloriam pro tolerata contumelia, laudis amictum pro mœrore, pro infimo loco, regiam sedem, in sempiternum. Ibi apparebit fructus obe-

obedientiæ, gaudebit labor pœnitentiæ, modestaque subiectio gloriosè coronabitur. Quam ob rem nunc te omnium imperio modestè subi- gito, neque quis dicat aut jubeat curato, sed il- lud in primis operam dato, ut sive superior ali- quis, sive æqualis, sive etiam inferior aliquid à te postularit, aut etiam innuerit, omnia boni consulas, & sincera voluntate exequi studeas. Quærant alii alia, glorientur alii in aliis, lauden- turque vel ab innumeris: tu non nisi in tui con- temptu & in meo imperio exequendo, meaque gloria curanda gaude, atque illud unicè opta- to, ut sive per vitam, sive per mortem Deus in te semper honoretur.

*Quemadmodum malis pressus homo sese Deo
iradere debeat.*

CAP. LV.

AGo tibi Deus sancte pater, immortales gra-
tias, quòd quæ tu vis [vis autem nihil nisi
bonum] fiunt. In te lator ego tuus, non vel in
me, vel in quoquam alio: nam tu solus vera
lætitia, tu mea spes & corona, tu gaudium ho-
norque meus, Domine: denique nihil nisi à te
acceptum habeo, idque nullo meo merito: tua
sunt quæcunque vel dedisti vel fecisti. Ego
inops, & laboribus ab ineunte ætate agitatus a-
nimo doleo, idque nonnunquam ita, ut erum-
pant lachrymæ, utque ob imminetia mala
perturber. Desidero pacis gaudium, pacem,
nato-

natorum tuorum flagito, qui consolationis tuæ lumine pascuntur. Si tu pacem dederis, si gaudium fuderis, animum habebo plenum modulationis, laudesque tuas religiosè cantantem. Sin tu te [uti sæpissimè soles] subtraxeris, præceptorum tuorum via currere non poterò, sed potius in genua lapsus pectus tundam, quia mecum non sic agetur ut antea, quum lucerna tua mihi desuper illucente, sub alarum tuarum umbra protegebar adversus irruentia mala. Pater justè, semperque laudande, venit hora qua ego tuus explorer. Pater amande, æquum est ut hac hora aliquid tua causa patiar. Pater perpetuò venerande, venit hora quam tu ab omni æternitate futuram sciebas, ut ego ad exiguum tempus sic foris succumbam, ut intus semper apud te te vivam, utque paulisper contemnar, deprimar, deficiam coram hominibus, malisque & languoribus affligar, quò denuò tecum in aurora novæ lucis resurgam, & in cælestibus illustris efficiar. Pater sancte tu sic statuisti, sic voluisti, quodque fieri præcepisti, id factum est. Hoc enim beneficii à te confertur in amicum tuum, ut amore tui malis afficiatur in hac vita, quoties, & quomodo tu fieri permiseris. Nam nec sine consilio providentiaque tua, nec sine causa quicquam fit in terris. Et quidem è re mea est, Domine, quòd me depressisti, ut instituta tua discam, & omnem animi fastum atque arrogantiam abjiciam. Mihi utile

tile est pudorem fuisse suffusum , ut à te potius
quàm ab hominibus consolationem petam. Ne-
que non ex eo impervestigabile iudicium tu-
um expavescere didici, qui iustos unà cum im-
piis affligas, sed non sine æquitate & iustitia. A-
go tibi gratias, qui me malis afficere nihil peper-
ceris, sed acerbos cruciatus, dolores , angores
foris intusque mihi inflixeris , in quibus qui me
consoletur , ex omnibus qui sub cælo sunt nul-
lus est, sed tu solus is es, mi Domine & Deus, cœ-
lestis animarum medicus, qui & vulneras & sa-
nas , qui ad inferos deducis , & idem reducis,
Tua me correctio petit, tua virga docet: en ego
me, pater charissime , correctionis tuæ virgæ
subjicio: feri dorsum cervicemque meam , ut
pravitatem meam sub tuam voluntatem fle-
ctam, fac me pium , modestumque discipulum,
sicuti probè facere consuevist, ut tibi ad nutum
planè obtemperem. Tibi me meaque omnia
ad corrigendum commendo, quando hic quàm
in posterum corrigi præstat. Universa tu &
singula scis, neque te quicquam latet in huma-
na conscientia. Tu futura antequam fiant
nost, neque est quod te de iis quæ in terris ge-
runtur, doceat, admoneatve quisquam. Tu
scis quid mihi ad proficiendum conducatur,
quantumque profint res adversæ ad vitiorum
quasi rubiginem abstergendam , utere ergo me
iudicio arbitrioque tuo, nè me ob nocentem
vitam meam nulli melius aut clarius, imò nulli

L

pror-

prorsus nisi tibi uni notam, despicio. Da mihi, Domine, scire quæ scienda sunt, amare quæ amanda, laudare quæ tibi summè placent: suscipere quæ tuo iudicio pretiosa sunt, & vituperare quæ oculis tuis sordent. Noli committere ut ego vel ex exteriorum oculorum aspectu iudicem, vel ex imperitarum aurium auditu sententiam feram: sed vero iudicio tum visibilia tum spiritualia discernam, & ante omnia tuæ voluntatis arbitrium semper exquiram. Falluntur sæpè hominum sensus in iudicando, falluntur & hujus amatores seculi tantum visibilia amando. Nunquid tanto melior est homo, quanto homini major habetur? fallax fallacem, vanus vanum, cæcum cæcus, infirmum infirmus decipit dum extollit, verèque probro afficit, dum inaniter laudat. Nam quantus quisque tuo iudicio est, tantus re vera, ac non major est, ut ritè dixit quidam.

Humilibus operibus insistendum esse, quum deficitur à summis.

CAP. LVI.

NAte non potes perpetuò in ardentissimo virtutum studio, summoque res divinas contemplandi gradu consistere, quin necesse est ob originalem corruptionem, ut interdum ad inferiora descendas, & vitæ mortalis onus etiam invitus & cum tædio feras. Quamdiu mortale corpus circumferes, corporis tædi-
um

um gravitatemque senties. Itaque sæpè tibi in carne de carnis onere gemendum est, quòd spiritualibus studiis & divinæ contemplationi sine intermissione inhærere non potes. Hic tibi ad humilia & exteriora opera confugere expedit, teque in bonis actionibus recreare, & dum ego supernè ad te visendum veniam firma cum confidentia expectare, exiliumque tuum & mentis jejunitatem patienter ferre, donec iterum à me invisaris, & ab omnibus angoribus libereris. Nam faciam te laborum oblivisci, & interiore quiete perfrui. Aperiam tibi divinarum literarum campum, ut gestienti animo percurrere incipias viam præceptorum meorum, atque ita dicas: Non sunt conferendæ temporis hujus calamitates cum futura gloria nobis exhibenda.

Debere hominem non consolatione, sed verberibus dignum se existimare.

CAP. LVII.

Domine non sum consolatione, aut ulla spirituali cura tua dignus: itaque æquum te mihi præbes, dum inopem me & consolationis expertem relinquis. Nam etiam si mare lachrymarum funderem, nec sic quidem consolatione tua dignus essem: quin non nisi flagris pœnisque dignus sum, qui te tam graviter tam sæpè offenderim, inque te tam multis tantopere deliquerim. Itaque si res ritè perpendatur,

ne tantula quidem consolatione dignus sum. Et tamen tu clemens & misericors Deus, qui opera tua perire non vis, ad exerendas tuæ bonitatis opes in vasa misericordiæ tuæ, dignaris me nullo meo merito supra humanum modum consolari. Neque enim humanarum confabulationum similes sunt tuæ consolationes. Quid verò feci ut me ulla cœlesti consolatione prosequeris? Equidem nihil me boni fecisse recolo, sed semper & ad peccata pronum, & ad correctionem pigrum fuisse, id quod adeò verum est, ut si negem, tu refellas, neque me possit quisquam defendere. Quid peccatis meis merui, nisi Orcum & ignem æternum? Equidem verè confiteor dignum esse me omni ludibrio atque contemptu, neque decere ut inter religiosos tuos degam. Equidem ægrè adducor ut faciam: sed quia verum est, faciam ut mea ipse peccata arguam, quò facilius misericordiam tuam impetrem. Quid verò dicam nocens ego, & omni probro plenus? Equidem nihil habeo quod eloquar, nisi hoc unum: Peccavi, Domine, peccavi, miserere mei, ignosce mihi, sine ut calamitatem meam paulisper deplem, antequam in tenebrosam & opertam mortis caligine terram migrem. Quid tu verò à fonte miseroque homine aliud exigis, quàm ut sese ob delicta sua afflicteret atque deprimat? Nam in vera sui afflictione, animique depressione, nascitur spes veniæ, reconciliatur Deo perturbata con-

conscientia, recuperatur Dei favor amissus, defenditur homo ab ira futura, sibi que mutuò occurrunt cum sancto osculo Deus, & pœnitentiam agens hominis anima. Submissus, inquam, nocentis hominis peccatorum dolor, sacrificium est, tibi, Domine, acceptum, longèque suavius fragrans quàm thuris suffitus. Idem jucundum illud unguentum est, quo sacros pedes tuos perfundi voluisti, qui afflictum depressumque hominis animum nunquam aspernaris. Hic locus est perfugii adversus hostis iram: hic corrigitur & abluitur quicquid aliunde depravatum est & inquinatum.

Dei favorem cum iis, quorum mens terrestris est, nihil habere negotii.

CAP. LVIII.

Nate pretiosior est favor meus, quàm ut se rebus extraneis, terrenisque consolationibus admisceri patiatur. Itaque quicquid ei impedimento est, abjicias oportet si te eo perfundi cupis. Quare secessum, ama solus habitare tecum, nullius require confabulationem, sed potiùs religiosas ad Deum funde preces, ut & tua mens extimuletur, & animus benè sibi conscius sit. Totum orbem nihili facito, Deiq; vacationem omnibus exterioribus anteponito. Neque enim simul & mihi vacare, & pereuntibus delectari potes. A notis & charis amicis discedendum est, & ab omni mortali

folatio avocandus animus : sic Christi discipulos admonet Petrus, ut se in hoc mundo pro advenis gerant & peregrinis. O quanta futura est morituro fiducia, quem nullius rei cupido in mundo detinet. Verum sic ab omnibus semotum habere animum, hominis est non ægri, neque novit interioris hominis libertatem animalis homo. Enimverò si spiritualem se fieri vult, renunciet oportet tum remotis tum propinquis, sibi quæ à nemine magis, quàm à seipso caveat. Si teipsum perfectè viceris, cætera facilius subegeris, nam de seipso triumphare, perfectæ victoria est. Qui enim se sibi sic subiectum habet, ut & appetitus rationi, & ratio mihi incunctis obediat, hic verè & sui victor, & mundi dominus est, ad quod quidem fastigium si scandere cupis, viriliter incipiendum est & securis admovenda radici, ut tum tui, tum omnis privati carnalisque boni occultum intemperansq; studium excidas & extirpes. Nam ex hoc uno hominis intemperatiore amore sui pendet, quicquid ferè homini radicitus extirpandum est, quo malo devicto & subacto, magna pax perpetuaque tranquillitas subsequetur. Sed quia pauci sibi metipsis perfectè mori, & ex seipsis plenè exire conantur, fit ut plerique in seipsis impliciti remaneant, neque supra se spiritu evehi queant. Qui verò mecum liberè cupit versari, necesse est ut is pravas & intemperatas affectiones suas omnes interimat, neque

neque ulli creatæ rei privato amore cupidè inhæreat.

De natura & gratia motibus diversis.

CAP. LIX.

NAta naturæ & gratiæ motus diligenter adverte : nam ita subtili & inter se contrario modo moventur, ut nisi à spirituali & penitus illuminato homine vix discerni queant. Omnes quidem bonum appetunt, inque suis dictis factisque boni aliquid præ se ferunt, idcòque boni specie multi falluntur. Natura callida est & multos trahit, illaqueat, decipit, semperque se finem actionum esse vult. At gratia simpliciter se gerit, & omne mali genus declinat: fallaciam nullam adhibet, omniaque planè propter Deum facit, in eoque ad extremum requiescit. Natura mori, præmi, superari, parere, subjici recusat. Gratia sui interfectioni studet: appetitui resistit: subjici vinctique cupit, neque sua libertate vult uti: sub magisterio haberi amat, neque in quenquam dominari cupit, sed sub Deo semper vivere, degere, esse, Deique causâ omnibus rebus humanis submissè subjici parata est. Natura suo commodo studet, & quid sibi lucri ex altero proveniat attendit: at gratia non quid sibi utile sit & commodum, sed quid multis profit, magis considerat. Natura honore & gloria libenter afficitur: at gratia Deo honorem omnem gloriamque tribuit. Na-

tura probrum contemptumque timet : at gratia ob Christi nomen contumelia se affici gaudet. Natura otium quietemque corporis amat, : gratia otiosi nescia, laborem libenter amplectitur. Natura curiosa pulchraque ambit, & à vilibus crassisque abhorret : gratia simplicibus humilibusque delectatur, aspera non aspernatur, nec ab induendo obsoletos pannos refugit. Natura peritura intuetur, terrenis lucris gaudet, dolet damno, & quovis contumelioso verbo irritatur : at gratia æternorum rationem habet, perituris non inhæret, jactura non turbatur, neque durioribus exacerbatur : quippe quæ sibi in cælo, ubi nihil perit, thesaurum collocaverit. Natura cupida est, & libentiùs accipit quàm donat, privati commodi amans. At gratia benigna est & liberalis, privati commodi fugiens, paucis contenta, dare quàm accipere beatius judicans. Natura ad res conditas, ad carnem, ad vanitatem, ad vagationes proclivis est : at gratia ad Deum & virtutes allicit, valedicit rebus conditis, fugit mundum, carnis cupiditates odit, vagationes cohibet, & in publico apparere erubescit. Natura externa solatia ambit, quorum illecebris permulceatur, at gratia in solo Deo quærit solatium, summoque bono supra omnia visibilia sese oblectat. Natura omnia privati lucri commodique causa, nihil gratis facit, semperque aut par aut majus premium, aut laudem favoremve pro benefa-
ctis

etis sperat , suaque facta & dona magni pendit cupit. At gratia nihil mortale quærit, nec aliam quàm Deum solum sibi mercedem postulat: neque rerum ad vitam hanc necessariarum, plus appetit, quàm quantum ad æternam consequendam necessarium est. Natura amicorum propinquorumque multitudine gaudet, nobilitate generisque sui natalibus gloriatur, arridet potentibus, blanditur divitibus, applaudit sui similibus. At gratia & inimicos amat, nec amicorum turba superbit , nec natalium locum ortumve suspicit , nisi fortè major ibi virtus extitit. Eadem pauperi magis quàm diviti favet: innocentis quàm potentis vicem magis dolet: veraci non fallaci gratulatur: bonos semper exhortatur ad optima quæque dona maximè sectanda , Deique filium virtutibus effingendum. Natura de egestate inopiaque facîle conqueritur : gratia inopiam fert constanter. Natura ad se omnia refert, proque se certat & contendit: at gratia ad Deum, unde originem ducit, omnia refert, sibi nihil boni adscribit, non arrogans contentiosa est. nec suam sententiam aliis præfert, sed in omni veri indagatione divinæ sapientiæ judicioq; sese submittit. Natura scire avet, & nova audire mysteria: ostentatrix sui, & multa sensibus experiendi cupida: cognosci cupit, & ea facere, unde laudem admirationemque consequatur.

At gratia novis curiosisque rebus percipiendis operam non impendit, quippe cum illud totum ex antiqua illa labe ortum habeat, cum nihil novum sit in terris durabile. Itaque hominem docet cohibere vanam delectationem, ab ostentatione abstinere, laudanda & pro sua dignitate admiranda modestè occultare, & ex omni re atque scientia utilitatis fructum, Deique laudem & honorem querere. Non se neque sua vult prædicari, sed Deo ob dona sua gratias agi cupit, qui mera charitate omnia largiatur. Hæc gratia lumen est supra naturam positum, & Dei donum quoddam singulare, ac propriè electorum nota & pignus salutis æternæ, quod hominem de terrestribus ad cœlestia amando evehit, & ex carnali spirituales efficit. Itaque quanto natura acrius premitur & vincitur, tanto major gratia infunditur, & interior homo novis dotibus secundum Dei imaginem quotidie reformatur.

*De natura corruptione, & divina gratia
viribus. CAP. LX.*

Domine mi Deus, qui me tui similem ad imaginem tui creasti, concede mihi beneficium illud (quod quidem mihi tam necessarium, tantique ad salutem momenti esse ostendisti) ut vincam naturam meam, ita pravam, ut me ad peccata interitumque trahat. Sentio enim in carne mea legem peccati, quæ legi mentis meæ
repu-

repugnet, meque appetitui in multis obedire cogit, ita ut ejus insultibus resistere nequeam, nisi mihi opituletur tua illa sanctissima gratia, animo meo ardenter infusa. Opus est inquam tua gratia, & quidem magna, ut vincatur natura, semper ad malum ab ineunte ætate prona. Nam primi hominis vitio lapsa vitiataque per peccatum natura manavit hujuslabis pœna in omnes homines, ut ipsa natura quæ bona & recta à te condita fuerat, pro vitio jam & infirmitate corruptæ naturæ dicatur, quia relictus ei motus ad malum & inferiora trahat. Nam quod ad exiguam illam vim attinet, quæ in ea remansit, ea est tanquam scintilla quædam latens in cinere. Hæc est ipsa ratio naturalis, atra caligine circumfusa, sic tamē ut adhuc boni mali que, & veri falsique judicium ac discrimen habeat, tametsi nec quicquid approbat, præstare potest, nec pleno jam lumine veritatis, nec sanitate affectionum suarum ponitur. Hinc fit, mi Deus, ut lege tua quod ad interiorē hominem attinet, delecter, sciens præcepta tua esse bona, justa, sancta, & quæ omne malum ac peccatum arguant, fugiendumque doceant. Sed carne servio legi peccati, dum appetitui magis quàm rationi obedio. Hinc fit ut adsit quidem mihi voluntas: sed præstandi facultatem non invenio. Hinc sæpè multa benè facere statuo: sed quia deest divinus favor, qui infirmitatem meam adjuvet, fit ut vel oblevem repugnantiam resi-

resiliam ac defetiscar. Hinc fit ut perfectionis
viam agnoscam equidem, & quid sit officii mei
satis perspicuè videam: sed meæ labis pondere
pressus ad perfectiora non assurgam. O quàm
mihi necessaria est, Domine, tua gratia, tum ad
inchoandum bonum, tum ad progrediendum
atque perficiendum, nam neque sine ea quic-
quam possum, & eadem me confirmante, omnia
in te possum, ô verè cœlestis gratia, sine qua
nulla hominis merita, nulla naturæ dona ullo in
pretio sunt habenda. Nihil artes, divitiæ, ni-
hil pulchritudo, aut fortitudo, nihil ingenium
aut eloquentia apud te momenti habent, Do-
mine, sine gratia, nam naturæ quidem dona bo-
nis cum malis sunt communia, at gratia donum
est electorum proprium, qua præditi æterna
vita digni habentur, denique tanti est, ut sine
ea nec vaticinandi donum, nec miraculorum
effectio, nec abstrusissima rerum arcanarum
perspicientia, ullius sit pretii: quin neque fi-
des, neque spes, neque virtutes cæteræ tibi sine
charitate & gratia acceptæ sunt. O beata grâ-
tia, quæ spiritu pauperem, virtutibus divi-
tem facis: eademque bonis divitem reddis a-
nimo summissum. Veni, descende ad me, re-
ple me manè consolatione tua, ne me præ men-
tis lassitudine ac jejunitate deficiat animus.
Quæso te, Domine, dignare me tua gratia: ea e-
nim mihi satis est, quamvis cæteris quæ natura
cupit, non impetratis. Ea, inquam, mihi si ad-
fit,

fit, nullius tentationis, nullius calamitatis malum metuum. Hæc mihi fortitudo est : hæc eadem universis & hostibus potentior, & sapientibus sapientior est. Magistra est veritatis, doctrix disciplinæ, lumen animi, angorum solamen, tristitiæ fugatrix, timoris sublatrix, nutrix religionis, parens lachrymarum. Denique sine ea quid ego sum nisi aridum lignum, & stirps inutilis atque abjicienda ? Hæc igitur tua gratia, Domine, me semper & antecedit & sequatur, efficiatque ut rectè factis perpetuò incumbam, per Jesum Christum filium tuum. Amen.

Nos ipsos abnegare Christumque per crucem imitari debemus.

CAP. LXI.

NAte quantum à teipso discesseris, tantum ad me transferis. Quemadmodum nihil foris concupiscere interiorem pacem parit, sic seipsum interim relinquere, hominem Deo conjungit. Volo te discere perfectam abnegationem tui in voluntate mea, sine ulla contradictione & querela. Sequere me: ego sum via, veritas, & vita. Sine via non ambulatur, sine veritate nescitur, sine vita non vivitur. Ego sum via qua incedere, veritas cui credere, vita quam sperare debes. Ego sum via inviolabilis, veritas nunquam fallens, vita infinita. Ego sum via rectissima, veritas suprema, vita vera

vera beata, increata. In via mea si perseveraveris, veritatem cognosces, teque veritas ita liberabit, ut æternam vitam consequare. Vitam si vis adipisci, præceptis obedito. Veritatem si nosse vis, mihi credito. Perfectus fieri si vis, omnia vendito. Meus discipulus esse si vis, teipsum abnegato. Beatam vitam consequi si vis, præsentem vitam contemnito. In cælo si vis extolli, in terris teipsum deprimito. Mecum regnare si vis, mecum crucem portato. Soli enim crucis servi beatitudinis, veræ beatæque lucis viam inveniunt. S. Domine Jesu Christe, quandoquidem arcta mundoque invisa est via tua, fac ut ego tecum mundum despiciam. Neque enim major est domino servus, neque magistro superior discipulus. Exerceatur servus tuus in via tua, postquam ibi mihi salus est veraque sanctitas. Extra eam quicquid ego vel lego vel audio, id me planè non recreat aut delectat. D. Nate postquam ista omnia & legisti, & scis, beatus eris, ea si præstiteris. Præcepta mea qui & tenet & exequitur, is me amat, & ego vicissim eum amabo, meque ei patefaciam, efficiamque ut mecum sedeat in regno patris mei. S. Domine effice igitur ut ista mihi contingant, quæ tu dixisti & promissisti. Crucem ego de manu tua accepi: eam ad mortem usque perferam, quemadmodum tu mihi injunxisti. Certè veri Christiani vita crux est: sed hac via i-
tur

tur in paradifum: retrocedere , aut cæpto de-
fiftere non licet.

Eia fratres , pergamus unà: aderit nobis
Jefus. Propter Jefum crucem hanc fufcepi-
mus, propter Jefum in cruce perfeveremus. E-
rit nobis idem auditor, qui & dux eft , & anteit.
En ante nos ingreditur rex noster pro nobis pu-
gnaturus. Sequamur viriliter : nemo terrore
percellatur: fimus parati fortiter in bello mori:
neve à cruce refugiendo , gloriæ noſtræ macu-
laminuramus.

*Ne nimium dejiciatur homo, fi quando in ali-
quod delictum lapſus eſt.*

CAP. LXII.

NAte magis mihi placet patientia , animique
ſummiſſio in rebus adverſis , quàm multum
ſolatum & religio in ſecundis. Cur tantula re
contra te dicta cruciaris ? quæ etiamſi major,
eſſet, commoveri non deberes. Noli iſtud cu-
rare : nec primum nec novum eſt, nec ultimum
erit , ſi diutiùs vixeris. Satis tu viriliſ es,
quamdiu nihil occurrit adverſi : benè etiam
conſulis cæteris, eosque verbis confirmare no-
ſti: ſed cùm tibi pro foribus adeſt repentina ca-
lamitas, & conſilio & fortitudine deficeris. A-
nimadverte quanta ſit tua fragilitas, quam ſæpi-
ùs experiris in parvis caſibus. Atqui & iſta &
cætera iſtis ſimilia tibi ſalutaria ſunt. Abjice
iſta ex animo tuo , ſicuti faciendum eſſe noſti :
quòd

quòd si te tangunt, da operam ne vel dejiciant, vel diu distineant: eaque si cum gaudio non potes, saltem patienter ferto. Quòd si talia min9 libenter audis, indignationemque sentis, reprime te, néve aliquid ex ore tuo prodire patere, unde parvuli offendantur. Ita fiet ut & mox sedetur ista commotio, & animi dolor reverso Dei favore dulcescat. Vivo adhuc ego, inquit Dominus, adjuvare te paratus, & plus solito consolari, si in me confusus religiosè invocaveris. Esto æquiore animo, & ad majorem tolerantiam accingere. Non ideò despondendum est, si te sæpius affligi, graviterq; tentari vides. Homo es, non Deus: caro, non angelus. Tune possis semper in eodem virtutis statu manere? cùm & angelo in cælo, & primo homini in paradiso defuerit, quippe non diu constiterint. Ego is sum qui & mœrentes erigam sospitate, & eos qui suam infirmitatem agnoscunt, ad meam eveham dignitatem. S. Domine, ago tuis dictis gratias, mihi melle mellisque favo dulcioribus. Quid facerem in tantis calamitatibus & angoribus, nisi tu me sancta ista oratione confirmares? Dummodò tandem ad portum salutis perveniam, quid refert quæ & quanta patiar? Da finem bonum: da felicem ex hac vita discessum: memento mei, mi Deus, meque recta via in regnum tuum dirige. Amen,

De altioribus rebus, occultisque Dei judiciis non scrutandis.

CAP. LXIII.

Nate de arduis rebus, occultisque Dei judiciis caveto ne disputes, cur hic ita derelinquatur, ille tanto favore augeatur: hic usque adeo crucietur, ille extollatur. Ista humanum captum excedunt, nec ad pervestigandum divinum consilium ulla ratio aut disputatio satis est idonea. Igitur si quando ista tibi suggerit hostis, aut etiam curiosi quidam sciscitantur homines, respondeo illud vatis: Justus es, Domine, rectumque est tuum judicium, itemque illud: Judicia Domini vera, & æquitate apta sunt; metuenda sunt, non discutienda mea judicia, utpote quæ humanum captum excedant. Ne de sanctorum quidem meritis quærere aut disputare velis, quis cæteris sanctior aut in cœlesti regno major fuerit. Hæc enim sæpè lites & contentiones gignunt inutiles: superbiam quoque & ambitionem alunt, unde invidiæ & dissensiones oriuntur, dum alius alium cæteris sanctiorem esse superbè contendit. Harum rerum discendi cupiditas & investigatio nullum fructum affert: quinimò sanctis displicet. Neque enim dissensionis ego, sed pacis Deus sum, quæ pax in vera modestia, non in arrogantia sita est. Nonnulli charitatis studio in hos quàm illos sunt propensiores: sed id humano

M

potius

potius quàm divino affectu faciunt. Ego is sum qui sanctos omnes condidi, qui eosdem dotavi, gloriaque affeci: ego singulorum merita novi, ego illos suavissimis muneribus provocavi: ego amandos ante omnem ævi seriem præscivi: ego eos ex mundo, non ipsi me elegerunt: ego meo favore vocavi, misericordia attraxi: ego eos per varias tentationes perduxi, præclarisque consolationibus perfudi: ego eis perseverantiam dedi, eorumque patientiam coronavi: ego & primum & novissimum novi: ego omnes incredibili amore complector: ego in omnibus sanctis meis laudandus, & in singulis supra omnia celebrandus atque honorandus, quos à me destinatos tam gloriosè evexerim, nullis eorum meritis antegressis. Itaque qui vel minimum meorum contemnit, is ne magnum quidem honorat, quippe cùm parvos æquè ac magnos ego idem fecerim, ut qui ulli sanctorum derogat, idem & mihi & omnibus cœlestis regni confortibus deroget. Omnes enim unum sunt charitatis vinculo, idem sentientes, idem volentes, simulque omnes mutuo se amore prosequentes. Quinimò (quod multò altius est) plus me quàm se suaque merita diligunt: nam supra se rapti, & extra sui amorem tracti toti in amorem mei pergunt, inque ejus fruitione conquiescunt, ita ut nihil eos evertere aut deprimere queat, quippe qui æterna veritate pleni, igne ardeant charitatis in extinctæ. Desinant

nant igitur carnales homines de sanctorum statu differere, qui non nisi privata gaudia diligere sciunt. Multi adhuc naturali affectu, & humano amore in hos aut illos trahuntur; ac quomodo in inferioribus animati sunt, ita & de cœlestibus imaginantur. Enimverò dici non potest, quanto inter sese distent discrimine, quæ imperfecti cogitant, & quæ divinitus illuminari homines de super sibi patefacta speculantur. Quamobrem cave, nate, ne ea curiosius tractes, quæ ingenii tui captum excedunt : sed in id potiùs incumbe, ut vel minimus in regno Dei inveniaris. Jam verò si quis sciret, quinam in regno cœlesti cæteris sanctiores aut majores habeantur, quid ei prodesset ejus rei notitia nisi se mihi tantò magis submitteret, & in majorem nominis mei laudem exurgeret? Multò acceptiorem rem Dei facit, qui de suorum peccatorum magnitudine, virtutumque exiguitate cogitat, ac quàm longè à sanctorum perfectione distet, quàm qui de sanctorum magnitudine aut parvitate disputat. Non gloriantur illi de suis meritis, quippe qui sibi nihil bonitatis adscribunt, sed mihi omnia accepta ferunt, utpote qui eis omnia pro immensa mea charitate donaverim. Et quidem tanto amore divinitatis, tantaque lætitia circumfluunt, ut nihil eis gloriæ, nihil felicitatis desit. Omnes sancti quantò gloria sublimiores, tantò modestiores, mihi que & viciniore & chariores sunt. Atque

hanc ob causam scriptum est illud, eos coronas suas ante Deum abjecisse, & prono coram agnovultu, adorasse viventem in omnia secula. Quzrunt multi quisnam sit in regno Dei maximus, ignari an ipsi in minimorum numero sint habendi. In cœlo vel minimum esse magnum est, ubi omnes magni sunt: omnes enim filii Dei & vocabuntur & erunt. Minimus in mille propagabitur, & qui centenarius pœnas dabit, juvenis morietur. Cùm enim quærent discipuli, quisnam esset in regno cœlesti maximus, hoc audivere responsum: Nisi mutati fueritis & parvulorum similes evaseritis, non intrabitis in regnum cœleste. Itaque quisquis sese instar hujus pueri depresserit, is erit in regno cœlesti maximus. Væ eis qui cum parvulis submittere sese dedignantur: nam humilior est regni cœlestis janua, quàm ut per eam intrare possint. Væ & divitibus qui suas habent consolationes: nam pauperibus in Dei regnum ingressis, ipsi foris stabunt ejulantes. Gaudete humiles: exultate pauperes: nam vestrum est regnum Dei, si tamen veritati obtemperatis.

*Omne[m] spem & fiduciam in solum Deum
esse defigendam.*

CAP. LXIV.

Domine in quonam mihi sita est in hac vita fiducia: aut quidnam mihi maximo solatio est ex omnibus rebus quæ usquam sub cœlo
con-

constant? Nonne tu Domine mi Deus, immensa prædite misericordia? Quando mihi vel sine te benè, vel te præsentè malè fuit? Equidem propter te pauper quàm sine te dives esse malo: potiùsque tecum in terra peregrinari quàm sine te cælum possidere. Ubi tu es, ibi cælum est: rursusque ubi tu non es, ibi mors & orcus est. Tu mihi in desiderio es, ideòque ad te gemere, clamare, orare necesse habeo. Nulli denique plenè possum confidere, qui mihi in meis necessitatibus oportunè auxilietur, nisi tibi soli Deo meo: tu mea spes, tu fiducia, tu consolator, & in omnibus fidelissimus. Omnes suis rebus student: tu nihil nisi salutem profectumque meum expetis, mihi que omnia in bonum convertis. Quòd verò variis me tentationibus & casibus objicis, id omne ad utilitatem meam constituis, mille modis tibi dilectos explorare solitus, qua quidem in exploratione non minùs diligere debes, & laudari, quàm si me cælestibus consolationibus repleres. In te ergò, domine Deus, spem omnem perfugiumque mihi colloco: in te calamitates omnes, angoresque meos constituo: nam extra te quicquid conspicio, id omne infirmum & instabile invenio. Si quidem nec amici prodesse nec fortes opem ferre queunt, nec prudentes utile dare consilium, nec doctorum libri consolari, nec ulla opum copia liberare, nec abditus locus tutari, nisi tu ipse adsis, adjuves, confirmes, consolaberis,

instruas, & custodias. Etenim omnia quæ videntur ad pacem ac felicitatem consequendam pertinere, te absente nihil sunt, nihilque felicitatis re vera afferunt. Itaque omnium bonorum finis, & vitæ culmen, & omnis orationis profundum tu es, & in te supra omnia spem habere, validissimum est solatium cultorum tuorum. In te coniectos habeo oculos: tibi confido, mi Deus, misericordiæ pater. Felicita, sanctamque effice animam meam cœlesti felicitate, ut ea fiat tua sancta habitatio, & sedes æternæ gloriæ, nihilque in templo tuo sordium inveniatur, quod oculos tuæ majestatis offendat. Pro tuæ bonitatis magnitudine, misericordiæque, multitudine respice me, & preces exaudi inopis servi tui, procul exulantis in regione ferali. Protege & conserva animam servuli tui, inter tot mortalis vitæ discrimina, meque ductu favoris tui dirige per viam pacis, in patriam sempiternæ claritatis.

FINIS LIBRI TERTII.

NB Librum quartum, in Castellionis Editionibus hætenus desideratum, nunc subjungere placuit, & quidem ex recensione Hereberti Rosweidi Soc. Jesu,

THO.



THOMAE A KEMPIS
CANONICI REGULARIS Ordinis
S. AUGUSTINI
DE

IMITATIONE CHRISTI
LIBER QVARTVS.
DE SACRAMENTO
EUCCHARISTIAE.

Devota exhortatio, ad sacram Communionem.
VOX CHRISTI.

VEnite ad me omnes, qui laboratis & onerati estis, & ego reficiam vos, dicit Dominus. Panis, quem ego dabo, caro mea est, pro mundi vita. Accipite & comedite, hoc est Corpus meum, quod pro vobis tradetur : Hoc facite in meam commemorationem. Qui manducat meam carnem, & bibit meum sanguinem, in me manet, & ego in illo.

Verba, quæ ego locutus sum vobis, spiritus & vita sunt.

CAP. I.

*Cum quantæ reverentia Christus sit
suscipiendus*

VOX DISCIPULI.

HÆc sunt verba tua Christe, veritas æterna, quamvis non uno tempore prolata, nec uno in loco conscripta. Quia ergo tua sunt, & vera, gratanter mihi & fideliter cuncta sunt accipienda. Tua sunt, & tu ea protulisti: & mea quoque sunt, quia pro salute mea ea edidisti. Libenter suscipio ea ex ore tuo, ut arctius inserantur cordi meo. Excitant me verba tantæ pietatis, plena dulcedinis & dilectionis. Sed terrent me delicta propria: & ad capienda tanta mysteria, me reverberat impura conscientia. Provocat me dulcedo verborum tuorum, sed onerat me multitudo vitiorum meorum.

2. Jubes, ut fiducialiter ad te accedam, si tecum velim habere partem: & ut immortalitatis accipiam alimoniam, si æternam cupiam obtinere vitam & gloriam. Venite, inquis, ad me omnes qui laboratis & onerati estis, & ego reficiam vos. O dulce & amicabile verbum in aure peccatoris, quod tu, Domine Deus meus, egenum & pauperem invitas, ad communionem tui sanctissimi Corporis. Sed quis ego sum, Domine, ut ad te præsumam accedere? Ecce, cor-
li cor-

licælorum te non capiunt, & tu dicis : Venite ad me omnes.

3. Quid sibi vult ista piissima dignatio, & tam amicabile invitatio? Quomodo ausus ero venire, qui nihil boni mihi conscius sum, unde possim præsumere? Quomodo te introducam in domum meam, qui sæpius offendi benignissimam faciem tuam? Reverentur Angeli & Archangeli, metuunt Sancti & iusti, & tu dicis: Venite ad me omnes? Nisi tu Domine hoc diceres, quis verum esse crederet? Et nisi tu juberet, quis accedere attentaret? Ecce, Noe vir justus in arcæ fabrica centum annis laboravit, ut cum paucis salvaretur: & ego quomodo me potero una hora præparare, ut mundi fabricatorem cum reverentia sumam?

4. Moyses famulus tuus magnus, & specialis amicus tuus, arcam ex lignis imputribilibus fecit, quam & mundissimo vestivit auro, ut tabulas Legis in ea reponeret: & ego putrida creatura, audebo te conditorem legis, ac vitæ datorem, tam facile suscipere? Salomon sapientissimus Regum Israel, templum magnificum septem annis, in laudem nominis tui ædificavit: & octo diebus festum dedicationis ejus celebravit: mille hostias pacificas obtulit: & arcam fœderis in clangore buccinæ & jubilo in locum sibi præparatum solenniter collocavit. Et ego infelix & pauperrimus hominum, quomodo te in domum meam introducam, qui vix medi-

am expendere devotè novi horam ? & utinam vel semel dignè ferè mediam !

5. O mi Deus, quantum illi, ad placendum tibi, agere studuerunt ! Heu , quàm pusillum est, quod ago ! quàm breve expleo tempus, cum me ad communicandum dispono ! Rarò totus collectus , rarissimè ab omni distractione purgatus. Et certè in tua salutarì Deitatis præsentià, nulla deberet occurrere indecens cogitatio, nulla etiam occupare creatura : quia non Angelum, sed Angelorum Dominum, suscepturus sum hospitio.

6. Est tamen valdè magna distantia, inter arcam fœderis cum suis reliquiis , & mundissimum Corpus tuum cum suis ineffabilibus virtutibus : inter legalia illa sacrificia futurorum præfigurativa : & veram tuì Corporis hostiam, omnium antiquorum sacrificiorum completivam. Quare igitur non magis ad tuam venerabilem inardesco præsentiàm ? Cur non majore me præparo sollicitudine , ad tua sancta sumenda : quando illi antiqui sancti Patriarchæ & Prophetæ , Reges quoque & Principes, cum universo populo , tantum devotionis demonstrarunt affectum, erga cultum divinum ?

7. Saltavit devotissimus Rex David coram arca Dei totis viribus, recolens beneficia olim indulta Patribus : fecit diversi generis organa, psalmos edidit, & cantari instituit cum lætitiis, cecinit & ipse frequenter in cithara, Spiritus

ritus Sancti afflatus gratia : docuit populum Israel toto corde Deum laudare, & ore consono diebus singulis benedicere & prædicare. Si tanta agebatur tunc devotio, ac divinæ laudis exstitit recordatio. coram arca testamenti, quanta nunc mihi, & omni populo Christiano, habenda est reverentia & devotio, in præsentia Sacramenti, in sumptione excellentissimi Corporis Christi?

8. Currunt multi ad diversa loca, pro visitandis reliquiis Sanctorum: & mirantur auditis gestis eorum, ampla ædificia templorum inspicunt, & osculantur sericis & auro involuta sacra ossa ipsorum. Etece, tu præsens es hic apud me in altari, Deus meus, Sanctus sanctorum, creator omnium, & Dominus Angelorum. Sæpè in talibus videndis curiositas est hominum, & novitas invisorum, & modicus reportatur emendationis fructus: maxime ubi est tam levis, sine vera contritione, discursus. Hic autem in Sacramento altaris, totus præsens es, Deus meus, homo Christus Jesus: ubi & copiosius percipitur æternæ salutis fructus, quotiescunque fueris dignè ac devotè susceptus. Ad istud verò non trahit levitas aliqua, nec curiositas aut sensualitas: sed firma fides, devota spes, & sincera charitas.

9. O invisibilis conditor mundi Deus, quàm mirabiliter agis nobiscum? quàm suaviter & gratiosè cum electis tuis disponis, quibus
temet-

temetipsum in Sacramento sumendum proponis! Hoc namque omnem intellectum superat: hoc specialiter devotorum corda trahit, & accendit affectum. Ipsi enim veri fideles tui, qui totam vitam suam ad emendationem disponunt, ex hoc dignissimo Sacramento, magnam devotionis gratiam, & virtutis amorem, frequenter recipiunt.

10. O admirabilis & abscondita gratia Sacramenti, quam nōrunt tantum Christi fideles! Infideles autem, & peccatis servientes, experiri non possunt. In hoc Sacramento confertur Spiritualis gratia, & reparatur in anima virtus amissa: & per peccatum deformata, redit pulchritudo. Tanta est aliquando hæc gratia, ut ex plenitudine collatæ devotionis, non tantum mens, sed & debile corpus, vires sibi præstitas sentiat ampliores.

11. Dolendum tamen valdè & miserandum super tepiditate & negligentia nostra, quòd non majore affectione trahimur ad Christum sumendum: in quo tota spes salvandorum consistit, & meritum. Ipse enim est sanctificatio nostra, & redemptio: ipse consolatio viatorum, & Sanctorum æterna fruitio. Dolendum itaque valdè, quòd multi tam parum hoc salutare mysterium advertunt, quod cælum lætificat, & mundum conservat universum. Heu cæcitas, & duritia cordis humani, tam ineffabile donum non magis attendere, & ex quo-

quotidiano usu , etiam ad inadvertentiam defluere!

12. Si enim hoc sanctissimum Sacramentum, in uno tantum celebraretur loco, & ab uno tantum consecraretur sacerdote in mundo: quanto putas desiderio ad illum locum , & ad talem Dei sacerdotem, homines afficerentur, ut divina mysteria celebrari viderent? Nunc autem multi facti sunt sacerdotes , & in multis locis offertur Christus: ut tanto major appareat gratia, & dilectio Dei ad hominem. quanto latius est sacra Communio diffusa per orbem. Gratias tibi JESU bone, pastor æterne, qui nos pauperes & exules dignatus es pretioso Corpore & Sanguine tuo reficere: & ad hæc mysteria percipienda, etiam proprii oristui alloquio invitare dicendo: Venite ad me omnes, qui laboratis & onerati estis, & ego reficiam vos.

CAP. II.

Quod magna bonitas & charitas Dei, in Sacramento, homini exhibetur,

VOX DISCIPULI.

Super bonitate tua, & magna misericordia tua Domine confisus, accedo æger ad Salvatorem, esuriens & sitiens ad fontem vitæ, egenus ad Regem cæli, servus ad Dominum, creatura ad Creatorem, desolatus ad meum pium consolatorem. Sed unde hoc mihi, ut venias ad me? Quis ego sum, ut præstes mihi teipsum? Quo-

Quomodo audet peccator coram te apparere? & tu quomodo dignaris ad peccatorem venire? Tu nosti servum tuum, & scis quia nil boni in se habet, unde hoc illi præstes. Confiteor igitur vilitatem meam, agnosco tuam bonitatem, laudo pietatem, & gratias ago propter nimiam charitatem. Propter temetipsum enim hoc facis, non propter mea merita: ut bonitas tua magis innotescat, charitas amplior ingeratur, & humilitas perfectius commendetur. Quia ergo tibi hoc placet, & tu sic fieri iussisti, placet & mihi dignatio tua, & utinam iniquitas mea non obsistat.

2. O dulcissime & benignissime Jesu, quanta tibi reverentia & gratiarum actio cum perpetua laude, pro susceptione sacri Corporis tui debetur, cuius dignitatem nullus hominum explicare potens invenitur! Sed quid cogitabo in hac Communionem, in accessu ad Dominum meum, quem debite venerari nequeo, & tamen devotè suscipere desidero? Quid cogitabo melius & salubrius, nisi me ipsum totaliter humiliando coram te, & tuam infinitam bonitatem exaltando supra me? Laudo te, Deus meus, & exalto in æternum: Despicio me, & subjicio tibi, in profundum vilitatis meæ.

3. Ecce tu Sanctus sanctorum, & ego sordes peccatorum. Ecce tu inclinaste ad me, qui non sum dignus ad te respicere. Ecce tu venis ad me, tu vis esse mecum, tu invitas ad convivium.

vivium tuum. Tu mihi dare vis cœlestem cibum, & panem Angelorum ad manducandum: non alium sanè, quàm teipsum, panem vivum, qui de cœlo descendisti, & das vitam mundo.

4. Ecce, unde dilectio procedit, qualis dignatio illucescit, quàm magnæ gratiarum actiones & laudes tibi pro his debentur. O quàm salutare & utile consilium tuum, cùm istud instituisti! quàm suave & jucundum convivium, cùm teipsum in cibum donasti! O quàm admirabilis operatio tua Domine! quàm potens virtus tua! quàm ineffabilis veritas tua! Dixisti enim, & facta sunt omnia: & hoc factum est, quod ipse jussisti.

5. Mira res, & fide digna, ac humanum vincens intellectum: quòd tu, Domine Deus meus, verus Deus & homo, sub modica specie panis & vini, integer containeris, & sine consumptione à fumente manducaris. Tu Domine universorum, qui nullius habes indigentiam, voluisti per Sacramentum tuum habitare in nobis: conserva cor meum, & corpus immaculatum: ut læta & pura conscientia, sapius tua valeam celebrare mysteria, & ad meam perpetuam accipere salutem: quæ ad tuum præcipuè honorem, & memoriale perenne, sanxisti & instituisti.

6. Lætare anima mea, & gratias age Deo, pro tam nobili munere & solatio singulari, in hac lachrymarum valle, tibi relicto. Nam quo-

quoties hoc mysterium recolis, & Christi Corpus accipis : toties tuæ redemptionis opus agis, & particeps omnium meritorum Christi efficieris. Charitas etenim Christi nunquam minuitur, & magnitudo propitiationis ejus nunquam exhauritur. Ideò nova semper mentis renovatione ad hoc disponere te debes, & magnum salutis mysterium attentà consideratione pensare. Ita magnum, novum & jucundum tibi videri debet, cum celebras, aut Missam audis: ac si eodem die Christus primum in uterum Virginis descendens, homo factus esset: aut in cruce pendens, pro salute hominum pateretur & moreretur.

CAP. III.

Quòd utile sit, sapè communicare.

VOX DISCIPULI.

ECce, ego ad te venio Domine, ut benè mihi sit ex munere tuo, & lætificer in convivio sancto tuo, quod paraisti in dulcedine tua pauperi Deus. Ecce, in te est totum, quod desiderare possum & debeo: tu salus mea, & redemptio, spes & fortitudo, decus & gloria. Lætifica ergò hodiè animam servi tui, quoniam ad te Domine Jesu animam meam levavi. Desidero te nunc devotè ac reverenter suscipere, cupio te in domum meam inducere, quatenus cum Zacharò merear à te benedici, ac inter filios Abrahamæ computari. Anima mea Corpus tuum

tuum concupiscit , cor meum tecum uniri desiderat.

2. Tradete mihi, & sufficit. Nam præter te nulla consolatio valet. Sine te esse nequeo , & sine visitatione tua vivere non valeo. Ideòque oportet me frequenter ad te accedere, & in remedium salutis meæ recipere : ne fortè deficiam in via, si fuero cœlesti fraudatus alimonia. Sic enim tu misericordissime Jesu, prædicans populis, & varios curans languores, aliquando dixisti: nolo eos jejunos dimittere in domum suam, ne deficiant in via. Age igitur hoc mecum modo, qui re pro fidelium consolatione in Sacramento reliquisti. Tu es enim suavis refectio animæ, & qui te dignè manducaverit, particeps & hæres erit æternæ gloriæ. Necessarium quidem mihi est, qui tam sæpè labor, & pecco, tam citò torpesco & deficio; ut per frequentes orationes & confessiones , ac sacram Corporis tui perceptionem, me renovem, mundem, & accendam; ne fortè diutiùs abstinendo, à sancto proposito defluam.

3. Proni enim sunt sensus hominis ad malum, ab adolescentia sua , & nisi succurrat divina medicina, labitur homo mox ad pejora. Retrahit ergò sancta Communio à malo , & confortat in bono. Si enim modò tam sæpè negligens sum & tepidus , quando communico aut celebro; quid fieret, si medelam non sumerem, & tam grande juvamen non quærerem? Et licet

N

omni

omni die non sim aptus , nec ad celebrandum benè dispositus ; dabo tamen operam , congruis temporibus divina percipere mysteria , ac tantæ gratiæ participem me præbere. Nam hæc est una principalis fidelis animæ consolatio, quamdiu peregrinatur à te in mortali corpore, ut sæpiùs memor Dei sui, dilectum suum devota suscipiat mente.

4. O mira circa nos tuæ pietatis dignatio, quòd tu Domine Deus , creator & vivificator omnium spirituum , ad pauperculam dignaris venire animam , & cum tota divinitate tua ac humanitate, ejus impinguare esuriem ! O felix mens, & beata anima , quæ te Dominum Deum suum meretur devotè suscipere, & in tui susceptione spirituali gaudio repleri ! O quàm magnum suscipit Dominum, quàm dilectum inducit hospitem , quàm jucundum recipit socium, quàm fidelem acceptat amicum , quàm speciosum & nobilem amplectitur sponsum præ omnibus dilectis, & super omnia desiderabilia amandum. Sileant à facie tua (dulcissime dilecte meus) cælum & terra , & omnis ornatus eorum ; quoniam quicquid laudis habent ac decoris , ex dignatione tuæ est largitatis , nec ad decorem tui pervenient nominis, cujus sapientiæ non est numerus.

CAP. IV.

Quòd multa bona præstantur devotè communicantibus.

VOX DISCIPULI.

Domine Deus meus, præveni servum tuum in benedictionibus dulcedinis tuæ, ut ad tuum magnificum Sacramentum, dignè ac devotè merear accedere. Excita cor meum in te, & à gravi torpore exue me. Visita me in salutari tuo, ad gustandum in Spiritu suavitatem tuam, quæ in hoc Sacramento tanquàm in fonte, plenariè latet. Illumina quoque oculos meos, ad intuendum tantum mysterium : & ad credendum illud indubitata fide, me roboram. Est enim operatio tua, non humana potentia : tua sacra institutio, non hominis adinventio. Non enim ad hæc capienda & intelligenda aliquis idoneus per se reperitur, quæ angelicam etiam subtilitatem transcendunt. Quid ergò ego peccator indignus, terra & cinis, de tam alto sacro secreto potero investigare & capere ?

2. Domine, in simplicitate cordis mei, in bona firma fide, & in tua jussione, ad te cum spe ac reverentia accedo : & verè credo, quia tu præsens es hic in Sacramento, Deus & homo. Vis ergo, ut te suscipiam, & me ipsum tibi in charitate uniam. Unde tuam precor clementiam, & specialem ad hoc imploro mihi donari gratiam ; ut totus in te liquefiam & amore perfluam,

N 2

fluam,

fluam, atque de nullâ aliena consolatione amplius me intromittam. Est enim hoc altissimum & dignissimum Sacramentum ; salus animæ & corporis, medicina omnis spiritualis languoris: in quo vitia mea curantur, passiones frenantur, tentationes vincuntur aut minuuntur: gratia major infunditur, virtus incepta augetur, firmatur fides, spes roboratur, & charitas ignescit ac dilatatur.

3. Multa namque bona largitus es, & adhuc sæpius largiris in Sacramento, dilectis tuis devotè communicantibus, Deus meus, susceptor animæ meæ, reparator infirmitatis humanæ, & totius dator consolationis internæ. Nam multam ipsis consolationem, adversus variam tribulationem infundis, & de imo dejectionis propriæ ad spem tuæ protectionis erigis, atque nova quadam gratia eos intus recreas, & illustras, ut qui anxii primum & sine affectione, se ante Communionem senserant: postea refectione cibo potuque cœlesti, in melius se mutatos inveniant. Quod idcirco cum electis tuis dispensanter agis, ut veraciter agnoscant, & patenter experiantur, quantum infirmitatis ex se ipsis habeant, & quid bonitatis ac gratiæ ex te consequantur. Quia ex semetipsis frigidi, duri, & indevoti: ex te autem ferventes, alacres & devoti esse merentur. Quis enim ad fontem suavitatis humiliter accedens, non modicum suavitatis inde reportat? Aut quis juxta copiosum

sum ignem stans, non parum caloris inde percipit? Et tu fons es semper plenus & superabundans, ignis jugiter ardens & nunquam deficiens.

4. Unde si mihi non licet haurire de plenitudine fontis, nec usque ad satietatem potare, apponam tamen os meum ad foramen cœlestis fistulæ: ut saltem modicam inde guttulam capiam, ad refocillandam sitim meam, & non penitus exarescam. Et si necdum totus cœlestis & tam ignitus, ut Cherubim & Seraphim esse possim: conabor tamen devotioni insistere, & cor meum præparare, ut vel modicam divini incendii flammam, ex humili sumptione vivifici Sacramenti conquiram. Quicquid autem mihi deest Jesu bone, Salvator sanctissime, tu pro me supple benignè ac gratiòse, qui omnes ad te dignatus es vocare, dicens: Venite ad me omnes, qui laboratis & onerati estis, & ego reficiam vos.

5. Ego quidem laboro in sudore vultus mei, dolore cordis torqueor, peccatis oneror, tentationibus inquietor, multis malis passionibus implicor & premor, & non est qui adjuvet, non est qui liberet, & salvum faciat, nisi tu Domine Deus salvator meus: cui committo me & omnia mea, ut me custodias, & perducas in vitam æternam. Suscipe me in laudem & gloriam nominis tui, qui Corpus tuum & Sanguinem,

nem , in cibum & potum mihi parasti. Præsta Domine Deus salutaris meus , ut cum frequentatione mysteriitui , crescat meæ devotionis affectus.

CAP. V.

De dignitate Sacramenti, & statu Sacerdotali.

VOX DILECTI.

Si haberes angelicam puritatem , & sancti Joannis Baptistæ sanctitatem: non esses dignus, hoc Sacramentum accipere, nec tractare. Non enim hoc meritis debetur hominum , quòd homo consècret & tractet Christi Sacramentum, & sumat in cibum panem Angelorum. Grande mysterium , & magna dignitas Sacerdotum: quibus datum est , quod Angelis non est concessum. Soli namque Sacerdotes ritè in Ecclesia ordinati, potestatem habent celebrandi , & Corpus Christi consècrandi. Sacerdos quidem minister est Dei , utens verbo Dei , per jussionem & institutionem Dei : Deus autem ibi principalis est auctor , & invisibilis operator , cui subest omne , quod voluerit , & paret omne quod jusserit.

2. Plus ergò credere debes Deo omnipotenti, in hoc excellentissimo Sacramento, quàm proprio sensui , aut alicui signo visibili. Ideòque cum timore & reverentia ad hoc opus est accedendum. Attende tibi, & vide cujus ministe-

nisterium tibi traditum est, per impositionem manus Episcopi. Ecce, Sacerdos factus es, & ad celebrandum consecratus, vide nunc, ut fideliter & devotè, in suo tempore, Deo sacrificium offeras, & te ipsum irreprehensibilem exhibeas. Non alleviasti onus tuum, sed arctiori jam alligatus es vinculo disciplinæ, & ad maiorem teneris perfectionem sanctitatis. Sacerdos omnibus virtutibus debet esse ornatus, & aliis bonæ vitæ exemplum præbere. Ejus conversatio, non cum popularibus & communibus hominum viis, sed cum Angelis in cælo, aut cum perfectis viris in terra.

3. Sacerdos sacris vestibus indutus, Christi vices gerit; ut Deum pro se & pro omni populo, suppliciter & humiliter roget. Habet ante se & retrò Dominicæ crucis signum, ad memorandam jugiter Christi passionem: Ante se crucem in casula portat, ut Christi vestigia diligenter inspiciat, & sequi ferventer studeat. Post se cruce signatus est, ut adversa quælibet ab aliis illata, clementer pro Deo toleret. Ante se crucem gerit, ut propria peccata lugeat. Post se, ut aliorum etiam commissa per compassionem defleat, & se medium inter Deum & peccatorem constitutum esse sciat: nec ab oratione, & oblatione sancta torpescat, donec gratiam & misericordiam impetrare mereatur. Quando Sacerdos celebrat, Deum honorat, Angelos lætificat, Ecclesiam ædificat, vivos adjuvat, defunctis

etis requiem præstat, & sese omnium bonorum participem efficit.

CAP. VI.

Interrogatio de exercitio, ante Communionem.

VOX DISCIPULI.

Cum tuam dignitatem, Domine, & meam vilitatem penso, valde contremisco, & in me ipso confundor. Si enim non accedo, vitam fugio: & si indignè me ingesserò, offensam incurro. Quid ergò faciam, Deus meus, auxiliator meus, & consiliator in necessitatibus?

2. Tu doce me viam rectam. Propone breve aliquod exercitium, sacrae Communioni congruum. Utile est enim scire, qualiter scilicet devotè ac reverenter tibi præparare debeam cor meum, ad recipiendum salubriter tuum Sacramentum, seu etiam celebrandum tam magnum & divinum sacrificium.

CAP. VII.

De discussione propria conscientia, & emendationis proposito.

VOX DILECTI.

Super omnia, cum summa humilitate cordis & supplici reverentia, cum plena fide & pia intentione honoris Dei, ad hoc Sacramentum celebrandum, tractandum & sumendum, oportet Dei accedere Sacerdotem. Diligenter examina

mina conscientiam tuam: & pro posse tuo, vera contritione & humili confessione, eam munda & clarifica: ita ut nil grave habeas, aut scias, quod te remordeat, & liberum accessum impediatur. Habeas displicentiam omnium peccatorum tuorum in generali, & pro quotidianis excessibus magis in speciali doleas & gemas. Et si tempus patitur, Deo in secreto cordis, cunctas confitere passionum tuarum misérias.

2. Ingemisce & dole, quòd adhuc ita carnalis sis & mundanus: tam immortificatus à passionibus: tam plenus concupiscentiarum, motibus: tam incustoditus in sensibus exterioribus: tam sæpè multis vanis phantasiis implicatus: tam multum inclinatus ad exteriora: tam negligens ad interiora: tam levis ad risum & dissolutionem: tam durus ad fletum & compunctionem: tam promptus ad laxiora & carnis commoda: tam segnis ad rigorem & fervorem: tam curiosus ad nova audienda & pulchra intuenda: tam remissus ad humilia & abjecta amplectenda: tam cupidus ad multa habenda: tam parvus ad dandum: tam tenax ad retinendum: tam inconsideratus in loquendo: tam incontinens in tacendo: tam incompositus in moribus: tam importunus in actibus: tam effusus super cibum: tam surdus ad Dei verbum: tam velox ad quietem: tam tardus ad laborem: tam vigilans ad fabulas: tam sompolentus ad vigilias sacras: tam festinus ad
N s finem:

finem : tam vagus ad attendendum : tam negligens in Horis persolvendis : tam tepidus in celebrando : tamaridus in communicando : tam citò distractus : tam rarò plenè tibi collectus : tam subitò commotus ad iram : tam facilis ad alterius displicentiam : tam pronus ad iudicandum : tam rigidus ad arguendum : tam lætus ad prospera : tam debilis in adversis : tam sæpè multa bona proponens, & modicum ad effectum perducens.

3. His & aliis defectibus tuis, cum dolore & magna displicentia propriæ infirmitatis confessis ac deploratis, firmum statue propositum semper emendandi vitam tuam, & in melius proficiendi. Deinde cum plena resignatione & integra voluntate, offer te ipsum in honorem nominis mei, in ara cordis tui holocaustum perpetuum, corpus tuum scilicet & animam mihi fideliter committendo : quatenus & sic dignè merearis ad offerendum Deo sacrificium, accedere, & Sacramentum Corporis mei salubriter suscipere.

4. Non est enim oblatio dignior, & satisfactio major pro peccatis diluendis, quàm seipsum purè & integrè, cum oblatione Corporis Christi in Missa & in Communione Deo offerre. Si fecerit homo, quod in se est, & verè pœnituerit : quotiescunque pro venia & gratia ad me accesserit, Vivo ego, dicit Dominus, qui nolo mortem peccatorum, sed ut magis con-
verta-

vertatur & vivat : quoniam peccatorum suorum non recordabor amplius , sed cuncta tibi indulta erunt.

CAP. VIII.

*De oblatione Christi in cruce & propria
resignatione.*

VOX DILECTI.

Sicut ego me ipsum , expansis in cruce manibus, & nudo corpore , pro peccatis tuis Deo Patri sponte obtuli, ita ut nihil in me remaneret, quin totum in sacrificium divinæ placationis transfret : ita debes & tu temetipsum mihi voluntariè, in oblationem puram & sanctam, quotidie in Missa , cum omnibus viribus & affectibus tuis, quanto intimiùs vales, offerre. Quid magis à te requiro , quàm ut testudeas mihi ex integro resignare ? Quicquid præter te ipsum das, nihil curo : quia non quæro datum tuum, sed te.

2. Sicut non sufficeret tibi omnibus habitis , præter me : ita nec mihi placere poterit, quicquid dederis, te non oblato. Offer mihi, & da te totum pro Deo , & erit accepta oblatio. Ecce, ego me totum obtuli Patri pro te ; dedi etiam totum Corpus meum & Sanguinem in cibum, ut totus tuus essem, & tu meus permaneres. Si autem in teipso steteris , nec sponte te ad voluntatem meam obtuleris , non est plena oblatio, nec integra erit inter nos unio. Igitur
omnia

omnia opera tua præcedere debet spontanea tui ipsius in manus Dei oblatio, si libertatem consequi vis & gratiam. Ideò enim tam pauci illuminati, & liberi intus efficiuntur, quia se ipsos ex toto abnegare nesciunt. Est firma sententia mea: Nisi quis renunciaverit omnibus, non potest meus esse discipulus. Tu ergò si optas meus esse discipulus, offer te ipsum mihi, cum omnibus affectibus tuis.

CAP. IX.

*Quòd nos, & omnia nostra, Deo debemus
offerre, & pro omnibus orare.*

VOX DISCIPULI.

Domine, omnia tua sunt, quæ in cælo sunt, & quæ in terra. Desidero me ipsum tibi in spontaneam oblationem offerre, & tuus perpetuò permanere. Domine, in simplicitate cordis mei, offero me ipsum tibi hodiè in servum sempiternum, in obsequium & in sacrificium laudis perpetuæ. Suscipe me, cum hac sancta oblatione tui pretiosi Corporis, quam tibi hodiè in præsentia Angelorum, invisibiliter assistentium, offero: ut sit pro me, & pro cuncto populo tuo in salutem.

2. Domine, offero tibi omnia peccata & delicta mea, quæ commisi coram te, & sanctis Angelis tuis, à die quo primùm peccare potui usque ad horam hanc, super placabili altari tuo: ut tu omnia pariter incendas & comburas igne cha-

charitatis tuæ, & deleas universas maculas peccatorum meorum, & conscientiam meam ab omni delicto emundes, & restituas mihi gratiam tuam, quam peccando amisi, omnia mihi plenè indulgendo, & in osculum pacis me misericorditer assumendo.

3. Quid possum agere pro peccatis meis, nisi humiliter ea confitendo & lamentando, & tuam propitiationem incessanter deprecando! Deprecor te, exaudi me propitius, ubi adsto coram te Deus meus. Omnia peccata mea mihi maximè displicent, nolo ea unquam amplius perpetrare: sed pro eis doleo & dolebo, quamdiu vixero, paratus pœnitentiam agere, & pro posse satisfacere. Dimitte mihi Deus, dimitte mihi peccata mea, propter nomen sanctum tuum: salva animam meam, quam pretioso sanguine tuo redemisti. Ecce committo me misericordiæ tuæ, resigno me manibus tuis. Age mecum secundum bonitatem tuam, non secundum meam malitiam & iniquitatem.

4. Offero etiam tibi omnia bona mea, quamvis valdè pauca & imperfecta; ut tu ea emendes & sanctifices; ut ea grata habeas, & accepta tibi facias, & semper ad meliora trahas; nec non ad beatum ac laudabilem finem, me pigrum & inutilem homuncionem, perducas.

5. Offero quoque tibi omnia pia desideria devotorum, necessitates parentum, amicorum, fratrum, sororum, omniumque charorum meorum,

rum, & eorum qui mihi vel aliis, propter amorem tuum benefecerunt : & qui orationes & missas pro se suisque omnibus, dici à me desideraverunt & petierunt, sive in carne adhuc vivant, sive jam seculo defuncti sint : ut omnes sibi auxilium gratiæ tuæ, opem consolationis, protectionem à periculis, liberationem à pœnis advenire sentiant, & ut ab omnibus malis erepti, gratias tibi magnificas læti persolvant.

6. Offero etiam tibi preces & hostias placationis, pro illis specialiter, qui me in aliquo læserunt, contristaverunt, aut vituperaverunt, vel aliquod damnum vel gravamen intulerunt: pro his quoque omnibus, quos aliquando contristavi, conturbavi, gravavi & scandalizavi, verbis, factis, scienter vel ignoranter : ut nobis omnibus pariter indulgeas peccata nostra & mutuas offensiones. Aufer Domine à cordibus nostris omnem suspicionem & indignationem, iram & disceptationem, & quicquid potest charitatem lædere, & fraternam dilectionem minuere. Miserere, miserere Domine, misericordiam tuam poscentibus, da gratiam indigentibus : & fac nos tales existere, ut simus digni gratia tua perfrui, & ad vitam proficiamus æternam. Amen.

CAP. X.

*Quod sacra Communio de facili non est re-
linquenda.*

VOX DILECTI.

FRequenter recurrendum est ad fontem gratiæ, & divinæ misericordiæ, ad fontem bonitatis & totius puritatis: quatenus à passionibus tuis & vitiis curari valeas, & contra universas tentationes & fallacias diaboli, fortior atque vigilantior effici merearis. Inimicus sciens fructum & remedium maximum, in sacra Communionem positum, omni modo & occasione nititur fideles & devotos, quantum prævalet, retrahere & impedire.

2. Cum enim quidam sacre Communioni se aptare disponunt, peiores Satanae immisiones patiuntur. Ipse nequam spiritus (ut in Job scribitur) venit inter filios Dei, ut solita illos nequitia sua perturbet, aut timidos nimium reddat & perplexos: quatenus affectum eorum minuat, vel fidem impugnando auferat: si fortè aut omninò Communionem relinquunt, aut cum tepore accedant. Sed non est quidquam curandum de versutiis & phantasiis illius, quantumlibet turpibus & horridis, sed cuncta phantasmata in caput ejus sunt retorquenda. Contemnendus est miser & deridendus, nec propter insultus ejus & commotiones, quas suscitatur, sacra est omittenda Communio.

3. Sapè

3. Sæpè etiam impedit nimia sollicitudo pro devotione habenda , & anxietas quædam de confessione facienda. Age secundum consilium sapientum , & depone anxietatem & scrupulum : quia gratiam Dei impedit , & devotionem mentis destruit. Propter aliquam parvam turbationem vel gravitatem, sacram ne dimittas Communionem : sed vade citius confiteri , & omnes offensiones aliis libenter indulge. Si verò tu aliquem offendisti , veniam humiliter precare, & Deus libenter indulget tibi.

4. Quid prodest diu tardare confessionem aut sacram differre Communionem ? Expurga te cum primis , expue velociter venenū , festina accipere remedium , & senties melius , quàm si diu distuleris. Si hodiè propter istud dimittis , cras forsitan aliud majus eveniet : & sic diu posses à Communionem impediri , & magis ineptus fieri. Quanto citiùs vales , à præsentì gravitate & inertia te excutias : quia nihil importat diu anxari , diu cum turbatione transire , & ob quotidiana obstacula se à divinis sequestrare. Imò plurimum nocet , diu Communionem protelare , nam & gravem torporem consuevit inducere. Proh dolor ! quidam tepidi & dissoluti moras confitendi libenter accipiunt , & Communionem sacram idcirco differri cupiunt , ne ad majorem sui custodiam se dare teneantur.

5. Heu ! quàm modicam charitatem , & debi-

debilem devotionem habent, qui sacram Communionem tam faciliter postponunt. Quam felix ille, & DEO acceptus habetur, qui sic vivit, & in tali puritate conscientiam suam custodit, ut etiam omni die communicare paratus, & benè affectatus esset, si ei liceret, & sine nota agere posset. Si quis interdum abstinet humilitatis gratia, aut legitima impediēte causa, laudandus est de reverentia. Si autem torpor obrepserit, seipsum excitare debet, & facere quod in se est, & Dominus aderit desiderio suo pro bona voluntate, quam specialiter respicit.

6. Cum verò legitimè præpeditus est, habebit semper bonam voluntatem, & piam intentionem communicandi, & sic non carebit fructu Sacramenti. Potest enim quilibet devotus, omni die & omni hora, ad spiritualem Christi Communionem, salubriter & sine prohibitione accedere: & tamen certis diebus & statuto tempore, Corpus sui Redemptoris, cum affectuosa reverentia Sacramentaliter debet suscipere, & magis laudem Dei & honorem prætere, quàm suam consolationem quærere. Nam toties mysticè communicat, & invisibiliter reficitur, quoties incarnationis Christi mysterium passionemque devotè recolit, & in amore ejus accenditur.

7. Qui aliter se non præparat, nisi instante festo vel consuetudine compellente, sæpius imparatus erit. Beatus, qui se Domino in holocaustum

caustum offert, quoties celebrat aut communicat. Non sis in celebrando nimis prolixus aut festinus, sed serva bonum communem modum cum quibus vivis. Non debes aliis generare molestiam & tedium, sed communem servare viam secundum majorum institutionem: & potius aliorum servire utilitati, quam propriæ devotioni vel affectui.

CAP. XI.

Quod corpus Christi, & sacra Scriptura maxime sint anima fidelis necessaria.

VOX DISCIPULI.

O Dulcissime Domine Jesu, quanta est dulcedo devotæ animæ, tecum epulantis in convivio tuo! ubi ei non alius cibus manducandus proponitur, nisi tu unicus dilectus ejus, super omnia desideria cordis ejus desiderabilis. Et mihi quidem dulce foret in præsentia tua, ex intimo affectu lachrymas fundere, & cum pia Magdalena pedes tuos lachrymis irrigare. Sed ubi est hæc devotio? ubi lachrymarum sanctarum copiosa effusio? Certè in conspectu tuo & sanctorum Angelorum tuorum, totum cor meum ardere deberet, & ex gaudio flere. Habeo enim te in Sacramento verè præsentem, quamvis aliena specie occultatum.

2. Nam in propria, & divina claritate te conspicere, oculi mei ferre non possent: sed neque totus mundus in fulgore gloriæ majestatis
tuæ

tuæ subsisteret. In hoc ergò imbecillitati meæ consulis , quòd te sub Sacramento abscondis. Habeo verè & adoro, quem Angeli adorant in cælo; sed ego adhuc interim in fide, illi autem in specie & sine velamine. Me oportet contentum esse in lumine veræ fidei, & in ea ambulare, donec aspiret dies æternæ claritatis, & umbræ figurarum inclinentur. Cùm autem venerit quod perfectum est, cessabit usus Sacramentorum: quia beati in gloria cœlesti non egent medicamine Sacramentali; gaudent enim sine fine in præsentia Dei, facie ad faciem gloriam ejus specularantes, & de claritate in claritatem abyssalis Deitatis transformati, gustant Verbū Dei cor factum, sicut fuit ab initio, & manet in æternum.

3. Memor horum mirabilium, grave mihi fit tædium etiam quodlibet spirituale solatium: quia quamdiu Dominum meum apertè in sua gloria non video, pro nihilo duco omne, quod in mundo conspicio & audio. Testis es tu mihi Deus, quòd nulla me res potest consolari, nulla creatura quietare, nisi tu Deus meus, quem desidero æternaliter contemplari. Sed non est hoc possibile, durante me in hac mortalitate. Ideò oportet, ut me ponam ad magnam patientiam, & me ipsum in omni desiderio tibi submittam. Nam & sancti tui Domine, qui tecum jam in regno cœlorum exultant, in fide & patientia magna, dum viverent, adventum gloriæ tuæ expectabant. Quod illi crediderunt,

O a

ego

debemus ; concede nobis tamen dignè flere mala, quæ gessimus : & in spiritu humilitatis, ac bonæ voluntatis proposito , tibi ferventiùs de cætero deservire.

CAP. XII.

Quòd magna diligentia se debeat, Communicaturus Christo, præparare.

VOX DILECTI.

EGO sum puritatis amator , & dator omnis sanctitatis. Ego cor purum quero, & ibi est locus requietis meæ. Para mihi cœnaculum grande stratum, & faciam apud te Pascha cum discipulis meis. Si vis, ut veniam ad te, & apud te maneam : expurga vetus fermentum , & munda cordis tui habitaculum. Exclude torum seculum, & omnem vitiorum tumultum : fede tanquam passer solitarius in tecto, & cogita excessus tuos in amaritudine animæ tuæ. Omnis namque amans, suo dilecto amatori, optimum & pulcherrimum præparat locum , quia in hoc cognoscitur affectus susipientis dilectum.

2. Scito tamen , te non posse satisfacere huic præparationi , ex merito tuæ actionis , etiam si per integrum annum te præparares, & nihil aliud in mente haberes. Sed ex sola pietate & gratia mea , permitteris ad mensam meam accedere, ac si mendicus ad prandium vocaretur divitis , & ille nihil aliud habeat ad retribuendum beneficiis ejus, nisi se humiliando & ei re-
grati-

gratiando. Fac, quod in te est, & diligenter facito : non ex consuetudine, non ex necessitate, sed cum timore, & reverentia, & affectu, accipe Corpus dilecti Domini Dei tui, dignantis ad te venire. Ego sum qui vocavi, ego jussi fieri; ego supplebo quod tibi deest: veni, & suscipe me.

3. Cum gratiam devotionis tribuo, gratias age Deo tuo: non quia dignus es, sed quia tui misertus sum. Si non habes, sed magis aridum te sentis, insiste orationi, ingemisce & pulsa: nec desistas, donec merearis micam aut guttam gratiæ salutaris accipere. Tu mei indiges, non ego tui indigeo. Nec tu me sanctificare venis, sed ego te sanctificare & meliorare venio. Tu venis, ut ex me sanctificeris, & mihi uniaris, ut novam gratiam recipias, & de novo ad emendationem accendaris. Noli negligere hanc gratiam: sed præpara cum omne diligentia cor tuum, & introduce ad te delictum tuum.

4. Oportet autem, ut non solum te præpares ad devotionem ante Communionem, sed ut etiam te sollicitè conserves in ea, post Sacramenti perceptionem. Nec minor custodia post exigitur, quam de vota præparatio prius. Nam bona postmodum custodia, optima iterum est præparatio, ad majorem gratiam consequendam. Ex eo quippe valdè indispositus quis redditur, si statim fuerit nimis effusus ad exteriora solatia. Cave à multiloquio, mane

in secreto, & frueri Deo tuo. Ipsum enim habes, quem totus mundus tibi auferre non potest. Ego sum, cui te totum dare debes : ita ut, jam ultra non in te, sed in me, absque omni sollicitudine, vivas.

CAP. XIII.

Quòd toto corde anima devota, Christi unionem in Sacramenta, affectare debet.

VOX DISCIPULI.

QUis mihi det, Domine, ut inveniam te solum, & aperiā tibi totum cor meum, & fruā te, sicut desiderat anima mea; & jam me nemo despiciat, nec ulla creatura me moveat vel respiciat, sed tu solus mihi loquaris, & ego tibi, sicut solet dilectus ad dilectum loqui, & amicus cum amico convivari? Hoc oro, hoc desidero, ut tibi totus uniar, & cor meum ab omnibus creatis rebus abstraham, magisque per sacram Communionem, ac frequentem celebrationem, cœlestia & æterna sapere discam. Ah Domine Deus! quando ero tecum totus unitus & absorptus, mei que totaliter oblitus? Tu in me, & ego in te, & sic nos pariter in unum manere concede.

2. Verè tu es dilectus meus, electus ex millibus, in quo complacuit animæ meæ habitare omnibus diebus vitæ suæ. Verè tu pacificus meus, in quo pax summa & requies vera, extra quem labor & dolor, & infinita miseria.

Verè

Verè tu es Deus absconditus, & consilium tuum non est cum impijs, sed cum humilibus & simplicibus sermo tuus. O quàm suavis est Domine spiritus tuus, qui ut dulcedinem tuam in filios demonstrares, pane suavissimo, de cælo descendente, illos reficere dignaris. Verè non est alia natio tam grandis, quæ habeat deos appropinquantes sibi, sicut tu Deus noster ades universis fidelibus tuis, quibus ob quotidianum solatium, & cor erigendum in cælum, te tribuis ad edendum & fruendum.

3. Quæ est enim alia gens tam inclyta, sicut plebs Christiana? Aut quæ creatura sub cælo tam dilecta, ut anima devota, ad quam ingreditur Deus, ut pascat eam carne sua gloriosa? O ineffabilis gratia! ô admirabilis dignatio! ô amor immensus homini singulariter impensus! Sed quid retribuam Domino pro gratia ista, pro charitate tam eximia? Non est aliud, quod gratius donare queam, quàm ut cor meum Deo meo totaliter tribuam, & intimè jungam. Tunc exultabunt omnia interiora mea, cum, perfectè fuerit unita Deo anima mea. Tunc dicit mihi: Si tu vis esse mecum, ego volo esse tecum. Et ego respondebo illi: Dignare Domine manere mecum, ego volo libenter esse tecum. Hoc est totum desiderium meum, ut cor meum tibi sit unitum.

*De quorundam devotorum ardenti desiderio,
ad Corpus Christi.*

VOX DISCIPULI.

O Quàm magna multitudo dulcedinis tuæ Domine, quam abscondisti timentibus te! Quando recordor devotorum aliquorum, ad Sacramentum tuum, Domine, cum maxima devotione, & affectu accedentium, tunc sæpiùs in meipso confundor, & erubesco: quòd ad altare tuum, & sacræ Communionis mensam, tam tepidè & frigidè accedo. Quòd ita aridus, & sine affectione cordis maneo. Quòd non sum totaliter accensus coram te Deo meo; nec ita vehementer attractus & affectus, sicut multi devoti fuerunt, qui præ nimio desiderio Communionis, & sensibili cordis amore, à fletu se non potuerunt continere: sed ore cordis & corporis pariter, ad te Deum fontem vivum medullitùs inhiabant, suam esuriem non valentes aliter temperare nec satiare, nisi Corpus tuum cum omni jucunditate & spiritali aviditate accepissent.

2. O vera ardens fides eorum, probabile existens argumentum sacræ præsentiaæ tuæ. Isti enim veraciter cognoscunt Dominum suum in fractione panis, quorum cor tam validè ardet in eis, de Jesu ambulante cum eis. Longè est à me sæpè talis affectus & devotio, tam vehemens amor

amor & ardor. Esto mihi propitius Jesu bone, dulcis & benigne: & concede pauperi mendico tuo, vel interdum modicum de cordiali affectu amoris tui, in sacra Communione sentire, ut fides mea magis convelescat, spes in bonitate tua proficiat, & charitas semel perfectè accensa, & cœlestem manna experta, nunquam deficiat.

3. Potens est autem misericordia tua, etiam gratiam desideratam mihi præstare, & in spiritu ardoris, cum dies beneplaciti tui venerit, me clementissimè visitare. Etenim licet tanto desiderio tam specialium devotorum tuorum non ardeo, tamen de gratia tua, illius magni inflammati desiderii, desiderium habeo; orans & desiderans, omnium talium fervidorum amatorum tuorum, participem me fieri, ac eorum sancto consortio annumerari.

CAP. XV.

Quòd gratia devotionis, humilitate & sui ipsius abnegatione acquiritur.

VOX DILECTI.

OPortet te devotionis gratiam instantè quærere, desideranter petere, patienter & fiducialiter expectare, gratanter recipere, humiliter conservare, studiosè cum ea operari, ac Deo terminum & modum supernæ visitationis, donec veniat, committere. Humiliare præcipuè te debes, cum parùm aut nihil devotionis interiùs sentis; sed non nimium dejici, nec

nec inordinatè contristari. Dat sàpè Deus in uno brevi momento, quod longo negavit tempore. Dat quandoque in fine, quod in principio orationis distulit dare.

2. Si semper citò gratia daretur, & pro voto adesset, non esset infirmo homini benè portabile. Propterea in bona spe, & humili patientia, expectanda est devotionis gratia. Tibi tamen, & peccatis tuis imputa, cum non datur, vel etiam occultè tollitur. Modicum quandoque est, quod gratiam impedit & abscondit, si tamen modicum, & non potius grande dici debeat, quod tantum bonum prohibet. Et si hoc ipsum modicum vel grande amoveris, & perfectè viceris, erit quod petisti.

3. Statim namque, ut te Deo ex toto corde tradideris, ne hoc vel illud, pro tuo libitu seu velle **quæsieris**, sed integrè te in ipso posueris, **unitum** te invenies, & pacatum; quia nil ita benè sapiet & placebit, sicut beneplacitum divinæ voluntatis. Quisquis ergo intentionem suam, simplici corde sursum ad Deum levaverit, seque ab omni inordinato amore, seu displicentia cuiuslibet rei creatæ, evacuaverit, aptissimus gratiæ percipiendæ, ac dignus devotionis munere erit. Dat enim Dominus ibi benedictionem suam, ubi vasa vacua invenerit. Et quantò perfectius infimis quis renunciat, & magis sibi ipsi per contemptum sui mor-

moritur, tantò gratia celerius venit, copiosius intrat, & altius liberum cor elevat.

4. Tunc videbit, & affluet, & mirabitur, dilatabitur cor ejus in ipso, quia manus Domini cum eo, & ipse se posuit totaliter in manu ejus usque in seculum. Ecce sic benedicetur homo, qui quærit Deum in toto corde suo, nec in vanum accipit animam suam. Hic in accipiendo sacram Eucharistiam magnam promeretur divinæ unionis gratiam, quia non respicit ad propriam devotionem & consolationem, sed super omnem devotionem, & consolationem, ad Dei gloriam & honorem.

CAP. XVI.

Quod necessitates nostras Christo aperire, & ejus gratiam postulare debemus.

VOX DISCIPULI.

O Dulcissime atque amantissime Domine, quem nunc devotè desidero suscipere, tu scis infirmitatem meam & necessitatem, quam patior; in quantis malis & vitiis jaceo, quàm sæpè sum gravatus, tentatus, turbatus, & inquinatus. Pro remedio ad te venio, pro consolatione & sublevamine te deprecor. Ad omnia scientem loquor, cui manifesta sunt omnia interiora mea; & qui solus potes me perfectè consolari, & adjuvare. Tu scis, quibus bonis indigeo præ omnibus, & quàm pauper sum in virtutibus.

2. Ecce,

2. Ecce, sto ante te pauper & nudus, gratiam postulans, & misericordiam implorans. Refice esurientem mendicum tuum, accende frigiditatem meam igne amoris tui, illumina cœcitatem meam claritate præsentiæ tuæ. Verte mihi omnia terrena in amaritudinem, omnia gravia & contraria in patientiam, omnia infima & creata in contemptum & oblivionem. Erige cor meum ad te in cœlum, & ne dimittas me vagari super terram. Tu solus mihi ex hoc jam, dulcescas usque in seculum; quia tu solus cibus & potus meus, amor meus & gaudium meum, dulcedo mea & totum bonum meum.

3. Utinam me totaliter ex tua præsentiâ accendas, comburas, & in te transmutes; ut unus tecum efficiar spiritus, per gratiam internæ unionis, & liquefactionem ardentis amoris. Ne patiaris me jejunum & aridum à te recedere, sed operare mecum misericorditer, sicut sæpius operatus es cum Sanctis tuis mirabiliter. Quid mirum, si totus ex te ignescerem, & in me ipso deficerem: cum tu sis ignis semper ardens, & nunquam deficiens; amor corda purificans, & intellectum illuminans.

CAP. XVII.

*De ardenti amore, & vehementi affectu
suscipiendi Christum.*

VOX DISCIPULI.

Cum summa devotione & ardenti amore,
cum

cum toto cordis affectu & fervore, desidero te, Domine, suscipere, quemadmodum multi Sancti & devotæ personæ, in communicando te desideraverunt, qui tibi maximè in sanctitate vitæ placuerunt, & in ardentissima devotione fuerunt. O Deus meus, amor æternus, totum bonum meum, felicitas interminabilis, cupio te suscipere cum vehementissimo desiderio & dignissima reverentia, quam aliquis Sanctorum unquam habuit, & sentire potuit.

2. Et licet indignus sum omnia illa sentimenta devotionis habere, tamen offero tibi totum cordis mei affectum, ac si omnia illa gratissima inflammata desideria, solus haberem. Sed & quæcunque potest pia mens concipere & desiderare, hæc omnia tibi, cum summa veneratione, & intimo favore, præbeo & offero. Nihil opto mihi reservare, sed me & omnia mea, tibi sponte & libentissimè immolare. Domine Deus meus, creator meus, & redemptor meus, cum tali affectu, reverentia, laude & honore; cum tali gratitudine, dignitate, & amore; cum tali fide, spe & puritate, te affecto hodiè suscipere, sicut te suscepit & desideravit sanctissima mater tua, gloriosa virgo Maria, quando Angelo evangelizanti sibi incarnationis mysterium, humiliter ac devotè respondit: Ecce ancilla Domini, fiat mihi secundum verbum tuum.

3. Et sicut beatus præcursor tuus excellentissimus Sanctorum Joannes Baptista, in præ-
sentia

sentia tua lætabundus exultavit in gaudio Spiritus sancti, dum adhuc maternis clauderetur visceribus: Et postmodum cernens inter homines Jesum ambulantiem, valdè se humilians, devoto cum affectu dicebat: Amicus autem sponsi, qui stat & audit eum, gaudio gaudet propter vocem sponsi: sic & ego, magnis & sacris desideriis opto inflammari, & tibi ex toto corde me ipsum præsentare. Unde & omnium devotorum cordium jubilationes, ardentes affectus, mentales excessus, ac supernaturales illuminationes, & cœlicas visiones tibi offero & exhibeo cum omnibus virtutibus & laudibus, ab omni creatura in cœlo & in terra celebratis, & celebrandis, pro me & omnibus mihi in oratione commendatis; quatenus ab omnibus dignè lauderis, & in perpetuum glorificeris.

4. Accipe vota mea Domine Deus meus, & desideria infinitæ laudationis, ac immensæ benedictionis; quæ tibi secundum multitudinem ineffabilis magnitudinis tuæ, jure debentur. Hæc tibi reddo, & reddere desidero, per singulos dies & momenta temporum; atque ad reddendum mecum tibi gratias & laudes, omnes cœlestes spiritus, & cunctos fideles tuos, precibus & affectibus invito & exoro.

5. Laudent te universi populi, tribus, & linguæ; & sanctum ac mellifluum nomen tuum, cum summa jubilatione, & ardenti devotione magnificent. Et quicumque reverenter
ac de-

ac devotè altissimum Sacramentum tuum celebrant, & plena fide recipiunt, gratiam & misericordiam apud te invenire mereantur, & pro me peccatore suppliciter exorent. Cumque optata devotione, ac fruibili unione, potiti fuerint, & benè consolati, ac mirificè refecti, de sacra mensa cœlesti abscesserint, mei pauperis recordari dignentur.

CAP. XLIX.

Quòd homo non sit curiosus scrutator Sacramenti, sed humilis imitator Christi, subdendo sensum suum sacra fidei.

VOX DILECTI.

CAvendum est tibi à curiosa, & inutili perscrutatione hujus profundissimi Sacramenti, si non vis in dubitationis profundum submergi. Qui scrutator est majestatis, opprimetur à gloria. Plus valet Deus operari, quàm homo intelligere potest. Tolerabilis, pia, & humilis inquisitio veritatis, parata semper doceri, & per sanas Patrum sententias studens ambulare.

2. Beata simplicitas, quæ difficiles quæstionum relinquit vias, & plana ac firma pergit semita mandatorum Dei. Multi devotionem perdiderunt, dum altiora scrutari voluerunt. Fides à te exigitur, & sincera vita: non altitudo intellectus, neque profunditas mysteriorum Dei. Si non intelligis, nec capis, quæ in-

frate sunt, quomodo comprehendes, quæ suprate sunt? Subdere Deo, & humilia sensum tuum fidei, & dabitur tibi scientiæ lumen, prout tibi fuerit utile ac necessarium.

3. Quidam graviter tentantur de fide & Sacramento, sed non est hoc ipsis imputandum, sed potiùs inimico. Noli curare, noli disputare cum cogitationibus tuis, nec ad immixtas à diabolo dubitationes responde; sed crede verbis Dei, crede Sanctis ejus & Prophetis, & fugiet à te nequam inimicus. Sæpè multum prodest, quòd talia sustinet Dei servus. Nam infideles & peccatores non tentat, quos securè jam possidet; fideles autem devotos, variis modis tentat & vexat.

4. Perge ergò cum simplici & indubitata fide, & cum simplici reverentia ad Sacramentum accede. Et quicquid intelligere non vales, Deo omnipotenti securè committe. Non fallit te Deus; fallitur, qui sibi ipsi nimium credit. Graditur Deus cum simplicibus, revelat se humilibus, dat intellectum parvulis, aperit sensum puris mentibus, & abscondit gratiam curiosis & superbis. Ratio humana debilis est, & falli potest; fides autem vera, falli non potest.

5. Omnis ratio, & naturalis investigatio, fidem sequi debet, non præcedere, nec infringere. Nam fides & amor ibi maximè præcellunt, & occultis modis in hoc sanctissimo & superex-

per excellentissimo Sacramento operantur. Deus æternus & immensus, infinitæque potentia, facit magna & inscrutabilia in cælo & in terra, nec est investigatio mirabilium operum ejus. Si talia essent opera Dei, ut facile ab humana ratione caperentur, non essent mirabilia, nec ineffabilia dicenda.

F I N I S.

SEQUENTIA ADDIDIMVS, pie Lector, non alia de causa quàm ne pagina vacarent tot, quæ ei si orationis stylo non parum discrepent, argumento tamen non malè conveniunt.





IDIOTÆ VIRI SANCTI REGULÆ, VITAM CHRISTIA- NAM COMPLECTENTES.

Prima regula, si homini videtur dura via virtutis, quia continuè oportet nos pugnare adversus carnem & diabolum & mundum, recordetur, quamcunque elegerit vitam etiam secundum mundum, multa illi adversa, tristia, incommoda, laboriosa patienda sunt.

Secunda regula, recordetur, quòd in rebus mundi diutius pugnatur, & laboriosius & infructuosius, in quibus labor est finis laboris, & tandem pœna æterna.

Tertia regula, recordetur, stultum esse credere ad cœlum posse perveniri, nisi per huiusmodi pugnam: sicut & caput nostrum Christus non ascendit in cœlum, nisi per crucem, nec debet servi conditio melior esse conditione Domini.

Quarta regula, recordetur, non solum esse ægrè ferendam hanc pugnam, sed optandam etiam, si nullum inde nobis præmium perveniat, solum ut conformemur Christo Deo & Domino nostro, & quotiens resistendo alicui tentationi, alicui ex sensib9 tuis vim facis, cogita cui-
nam

nam parti crucis Christi conformis reddaris, ut quando regulæ resistens, gustum affligis, recordare illum felle potatum & aceto. Quando manus retrahis à rapina alicujus rei quæ tibi placet, cogita manus illius pro te ligno crucis affixas. Et si resistis superbix, recordare illum, qui quum in forma Dei esset, pro te formam servi accepisse, & humiliatum usque ad mortem crucis: & quum de ira tentaris, recordare illum qui Deus erat, & omnium hominum justissimus, quum se tamen videret quasi latronem & illudi, & conspui, & flagellari, & opprobriis omnibus affici, & cum latronibus deputari, nullum tamen unquã aut iræ, aut indignationis signum ostendit, sed patientissimè omnia ferens, omnibus mansuetissimè respondebat, & sic discurrendo per singula, invenias nullam esse passionem, quæ te Christo aliqua ex parte conformem non efficiat.

Quinta regula, quòd in illis duodecim armis, nec in quoquam alio humano remedio confidas, sed in sola virtute Jesu Christi, qui dixit: Confidite, ego vici mundum, & alibi: Princeps mundi hujus ejicitur foras, quare & nos sola ejus virtute confidamus & mundum posse vincere, & diabolum superare. Et ideò debemus semper petere ejus auxilium per orationem sanctorum suorum.

Sexta regula, recordare quum unam vicisti tentationem, semper aliam esse expectandam,

dam, qua diabolus semper circuit quem devo-
ret, quare oportet semper servire in timore, & di-
cere cum Propheta: Super custodiam meam stabo.

Septima regula, ut non solum non vincaris
à diabolo, quum te tentat, sed ut vincas ipsum,
hoc est, quando non solum peccas, ex ea re
unde te tentaverat, occasionem sumis alicujus
boni, ut si opus suum bonum aliquod tibi of-
fert, ut inde in vanam gloriam incidas, tu illud
statim non opus tuum, sed ut beneficium Dei
cogitans humilias te, & judicas parum gratum
te esse Deo de beneficiis ejus.

Octava regula, ut quum pugnas, pugnes
quasi vincendo, deinde perpetuam pacem ha-
biturus, quia fortè hoc tibi dabit Deus ex gratia
sua, & diabolus amplius non redibit, confusus
de tua victoria, sed quum vicisti, geras te quasi
mox pugnaturus, ut in pugna semper sis me-
mor pugnae.

Nona regula, ut quamvis te sentias undiq;
benè munitum & paratum, semper tamen fugi-
as occasiones peccandi, quia ut dicit sapiens:
Qui amat periculum, peribit in illo.

Decima regula, ut in tentationibus semper
in principio occurras, & allidas parvulos Baby-
lonis ad petram. Petra autem erat Christus:
Quia serò medicina paratur.

Undecima regula, recordare, quòd licet in
ipso conflictu tentationis ardua videatur pu-
gna, tamen longè dulcius est vincere tentatio-
nem,

nem, quàm ire ad peccatum, ad quod te inclinat. Et in hoc multi decipiuntur, quia non comparant dulcedinem victoriæ dulcedini peccati, sed comparant pugnam voluptati, & tamen homo qui millies expertus est quid sit cedere tentationi, deberet semel saltem experiri, quid sit vincere tentationem.

Duodecima regula, propterea quòd tentaris, ne credas te à Deo derelictum, aut Deo parùm gratum esse, aut parùm justum & perfectum, memor sis, quòd postquam Paulus vidit divinam essentiam, patiebatur tentationem carnis, qua permittebat Deus eum tentari, ne de superbia tentaretur, in quo etiam homo debet advertere, quòd Paulus qui erat vas electionis, & raptus usque ad tertium cœlum, tamen erat in periculo, ne de suis virtutibus superbiret, sicut ipse dicit de se: ne magnitudo revelationum extolleret me, datus est mihi stimulus carnis meæ, qui me colaphizet. Quare super omnes tentationes homo debet maximè se munire contra tentationem superbiæ, quia radix omnium malorum superbia est, contra quod unicum remedium est, cogitare semper, quòd Deus se humiliavit pro nobis usque ad crucem, & mors nos vel invitos eousque humiliavit, ut simus esca vermium.

FINIS.





